

**DUE DATE slip**

**GOVT. COLLEGE, LIBRARY**

**KOTA (Raj.)**

Students can retain library books only for two weeks at the most.

<b>BORROWER'S No.</b>	<b>DUE DATE</b>	<b>SIGNATURE</b>

# मांझल रात

लक्ष्मीकुमारी लूढापत

पंचशील प्रकाशन, जयपुर

© सर्वाधिकार सुरक्षित

प्रकाशक : पंचशील प्रकाशन  
फिल्म कॉलोनी, जयपुर-302003

संस्करण : 1984

मूल्य : तीस रुपया

मुद्रक : शीतल प्रिन्टर्स  
फिल्म कॉलोनी, जयपुर-302003

## समर्पण

मोडू दादा,

वाळपणां में थारी गोद में खेलतां थारा मूंडा सूं ख्यातां अर  
वातां घणी सुणीं । कदे ही थूं राजी करवा ने सुणावतो,  
कदे ही म्हूं जिद्द कर सुणती ।

यां वातां री मेहमा तो यां वातां रा घणियां रा नाम अर  
काम सूं है पण यां री भासा अर भाव थारो सिखायोडो है ।

धाभाई दादा, वातां रा ई संग्रह ने थारी याद ने समर्पित  
कर री हूं ।

लक्ष्मीकुमारी चूंडावत

## भूमिका

आंपणी राजस्थानी भासा, राजस्थान री घरती अर इतिहास री तरै हीज सबळ नै क्षमतावान है । आंपणां गीतड़ा अर भीतड़ा जतरा कीरत उजागर है वसीज मरम भरी ल्यातां अर वातां है ।

राजस्थानी काव्य तो जगत चावो है, देस विदेस री घणी खरी भासावां में राजस्थानी काव्य रो अनुवाद व्हीयो है पण गद्य साम्हो ध्यान ही नीं दीवो, ईं वास्ते राजस्थानी गद्य रा गुण लोगां री जांण में आणां चावै जस्या आया नीं ।

राजस्थानी वातां री सैली आपरा ढंग री अनोखी है । ईं पोथी में म्हूं म्हारी आधुनिक राजस्थानी में लिख्योड़ी चवटा मौलिक वातां नजर कर री हूं ।

राजस्थान री जूनी परंपरा अर इतिहास ने अळगो राख नै वातां लिखणों तो एक राजस्थानी लेखक साहू नामुमकिन ही नीं पण अणखांवणो भी लागै । राजस्थान री संस्कृति अर परम्परा अतरी ओज सूं भरचोड़ी है के कोई वात लिखै अर जीमें यां रो परतवंत्र नीं भलकै तो वा वात राजस्थान सूं अळगी अळगी अर अपरोगी लागै ।

राजस्थानी रो तो एक एक आखर इतिहास है । वात कैवा रो अर लिखवा रो म्हारो जूनो सौक है । हालतांईं जतरी वातां म्हें लिखी है वे सगळी राजस्थानी संस्कृति अर राजस्थानी वीरता सूं रळचोड़ी है ।

राजस्थान में सूरमां अर सतियां हीज नीं अठा रा तो घाड़ायतियां रो ही चरित्र रो दर्जो एक अजब रियो है ।

भारत में राजस्थान रो जो महत्वपूर्ण स्थान है वस्यो ही स्थान भारतीय भासावां में राजस्थानी भासा रो है । राजस्थानी रा एक एक सबद रे लारै एक एक स्रणखेत वोलै, पींड्यां रो पराकरम भांकै ।

म्हारी लिखोड़ी वाता में सूं थोड़ी सी ये वातां विदवानां रे आगे मेल री हूं। यां रा उपमान, उपमेय, विशेषण, विशेष्य, चरित्र अर वर्णन सैली वगैरा सगळी राजस्थान री आप री अर आप री परंपरा री है। म्हें यां वातां ने रात दिन आपराँ घरां मे बोला जीं भासा में लिखी है।

राजस्थानी में वातां कैवा री अर लिखवा री परंपरा घणी जूनी है। राजस्थानी गद्य में लिखोड़ी वातां अर ख्यातां सोळवीं सताब्दी सूं मिलै। सत्तरवीं अर अठारवीं सताब्दी में तो वात कैवा री अर लिखवा री कळा वराबर तरक्की करती री, घणी परचार व्हीयो। यां साढा तीनसौ चारसौ वरसां में हजारों वातां लिखी गी।

आजकाल हिन्दी में जो का'ण्यां या वातां लिखी जे वारो लहजो बंगाळी अर अंगरेजी भासा सूं लीधो है। बंगाळी भासा में जो वातां लिखी गी वारो ढंग सूधो अंगरेजी सूं लियोड़ो है। अंगरेजी रे देखादेख बंगाळी मे ईं तरै सूं वातां लिखणो सरू व्हीयो, बंगाळी री नै अंगरेजी री नकल हिन्दी में कीधी गी पण राजस्थानी वातां री सैली अर ढंग विलकुल मौलिक अर जूनी है। सुरू करवा रो ढंग, खतम करवा रो कायदो, वरणन करवा री प्रथा सगळी री सगळी आपणी है, कोई दूजी भासा री छाप कोयनी।

राजस्थानी में तीन भांत री वातां व्हे। एक तो गद्य में, दूजी पद्य में तीजी भांत री वातां गद्य पद्य मिल्योड़ी व्हे। वातां भांत भात रा विसय माथै लिखोड़ी है। देवी देवता, पर्व तिंवार, भूत प्रेतां री, सिकार माथै घणी वातां, सूर ना'र रा भूगडां री, सिकार कतरी भांत री व्हे, क्रियां करीजे यो वरणन 'यां वातां में घणों विस्तार सूं कहचोड़ो है। सूर ने एक सूरमा रो प्रतीक मान सूर अर भू'डण री वातचीत में एक वीर पुरस रा मन री, इच्छा री अर विचारां री तसवीर सी खैंची है। धाढायतियां री हिम्मत री वातां, चोर अर ठगां री चतराई री वातां घणी सुवावणी है। चोर अर ठगां कसी कसी सफाई सूं आप री कळा रा हाथ बताया, घणी रोचक है। अकेला खापरिया चोर री घणी वाता लावै। एक सूं एक बढिया चालाकी अर चोरी री तरकीबां री।

गप्पां रो ही टोटो नीं। असी असी गप्पां हांकी है के सूभ पै अचम्भो आवै। बणजारा, कतारिया, सेठ साहूकार, पसु पंछी, डाकण्यां, जोगण्यां, सोखता, पोखता, इन्दर री परियां, टाबरां री वातां वगैरा अतरी है के जांरो पार नीं। धरम नीति री वातां ने ही असी मनोरंजक वणाय दीधी के सुणतां ओरणी नीं आवै।

सूरवीरां री अर रणखेतां रे वातां कैवतां कैवतां तो राजस्थानी कदे धाप्या ही नीं। वीर रस रो लारै रो लारै श्रृङ्गार चालै, प्रेमी प्रेमिकावां री वातां रा तो खजाना भरचा।

ये बातें जसी मनलुभावण है वस्यो ही चित हरखावण यां रे कैवा रो ढंग है । कैवा रो ढंग अतरो जानदार, जोरदार अर सुवावणो है के सुणवा वाळो सुणतो हीज रै जावै, ऊठवा रो जीव नीं करै । यां बातों री वरणन सक्ति तो गजब री है, वात कांई कैवे चित्तर उतार दे । कोई वात रो कैवण्यो व्हे अर वात जमावै जीं वगत सुणवा वाळा ने यूं लागै जाणै दूजा लोक में परा गिया हां । एक पल में हंसावै, दूजा पल में रोवणों आवै, तीजा पल में रीस सूं कटकटियां भींचवा लागै । वीरता रो वरणन करै तो हंम हंम ऊभो व्हे जावै । एक दांण तो कायर रो हाथ ही तरवार री मूठ पं जाय पड़ै । वात रो वो छप्पर वांवे के सुणवा वाळा चतराम री फूतळ्यां व्हे ज्यूं बैठै रै जावै ।

एक जणों वात कै जठे वस्यो ही लारै हंकारो देवण्यो आवै । हंकारा विना वात असी फीकी जसी नंगारा विना फोज ।

“वात में हंकारो, फोज में नंगारो”

वात सुरू करवा रा न्यारा न्यारा ढंग व्हे । कोई वात सुरू ही यूं करै,

वातां हंदा मामला दरिया हंदा फेर  
नदियां वहै उतावळी दे दे घूमर घेर  
केताक नर सोवै केताक जागै  
जागतां री पागड़्या ढोल्या रे पागै  
ऊंघतां री पागड़्यां जागतड़ा ले भागै

वात कैवण्यो ही एक पूरी कळा है । वात एक जणों कैवे परा घटना रा दुस्चां ने ईं तरै सूं मूंडागै राखै जाणै नाटक देख रिया हां । वात रा जतरा ही पात्र व्हे जांरो न्यारो न्यारो पार्ट वो अकेलो करतो जावै । एक पल पैलां तो वो डोकरी री नांई गावड़ हिलातो, कंठ बूजातो वोल रियो हो, दूजे ही पल मूँछ मरोड़तो, कमर में बंधी कटार खींचवा ने हाथ मेलतो दीखै । वात रा चढाव उतार रे लारै पूरो अभिनय करदे ।

सींयाळा री रातां, गावां में घूणी घाल दे, घूणी रे चारुं पासै दानां बूढा, जुवान मोटघार, छोरा छापरा सगळा भेळा व्हे जावै, तपवो करै । गांव रा दानां बूढा, ठावा मिनख डींगा माथै ऊकडू बैठ जावै, एक मोटा डींगा पं वात कैवण्यो ही बैठ जावै, पछै जमें वात जो रात जातां खबर नीं पड़ै ।

म्हारे पिताजी देवगड़ रावतजी विजैसिधजी रे वात कैवावा रो सोक व्हेणो ही हो, जां दिनां रो रहण सहण ईंज ढंग रो ही हो । जूनी परंपरा रे माफग म्हांके अठै

ही बात कैवा वाळा रेंवता, और ही गुणी आवो करता । म्हांके अठ रेंवा वाळा में एक तो मूळजी रावळ, दूजा जोरजी बड़वा असी ठाठदार वात जमाता के कांई कैवणो । हजारां वातां, दूहा कवित्त, पूरो पिरधीराज रासो मूंडै याद, भण्यां नीं एक खांडो आखर । वा री चाकरी वात कैवा री ही । सांभ पड़तां हीं रोसनी रो मुजरो करतां ही वात जमती, म्हां सगळा जणां भेळा व्हे वैठ जाता । एक जणो हंकारो देतो, दाना बूढा हाथां में माळा लीघां, बीच बीचै माथो हिलावता, “वाह भाई वाह, कांईं कैणी वात” री दाद देता, वात रा आणंद ने दूणों कर देता । सियाळा में सिगड़ी कतरी दांण भर भरनै आय जाती, वात चालती रैती । सुणवा वाळा चित्राम ज्यूं बँठा सुणता रैता । चोमासा में भरमर भरमर छांटा पड़ता, अस्या समै में म्हारे पिताजी हुकम देवो करता “आल्हा ऊदल री वात कैवो ।”

आल्हा ऊदल री वात जमती, लारै लारै दूहा रा फटकारा लागता । एक तसवीर खिच जाती, घायलां ने डोळ्यां में घाल रिया है, घोड़ा हणहणाय रिया है, हाथी चरडाय रिया है, रुण्ड बिना मुंड घूम रिया है । कटारियां आंतडियां ने फाड़ती यूं निकळ री है जांणो भरोखा में सूं मेंदी रा रच्योड़ा हाथ निकळचा है ।

सुणतां सुणतां डोकरा हुक्का री नेज ने छोड़ डाढ़ी पै हाथ फेरवा लागता । श्रोता रोमांचित व्हे जाता, म्हां टाबर आख्या फाड़्यां आप रो आप मूल जाता ।

यूं तो वात कैवण्या री कोई खास जात नीं जो कैय जाणै वो ही कैवे । पण रावळ, मोतीसरा, भाट, बड़वा, राणीमंगाळ ढाढी, नकारची, सरगडा जांगड़ कोम में वात कैवण्यां ज्यादा मिलै पींड्यां सूं याने वातां जबानी याद चाली आवै । एक नीं अनेक, छोटी नीं मोटी मोटी वातां सैकड़ा दूहा सूधी याने जबानी याद रै । भण्यां पढ़्या नीं पण वरणन यांरो अतरो जबरदस्त के कांईं कैणो ।

वात रे लारै मोका मोका पै दूहा बोलता जावै । यां दूहा रे बोलता जावा सूं वात रो आणंद और ही चोगणो व्हे जावै । परसग पै गावता ही जावै । छोटा छोटा वाक्य, एक फालतू भरती रो आखर नीं, टाळमा सबद, काळजा में जाय सूधा लागै ।

वातां रा कैवण्यां मिनखां ने राजा माराजा आछी इज्जत अर रोजगार दे आप रे अठ राखता । यां री घणी पूछ ही, सभा ने रीभावाने ये आपरी कळा बताता,

---

॥ राणीमंगा एक जात व्हे जो सिरफ राणियां ने ही जांचै, आपरी वही में स्त्रियां रा पीडीवार नाम मांडै । राजा माराजां सूं कांईं नीं लेवै । राणियां रा जाचक व्हेवा सूं ये राणीमंगा वाजवा लाग्या ।

इतिहास की शिक्षा घणी कर यांरी वातां सूं ही देवता । इतिहास अरु ख्यातां की जांणकारी तो यां वातां सूं घणी चोखी व्हे जाती ।

यां वातां ने कोरी जबानी ही नीं कैवै । हजारों की गिणती में ये लिख्योडी है । वातां ने लिखाय राखवा रो पैलां घणों सोक हो । केई वातां तो अस्या रूपाळा अक्षरां में जमाय जमायनै मांडघोड़ी है, मांयने जगां जगां चित्राम उतारघोड़ा है । वदिया पुट्टो मुखमल रो, छींट रो चढ़ाय घणी सावधानी सूं राखता । पीढियां तांईं अवेरयां राखता, पढ़नै सुणता सुणावता । ख्यातां अरु वातां लिखावा रो घणों रिवाज हो । राजा माराजा आपरा घराणां रा जम री आप री सोल री, कविता, वातां लिखायनै चित्तर बणावायनै, आपणै मित्तरां रे, सगा परसंगियां रे अठे भेजवो करता । म्हारे देखणी तक में यो रिवाज हो । डूंगरपुर दरवार विजैसिधजी, सलाणे दरवार जसवंतसिधजी अरु म्हारे पिताजी रे आपस में मित्तरता ही जो एक दूजारे यूं कविता, वातां आपरे पसन्द री नकलां कराय भेजवो करता । जनाना सरदारां रे कविता अरु वातां भेली करवा रो, वांचणै रो अरु भेंट करवा रो सोक घणों हो । म्हारे कने एक जलाल गहाणी री वात रो गुटको है । म्हारे नानी की भुवा को व्याव भालावाड़ दरवार सूं व्हीयो । वां जलाल गहाणी री वात रो यो गुटको लिखायो । वी गुटका ने वां आपरी भोजाई गोड़च (मेवाड़) ठुकराणीसा ने दीघो । गोड़च वाळा, आपरी वेटी अरु म्हारा नानीसा (देलवाड़ा) ने दीघो । वा वी गुटका ने म्हने वक्यो ईं तरह सूं वातां री पोथियां एक जगां सूं दूजां जगा तक घणा चाव सूं भेट कीधी जाती । वीं गुटका री कथावस्तु रा आधार पै ईं संग्रह मांयली जलाल री म्हें वात लिखी है ।

यां ख्यातां वातां री भासा प्राचीन राजस्थानी है । पाड़ीसी राज्यां री भासा रो ही यां वाता पै असर है । पंजाबी, सिंधी, गुजराती भासा रा सब्दां ने काम में लीवा है ।

यूं तो अठारवी सताब्दी तक गुजराती अरु राजस्थानी मामूली फरक सूं एक ही भासा री है । वीं भासा ने आजरा गुजराती "प्राचीन गुजराती" रा नाम सूं बोले, राजस्थानी ईं ने डिगल या प्राचीन राजस्थानी कैवे । राजस्थान रा जालोर रा कान्हडदेव री ख्यात जको जानोर रा हीज एक कवि री रच्योडी है, वा गुजरात में वी० ए० रा कोर्स में पढाई जावै । गुजरात वाळा वीं भासा ने आपरी प्राचीन गुजराती माने ।

वास्तव में अठारवीं सदी मूं पैलां राजस्थान अरु गुजरात रो सामाजिक अरु सांस्कृतिक सम्बन्ध एकाकार हो । अंगरेजां रे आयां राजनैतिक ढंग सूं यां ने अलग करवा नूं ये आज न्यारा न्यारा व्हीया । सिध अरु पंजाब सूं ही राजस्थान री सीमा

अड़ै । रात दिन रो आवणो जावणो हो । आज सिंध रो थरपारकर रो जिलो सदिया सूं जोधपुर राज रो हीज हिस्सो हो । वठं अबै ही राजस्थानी बोली जावै । जैसलमेर कानी सिंधी भासा रा घणां ही सबदा ने काम में लावै । उत्तरी बीकानेर रा नै पंजावी रा सबद घणां मिलै । सीमा मिलै जठै यूं सबदां रो मिलणो कायदा री वात है । ये सब व्हेतां थका ही यां वातां में ठेठ राजस्थानी भासा है । आखा राजस्थान में ईं खूणां सूं वीं खूणां तक यां रो प्रचार है । लिख्योड़ी मिले, कही जावे । विसेस विसेस जगां री बोली रो कैवा में लिखवा में थोड़ो घणां फरक पड़ै बाकी यां री आतमा अर सरीर में कोई फरक नीं ।

म्हारी कलम सूं लिख्योड़ी ये वातां जो पोथी में छप री है, यां री गुणगुरिमा है वा तो राजस्थान री घरती री उपज है; भासा अर भाव विभूति मातृभासा राजस्थानी री संपदा है । म्हारी कलम अर म्हूं तो विदवानां रे मूंडागै यांने राखवा ने निमित्त मात्र हूं ।

लक्ष्मीकुमारी चूंडावत

## अनुक्रम

भूमिका/	5
पादूजी/	13
रजपूतारणी/	28
पिउसंधी/	35
हूंकार री कलंगी/	45
हाड़ी राणी/	51
ऊगो भाणेज/	58
डाढाळो सूर/	67
लालजी पेमजी/	73
जसमल ओडरण/	79
ऊजळी/	88
ढोला माह/	95
लालां मेवाड़ी/	104
सोरठो/	114
जलो/	126

## पावूजी

ढोल वाजरिया, मारवाड़ रा कोठू गांव में मिनख हूरह्या हूरह्या फिररिया । केसरिया कसूमल पागां वांध्यां, आयांगियां री अमल री मनवारां चालरी । पावूजी रे सात सुवागण्यां मिल पीठी कररी, लारै लारै मीठा मीठा गळा सूं पीठी रा गीत गावती जायरी ।

पावूजी री जान अमरकोट चढरी है । पावूजी उमंग में भरिया मूंछां पै घड़ी घड़ी रा हाय फेररिया ।

परखेतू पोसाक त्यार व्हेंगी, कलंगी सिरपेच कस्यो टांगणों वो निस्चै व्हेंग्यो, तरवार सोमा री नारमुखी मूठ री छोट लीधी, ढाल गंडा री आछी सी देखर टाळी । भाला ने ओप देवा ने सिकळीगर ने दे दीघो । अवं घोड़ा री वात सोचै । घोड़ी पावूजी री जोड़ रो व्हे, अमरकोट रा सोढ़ा घोड़ा ने देखतां ही थूथकारो न्हाकवा लाग जावै जद तो वात ही है । जत्या पावूजी धांका वीर है वस्यो ही वारी रानां नीचै घोड़ो व्हेंगो चावै । पावूजी रे एक घोड़ो दाय नीं आवै । वारी जीव जावै न एक घोड़ी पै आय अटकै । केसर काळमी री तीखी कनौती ! कूकड़ा री नाईं खिच्योड़ी गावड़ !! भीणी भीणी हींस !!! केसर काळमी घोड़ी है तो वस वा एक पावूजी रे लायक । देवळ चारणी, आपरी घोड़ी ने पावूजी ने देवेला के नीं ? गायां रो दूव पाय पायनै मोटी करीयकी केसर ने, देवळ चारणी आपरा जीव सूं वत्ती राखै । पावूजी सोची, चावै जो व्हो तोरण मारणी तो ईं केसर घोड़ी री पूठ पै चढनै हीज । चांदा ने कह्यो, “भाई, मानो मत मानो, म्हूं परणवानै जावूला तो केसर काळमी माथै हीज चढनै ।”

चांदे जाय देवळ ने कह्यो, “पावूजी रो व्याव है, देवळ देवी ! धां केसर ने चार दिनां साल देवो, पावूजी परणनै आवै जतरे ।”

देवळ चमकी, “केसर ने दीवां, म्हारे नीं सरै । केसर बिना म्हारी गायां री रखाळी कुण करै ? खीची तो गायां घेरवा ने ताखड़ो वैठ्यो है ।”

“देवळ ! कांई वात करो, थारी गायां रा रखाळा म्हे, थारी केसर कूदणी पै भालाळो पावू चढैला, थारी केसर जान रे वीचै चालैला, केसर जसी तो अलल वछेरी नै वांकड़नी मूंछां रो पावूजी । केसर काळमी ने पावूजी जस्यो सवार नीं

मिलेला, नीं पावूजी ने केसर जसी घोड़ी मिलै । देवळ बाई ! नटो मती । केसर भींणी भींणी हीसती, धीमी धीमी नाचती अमरकोट रा सहर में चालैला, पावूजी भालो भळकातो घोड़ी ने कुदातो तोरण मारैला जद सोढा थारी केसर री कूद देखता रैजावेला । रणवंका राठीडां रा घोडां री अर मरदां री जो तारीफ है सोढां ने आंख्यां देखवा दो ।

घोड़ो, जोड़ो, पागड़ी, मूँछां तरणीं मरोड़ ।

ये पांचूँ ही राखली, रजपूती राठीड़ ॥

देवळ चारणी राजी व्हेगी घोड़ी देवानै । पावूजी वीद वण्या, बागो पैरचो छोगा कलंगी टांक्या, ढाल बांधी । केसर ने सिरणगारी, मे'दी राच्योड़ा च्यारूं ही सूमां में घूघरा बांध्या, केसवाळी ने लच्छा घाल घाल गुंथी, गळा में सोना रो हालरो घाल्यो । पावूजी रो सारो भायपो भेळो व्हीयो, लुगायां मंगळगीत गावा लागी, ढोल बाजवा लाग्यो, माथै सेवरो बांध्यां, केसर री लगाम पकड्यां पावूजी ऊभा ।

जोसी घोड़ी री पूजा कीधी, काकी हरिया मूंगां रो दुकड्यो भर केसर रै मूंडांगै राख्यो, मां कांचळी सूं वोबो काढ नै पावूजी रे होठां रे लगायो "ईं दूध ने उजाळजे ।" भौजाई आंख मे काजळ घाल्यो । पावूजी भट पागड़ा में पग दे केसर री पूठ पै चढ्या । लुगायां भट घोड़ी उगेरी, "वछेरी म्हारी ए रमभूम करती जाय ।"

पावूजी री बेनां घोड़ी री लगाम भाल वीद री घोड़ी आगै, मुळकती मुळकती नाची, पावूजी मूठी भर रिपिया बेनां पै निछरावळ करनै फेक्या । सगळां रे होठां पै आणंद री लैरां दौड़री पण साम्ही ऊभी देवळ डसुका भर रोवा लागी ।

"यो काई ? बारेठणी जी यो काई थारो भूंडो सुभाव है । सुगण रा असुगण कररिया हो, वींद तो घोड़ी चढ्यो हूँ नै थां साम्हा ऊभा रोयरिया हो ।"

देवळ तो आय पावूजी री लगाम पकड लीधी "थां तो परणवा जायरिया हो म्हारी गायं रो खंखालो कुण ? थारा भाइयां ने छोड़ जावो ।"

"देवळ देवी, भाइयां ने छोड्यां जान री सोभा काई ? भाइयां विनां आगै सौढां रै लारै कुण जीमैला ? कुण सोढां रे साथै मनवारां लेवैला ? कुण सगा परसंगियां सूं रोळ करेला ? म्हारा भाई साथै नी व्हेला तो सोढियां गाळियां किरण ने गावैला ?

देवळ बोली, "भाइयां ने नीं छोड़ो तो चांदा ने छोड़ जावो ।"

“चांदो अर डामो तो म्हारा भायला भाई है, भाइयां सूं ही सवाया । याने तो देवळ भवानी, म्हूं करणी तरं छोडूं ? ये तो म्हारा डावल्या जीमणां हाथ है । वीचै वीचै तो केसर चालैला, डावे जीमणै चांदा डामा रा अबलक घोड़ा ।”

“अठी ने पावूजी, थारी जान चढ़ी नै बठी ने खीची म्हारी गायां घेरैला, थां सांची मानो, थारे जातां हीं खीची म्हारी गायां तांण ले जाय ।”

पावूजी भरोसो दीवो, “म्हू तीन दिन अमरकोट रैवूला, चौथो दिन वठै नी लगावू थां भरोसो राखो ।”

“थां सासरे जाय, वीनणी में रम जावोला, साळा साळियां री रोळ में विलम जावोला । थां वठै सोढ़ीजी री सेजां में पोढ़ोला, देवळ चारणी री गायां किराने याद आवैला ।” देवळ रोवती जावै नै पावूजी ने करड़ा करड़ा बोल सुणाती जावै ।

“देवळ, अँ म्हूं थाने वचन देवूं जो थारी गायां ने खीची घेर ले तो थां थारा गुवाळ ने अमरकोट दौड़ाय दीजो । म्हूं जीमतो व्हूला तो चळू अठै आयनै करूला । गायां घेरवा री खबर सुणातां पांण कसर घोड़ी पै काठी मेल दूला, और तो और चंवरी पै चढ्यो फेरा खावतो व्हूला तो फेरा रे अघबीचै ऊठ जावूला । वारेठणीजी, थें रोवो मती, राजी राजी सीख दो, परगूला जीं रात सिवा दूजी रात सासरै नीं रुकूला । म्हारी बात रो भरोसो राखो ।”

देवळ पावूजी कना सूं सोगन लेवाया ।

जान चढ़ी, ऊंट घोड़ा आगै वध्या, पांच सात कोस चाल्या, मंगरी आई देखै तो एक नोह्थी ना'रड़ी मंगरी माथा सूं उतरनै केस बिखेरियां घाटी रोकनै गैला में ऊभी रैगी ।

डामै धनुष पै तीर चढायो, पावूजी रोक्यो, “था वन रा राजा री अस्त्री है, आंपां धरती रा ना'र हां, मरद अस्त्री पै हाथ नीं उठावै ।”

डामै तो ना'री रे साम्हें घोड़ा री बाग खैची, रान दबाई, ना'री पूंछ दवाय, मंगरा पाछी चढ़गी पै पाछी चढ़ती ना'रड़ी पै डामै कांकरी फँकी “हत्थारी ! ना'री व्हेयन पाछी फिरगी थूं ।”

कांकरा री लागतां ईं ना'री पूठी फिरी । दाकळ करनै हाथळ उठाय लपकी, सूधी डामा रा माथा पै आई । डामो बोल्थो, “पैलां थूं वार करलै, मरद पैलां नारी पै ससतर नीं उठावै ।”

ना'री री हाथळ डामा रा माथा पै आई, जीनै डामो आपरी ढाल पै भेल नै पाछी फिरती ना'री रे तरवार री मारी जो ना'री रा दो ढोल व्हेग्या । जाणै सावण री काकड़ी कटी व्हें ।

जांन रे साथै सुगनी हो, आय पावूजी ने अरज कीघी “सुगन अस्या खोटा व्हेता आयरिया है, पै‘लां तो काळो नाग फण कर नै जांन रो गैजो रोवयो, पछै ना‘रडी घाटो रोकनै जावा ने मना कीघो । सुगन देखतां तो आप पाछा फिरजावो, खांडो भेज नै व्याव करलो ।”

पावूजी बोल्या, “अबै जांन ने पाछी मोडयां म्हारी हसी व्हेला । अमरकोट रा सोड़ा हसेला, एक ना‘रडी सूं डरनै पावू पाछो फिरगियो, कठै पावू रो भालो गियो अ‘र कठै गिया चांदा डामा रा तीर कामठा । ईं वगत तो पाछै फिरियां राठोड़ां री मरदानगी पै काळो दागो लागै, म्हारी मां कंवळादे रौ दूध लाजै । अमरकोट में आपणी कांई आछी लागैला ? बठै सोड़ा सरदार कमरबन्धा बांधयां आपणी अगवाणी करवानै कांकड़ पै आय ऊभा व्हेला, साळा साम्हा आवा री त्यारी कररिया व्हेला । साळयां डागळै ऊभी कामण गायरी व्हेला । सोढी सहेल्यां सूं वैठी पीठी करायरी व्हेला, नीम पै वैठा कागला ने उड़ाय, केसरवरणी सोढी म्हने उडीकरी व्हेला । म्हूं पाछो फिर जावूं तो वे सहेल्यां सोढी ने चिढावेला, “धूं ती कै‘ती म्हारी पावूजी वन रो ना‘र है, वो तो एक ना‘रडी सूं डरप पाछो फिरयो । देख्यो धारा वीर पावूजी ने जो खांडो परणनै लेजायरियो है ।”

सुगनियां कहयो, “आपरो मन व्हे ज्यूं कगे, सुगन तो अस्या है के काळ साम्हो आयरियो है ।”

‘वीरां ने नामप्यारो व्हे । घड़ अ‘रमाथा तो कटता जुडता ही रै । कायरां रा माथा घड़ पै व्हेतां लगं ही मरयोड़ा है, वीर माथा कटायनै ही जीवता रै । धूंसा पै डंको पटकाय, बाजतां ढोलां जांन आगै चाली ।

चांदा, डामा आपरा घोड़ा ने आगै कीघा, पावूजी केसर काळमी ने हकाळी ।

देखै छै भुरजाळो पावू निजर पसार  
कोई चांदै ने डामै ने वूमै पावू मुलक की  
किण रा तो दीखै छै ये भूरा भूरा कोट  
किण रा तो दीखै छै ये धूंघा धूंघा माळिया

चांदो बोल्यो,

आग्यां छां ओ पावू आपां घोळी घाट रे मांय  
कांकड तो वड़ग्यां छां आपां अमरकोट रा  
घोळा घोळा दीसै सोड़ां रा गढ कोट  
धूंघा धूंघा दीसै सोढी रा माळिया

अमरकोट में मूरजमल सोड़ा रे घरं नीउत घुड़री, नरणायां में मीठा मुर बाजरिया ।

लुगायां छाजां पै ऊमी जान देखवाने उड़ीररी, सोड़ा पोयाकां क्रीधां, जान रे साम्हा जावाने अमल पान री मनवारां करता त्यार व्हेयरिया, सोढीजी री मां वांस री कामइयां बांधती सासू आरती जोड़वा में आपरी सारी कारीगरी लगायरी । सोढीजी ने वारी साथण्यां सिएगाररी, ललाट पै केसर री खोल काढ्यां, हाथ में कांकरण डोरड़ा बांध्योड़ी ऊजळ दन्ती सोढी साथण्यां में यूं लागरी जांएँ तारामंडळ में चांद ।

सोढी फूलमदे रे हिया में उथळ पुथळ व्हेयरी ज्यूं ज्यूं जान आवा री वेळां व्हे ज्यूं ज्यूं आणंद नै भय रा वेग सूं छाती घडघड कररी । साथण्यां रे लारं डागळा पै जान देखवा ने चढे अर सरमाय पाछी नीची उतर जावै ।

ऊंची चढूं नीची उतरूं ए  
सइयां जोवूं ए भालेळा री वाट  
सहेल्यां ए आंवा मोड़ियो

जान रा नगरा सुण्या, सूरज री किरणां में भाला भळक्या, घोडां री टापां अर हींस सुराी, लुगायां देखणे ने आगती एक दूजी रे माथे पड़ती, गोखडां में, छाजां पै जाय चढी ।

आगं आगं पावूजी रा भाई भतीजा नै परवार, छोगा कलंगी लगायां, अलल वछेरा नचावता, बांका मूंडा रा सुरंग, कुमैत, अवलक घोड़ा ने एकी वेकी कराता आया ।

“जान तो रूपाळी है । घोड़ा चोखा सिएगारियोड़ा है । वीद रूपाळो घणो बतावै, वीद ने देखवा तो दो ए ।” लुगायां एक दूजी सूं वातां करै ।

डावै जीमएँ चांदा डामा रा घोड़ा, वीचें केसर काळमी पै पावूजी सवार । केसर रमभम रमभम करती चालरी, ढोल री ताळ माथे केसर रा नेवर भरणक भरणक वाजरिया । कनीती उठायां, छाती फुलायां, मरोड़ मरोड़ बांकी करती गाबड़ पै केसवाळी री गूंथ्योडी लट्ट्यां हालती जायरी, देखवा वाळा केसर री चाल ने देखता रैग्या । सेवरो बांध्योड़ा पावूजी जांएँ दूजो सूरज उग्यो व्हे । चौड़ी छाती ने ऊंची क्रीधां, एक हाथ सूं वाग पकड़्यां दूजा सूं मुजरो भेलता पावूजी केसर री सास घीरै घीरै हिलावता चालरिया जांएँ फौजां रो मांभी घूमतो जायरियो । मोटी मोटी आंल्यां, तेज सूं दम दम करतो ललाट, कुन्दन री नाई दपदप करतो रंग । लांबी लांबी मुजा सेल ने थांम्योडी । पसवाड़े लटकती तरवार । सोढा री नजर वीद पै जमी री जमी रैगी । अमराणां रा मिनख पावूजी रो रूप देखता रा देखता रैग्या । सोढियां छाजां पर सूं थूथकारा न्हांकरण लागी, सोढी री मां री छाती वीद रा बखारण सुरा सवा हाथ चौड़ी व्हेगी, साथण्यां सोढी ने छाती रे लगाय लीवी “कसी भागवान है थूं ।” डावड्यां वीड़ी वीड़ी वघाई दीवी “वाईसा, वाईसा, सूरज री किरण नै वीद री किरण एकसी है ।”

फूलमदे रो हिवड़ो हिलोळा लेवा लाग्यो । सोढां रो साथ आपणां जवानां रो नै जांन रा जवानां रो मन ही मन मुकावलो करण लाग्यो । वाथ में वाथ घाल नै सोढा अर राठोड़ मिल्या, अमलां री गैरी गैरी मनवारां खोवा भर भर एक दूजा ने देवा लाग्या । डामो बोल्यो “आपरा खोवा सूं तो म्हारो कान ही तातो नीं व्हे, यो कटोरो ही भेलाय दो ।” एक घूंट में कसूंवा रो कटोरो खाली कर डामो, सोढां रे हाथ में पाद्यो भेलायो । डोढी आंख सूं डामा ने जी बगत तो सोढा देखनै रैग्या ।

वाग में जांन रा डेरा लाग्या । चंपा री हरी डाळ रे बंधी केसर उगाळी कर री, तंबू में पावूजी साथीडां लारै वैठ्या, बातां कररिया । रंगीला सोढा आप आप रा घोड़ा ने पलाण बाग मे राठोड़ां सूं मनरळी करवा ने आयग्या । आडी डोढी लाल पीळी जाजमां ढाळदीधी । राठोड़ां रे, सोढां रे हंसी मसकरी री वातां व्हेवा लागी । वातां रा फटकारा लागरिया “केसर रो नाम तो कानां सुण राख्यो ह्यो, जस्यो नाम सुण्यो वसी वीने आंख्यां सूं देखी पण वीरी दौड देखां जद पतो लागै ।” एक सोढे सरदार कह्यो ।

“म्हारी केसर तो कोस पचास चालनै आई है, आपरा घोड़ा तो ठांणां सूं खुलनै आया है, अवार दोड़ रो मुकावलो कस्यो ?” पावूजी जवाब दीधो । पण सोढा तो जिद पकड़ लीधी, “थांरा म्हारा घोड़ा री दौड़ तो व्हेला हीज, सोढा रा नै राठोड़ां रा जवानां रो जोहर पतवाणणो है”

तै व्ही जो हारे वीरो घोड़ो चारणां ने बगसीस । सोढा आपरा तेज घोड़ा पै जीण माड्यो, पावूजी केसर री पूठ पै थाम दे, “बाप बाप” कबता चढ़्या । दोई साळा वैनोई होड़ मार घोड़ा फैंक्या ।

ऊभां तो देखै छै सगळा अमराणै रा लोग ।

कोई मेलां पै निरखै छै सोढां रे घर री कामणी ॥

पावूजी केसर ने ललकारी । केसर तो उड़ी जाणै आसमान में उड़री व्हे । दौड़ती घौड़ी घूं दीखै जाणै जमीन रे मांयनें मिलगी व्हे ।

घर घर में घुड दौड़ री बात व्हेगी, रंगीला सोढा हारग्या, पावूजी राठोड़ जीत्या ।

सोढां ने मन मे घणी रीस आई,

“तोरण री वेळां पावूजी ने अर केसर ने खबर पटकांला ।” घणी ऊंची जगां पै लेजाय तोरण वांध्यो ।

“अवै पावूजी अर केसर काई करैला ?”

वनड़ा वण्यां पावूजी तोरण पै आया, देखै तो गढ़ रे कांजर आसमान पै जातो तोरण

वांघ राख्यो । पावूजी रे मन में सोच आयो अरु केसर काँई करैला । मन ही मन केसर ने कैवै,

मत नां तो दीजै ए केसर थारो म्हारो पोत ।

मत नां तो लजाये ए राठोड़ां री जातड़ी ॥

पावूजी केसर री पूठ पै थापी दीधी, केसर तोरण साम्ही भांक हींसी, जाणै केयरी व्हे, 'यो कतरोक ऊंचो है कै वो तो चांद सूरज रा कांगरा ने जाय पूगू ।'

पावूजी तंग ने कस लीधो, पागड़ी रे अलिबंध लगायो, रान जमाय काठा पूठ पै वैठचा ।

ढोली रा छोरा थूं मधरो ढोल बजाय ।

ढोलां के ढमाकै रे म्हारी केसर घोड़ी नाचसी ॥

मधरो मधरो ढोल बाजवा लाग्यो, रमक भमक केसर नाचवा लागी । नाचती नाचती घोड़ी रे पावूजी थापी दीधी, थापी रे थपाकै केसर ऊछळी ।

उछळती गिराई छै सोड़ां रे गढ़ री भींत ।

खुरिया तो रोप्या छै असमानी गढ़ रे कांगरै ॥

तोरण कने जाय केसर आगला पग रोप्या, पावूजी तोरण मारनै नीचै उतरचा तो घोड़ी गढ़ रा कांगरा खुरां रे लारै लेती आई । चांदे अर डामे मूँछां पै हाथ मेल्यो. राठोड़ां री छाती फूलगी, रिसाळू सोड़ा नीचा माथा घाललीघा ।

पावूजी री मलफ देख सोड़ी आख्यां में आजस भरचां साथण्यां साम्ही भांकी तो साथण्यां बळगी, सोड़ी फूलगी । वीर पति रे लारै एक घड़ी रैवा मे जतरो सुख है वो कायर रे लारै आखी उमर रैवा में ही नी ।

चंवरी मंडी, पावूजी मांड़ा में सोढी सूँ हथळेवो जोड़चां आया । वेदी रचगी, जोसी वेदी रो पाट पूररियो, सूरजमल जोड़ा सूँ गठजोड़ो बांध्यो. लुगायां मंगळगीत उगेरचा, सोढा रो सारो परवार भेल्लो व्हीयो वैठयो । वीद बींदणी पाटा पै हथळेवो जोड़चा वैठचा । लाल पोसाक पैरचां सोढी रे हाथी दांत रो नवो नवो चीरचोड़ो चूड़ो, कंकुवरणी कळायं में ओपरियो, फेरा फिरवा ने उठचा, आगै आगै हाथ जुड्योड़ी सोढी धीमा धीमा पगल्या धरती, लारै लारै पावूजी सोढी रो हाथ पकड़चा पैलो फेरो फिरचा ।

लुगायां गायो,

पैलै फेरै जुड़ग्या छै बनड़ा बनड़ी रा जीव ।  
राठोड़ां अर सोढां रा व्हाला सगपण जुड़ग्या ॥

एक फेरो व्हीयो, दूजो फेरो फिरवा लाग्या, लुगायां गायो,

दूजै फेरै दूध नीर ज्यूं मिल्या दियनड़ा रा जीव ।  
सोढां अर राठोड़ां रा गाढ़ा सगपण जुड़ग्या ॥

सोढी री मां रा नैणां में आगंद रा नै मोह रा आंसूं छळछळायग्या । “वेटी पराई व्हेगी, परी जावैला” ईं विचार सूं मां रो काळजो हालगियो । तीजो फेरो फिररिया, केसर टापां पटकै नै माथो घूरानै हींसी, पाबूजी रा कान वठी ने लाग्या, डामो ऊठनै गियो । घोड़ी रस्सी तुडाय दीधी, टापां पटकरी, आंख्यां में आसू भर राख्या, माथो भंभोड़री । ये काई अपसुगण ? घोड़ी ने थापी दे जतरै तो देखै, देवळ चारणी, केस खिड़ायोड़ा रोवती जायरी नै आय हाको कीधो “म्हारी गायां लेग्या ।” डामो पूछै पूछै जतरै तो देवळ, पाबूजी फेरा खाता जठै जाय पूगी, केस तांणती रोवा लागी, “पाबूजी, थां तो अठै सोढी रा हथळेवा में रीझ्यां बैठचा हो वठीनै म्हारी गायां खीची ताण नै लेग्या ।”

सुणताई पाबूजी बागो भड़काय उठचा, हथळेवो बंध्यो लगे जीने खोलतां नजर आया । खळभळाटो मचग्यो । एक पल पैला अगनी ने साक्षी दे पाबूजी जीं हाथ ने आपरै हाथ में भेल्यो हो वीने छोड़ ऊभा व्हेग्या । सोढी मूरती ज्यूं बैठी री वैठी रैंगी । सोढा आंख्यां फाड़ देखता रैग्या ।

पाबूजी केसर साम्हा चाल्या, सोढी ने चेतो आयो वा लाज सरम भूलगी, भूलगी वीरा पीयर रो सारो परवार बैठघो है, जाताथका पाबूजी रा वागा री चाळ पकड़ लीधी, आंख्यां में आंसू भरग्या । कुमळायोड़ा फूल री नाई होठ सूखग्या ।

तीजोड़ा फेरा में जी पाबू किस विध चाल्या छोड़ ।  
आधी तो कुंवारी जी म्हानें आधी ब्यायोड़ी छोड़ दी ॥

पाबूजी पल्लो छुडाणों चावें पण छुडावणी नीं आयो । एक पल सोढी साम्हा भांक्या दूजै पल कूकावती देवळ ने देखी ।

गुनो तो भरियां छां ए सोढी जी म्हे खास ।  
वचनां रा बांध्योड़ा तीजे फेरै उठ चाल्या ॥

आंसूड़ा रळकावती सोढी रा आंसू आपरा रुमाल सूं पूछता पाबूजी कह्यो, “सोढी, म्हानें सीख दो, देवळ ने म्हारा वचन दियोड़ा है । म्हाने जावा दो, नीं जावूला तो म्हारा नाम पै काळग लागैला ।”

सोढी रोवती रोवती बोली,

भेजूं जी पावूजी बावोसा री फौज,  
पकड़ तो मंगवाद्दूँ तड़कै जायळ जींद को ।  
जीमो जी पावूजी वैठ्या जिनवा रा भात,  
चोपड़ पासा खेलो जी म्हारे सूँ रंग मे'ल में ।।

देवळ करळाई, “पावूजी म्हें पै'लां ही कह्यो हो, थां सोढी रा रंगमे'ला में रम जावोला । चारणी री गायां कुण याद करै । नीं चालता व्हो तो नट जावो । म्हंने म्हारी केसर सूंपो । पावूजी, वचन देणो सोरो है, निभावणो घणो दोरो ।” देवळ जवान रा तीर पै तीर छोड़्या ।

पावूजी ने रीस आयगी, नेहभीणां नैणां में रोस भळकवा लाग्यो, हयळेवा री में'दी सूँ भरचोड़ा हाथ तरवार री मूठ पै जाय पड़्या । गठजोड़ा री गांठ खोलनै पावूजी आगै पग दीषा । सोढी गैलो रोकनै आडी ऊभी व्हेगी । आख्यां सूँ आंसूडा कायर मोरड़ी नाई ढळकायरी । हयळेवा री आघी रची में'दी रा भरिया हाथां, बंध्या मोड़, सजोग सूँ पै'ला विजोगणी व्ही सोढी, आषा फेरां में सूँ ऊठ्या मुरजाळा पावू रो गैलो रोकनै ऊभी रैगी । सारो परवार सण्णाटा में आयो चुप ऊभो । ताजता ढोल रुक्या । मन्तर जोसी रा मूंडा में अघूरा रैग्या । वेदी री पावन अगनी बुभगी । सूरजमल सोढा रो मूंडो स्याह पड़्यो । सोढी री कांचळी आंसूडा सूँ आली व्हेगी । साळियां डसूका मरवा लागी ।

पावूजी री नजर सोढी साम्ही, पग देवळ आड़ी नै ।

वारे केसर टापां मारेनै हींस री । देवळ ऊभी माथा रा केस खैचरी । पावूजी उठी नै, करणां करती सोढी साम्हा भांकै तो काळजो कटनै रैजांवै, ब्रठीने चारणी देवी रो रौद्ररूप देखनै रोस सूँ वारो रगत उकळवा लागै ।

“सोढी, ये आंसूडा पूंछलो, रोयनै सीख मत दो, एक रजपूतारणी, रजपूत ने सीख दे ज्यूं म्हंने हँसनै विदा करो । थारा आंसूडा में म्हूं अटक जावूँला तो जुग में म्हारी मूँछां नीची व्हेजावैला, लोग कैवैला पावू सासरिया में मौजां करै, दियोड़ा वचन भूलग्यो, थां कायर री अस्त्री वाजोला । थां मुरजाळा पावू रो हाथ पकड़ियो है, म्हंने म्हारा प्रण पूरा करवा दो, केसर पै काठी मांडवा दो, देवळ री गायां पूठी घेर लावा दो । सोढी, राजी व्हे म्हाने सीख दो ।”

सोढी, परणेतू छापल सूँ आंसूँ पूंछ लीषा, होठां पै मांडारणी हंसी लीयाई, काळजा

पै भाटो खेलनै वा रजपूतारणी ज्यूं वीली “पघारो ।” होठां पै हंसी ही, परण नैणां में दरद रो दरियाव उलळरियो । जीभ “जावो” केयरी ही, परण हिवडो फाटरियो,

चढोजी पावू रणवंका भल गायां री वार ।  
सैनाणी तो दै जावो जी म्हाने थारै हाथ री ॥

सैनाणी ? कांई चीज असी है जो देता जावै ? हथळेवा री दाभी मुगघा ने, फेरां वीचै उठनै भूँभवा ने जातो वीर पति कांई सैनाणी में देवे ? रंग री रात ने रण री रात मे बदल देण्यो, परणेतू मेंदी रा रंग ने रगत रा रंग में घोळण्यो रंग दूल्हो आपरी तीन फेरा खायोड़ी लाडो ने सैनाणी में कांई देवै ? पावूजी बोल्या,

जीवांला तो फेर मिलागा थां सूं सोढी आया ।  
मर जावांला तो लादैला ओठी म्हारा मेंभद मोळिया ॥

“जीवतो रह्यो तो थां सूं आय मिलूँला । मरगियो तो सवार म्हारी पाग लाय थांने सूंपदेला । या सैनाणी है ।”

पावूजी वागो भडकाता चाल्या । सोढी तड़ाछ खाय नीचै पडगी । पावूजी री सासू साळियां आय विलूँमगी ।

पावूजी, म्हारा बाई में ओगुण कांई देख्यो जो थां यूं छोड़ चाल्या ?

पावूजी हाथ जोड़ता बोल्या,

दूघां सरीसी ऊजळी थारी वाई जुग जुग रे मांय  
कोई ओगणियो नहीं थारी वाई में गुण मोकळा ।  
ओगण तो कहीजै जी सासूजी म्हारे मांय  
देवळ तो चारण ने मस्तक वेच्या आपणां ॥

“चांदा, डामा, घोड़ां चढो, देवळ देवी री गायां री वार चालो ।”

पावूजी रो भालो उठ्यो, सोढां री अस्त्रियां पावू रा ईं रूप ने एक टक देखती रैगी  
“अस्यो वींद सोढां री पोळ नी तो कदे आयो नी कदे ही आवै, लावो कागज लावो  
यांरो चित्तर उतारला, अस्यो रूप फेरुं देखण ने नी भिलेला ।”

पावूजी सोढां सूं मुजरा जुहार करिया,

“जीवांगा तो आवांगा म्हे ओजूं सुरंगै सासरै”

केसर री पूठ पै थापी दे सवार व्हीया । सोढी रा गंठजोड़ा री गांठ खोल, वचनं री गांठ में बंध, गायं छुड़ावा चाल्या । साळा साळियां रा प्याला री मनवारां छोड़ तरवारां री मनवारां लेवा चाल्या, रंगभीनो पावू रोसभीनो व्हेग्यो । जीं केसरिया वागा सूं राजकंवरी ने परणी वीज वागा सूं मत्रु री कुंवारी सेना ने परणवा चाल्या । कंवरी ने चंवरी में छोड़ भंवरी री पूठ पै चढ्या ।

प्रथम नेह भीनो महा क्रोध भीनो पछै  
लाभ चमरी समर भोक लागै,  
रायकंवरी वरी जैण वागै रसिक  
वरी घड़ कंवारी तैण वागै ।

चोईस वरसां रा पावू सोढी री सुखसेज माथै नीं, रण सेज में पौढ गिया । गोगाजी ने खबर लागी, खीचियां रा हाथ सूं पावूजी वारां वड़ा भाई वूड़ाजी खेत रंग्या । चांदो अर डामो ही घरी रे लारै कट मर्या ।

गोगाजी भाग्या, आय न देखै लोहियां सूं राता व्हीया रणखेत में लोथां रो ढिगलो पड़्यो है । गायं री रक्षा सारूँ कटकटनै पड़्या भूभारां रै आगै वारो माथो भुक्यो “घन है या खारी खावड़ री घरती जठै अस्या वचनं साटै माथा देण्यां रतन नीपजै । घन कंवळादे माता ने, पावू जस्यो पूत जायो जो हथळेवो छोड़नै रण में भूभवा ने दौड़्यो ।” गोगाजी, पावूजी ने हेरै अंग अंग कटचोड़ो पावू कठै ? लोथां पै लोथां रो ढिगलो पड़्यो, जांरे गळडव्वै तरवारा लटक री’ गैडा री ढालां चळती फिर री, लोहियां सूं भरचोड़। भाला घूळा में पड़्या । घोड़ा असवारां कने पड़्या, चारूँ पग पसारचोड़ा, मूंडा में घूळ भर री । खावड़ री रेत लोहियां सूं लाल व्हेय री । गिरजां रो डार रो डार वैठ्यो, वां मूंछाळां री आंख्यां काढ काढ खाय री । एवड़ छेवड़ डामो चांदो पड़्यो, बीच में खावड़ रो मूरमो पावू पौढ रियो ।

परणेत री कलंगी पडी चमक री । गोगाजी किलंगी देखतां ही पावूजी ने ओळह्या । सात परकम्मा दे वारी माथा री पागड़ी सभाळी, गठजोड़ो नै कलंगी उठाई । बियाव रा कांकडडोरड़ा खोलवा ने हाथ आगे कीघो तो गोगाजी री आंख्यां सूं आंसुवां रा चोसरा छूटग्या । चुगचुगनै पावूजी रा संनाण भेळा कर गांठड़ी वांधी । गोगाजी भाटा री सी छाती कीघां वूड़ाजी री पचरंग पाग उतारी । आंगळी में सूं वींटी काढी । राईका ने वुलाय कह्यो “कोळू भाग जा । अठा रा समाचार दे, ये संनाण यांरी राशियां ने जाय सूंप ।”

राईके मूंगे टोड़ियो पलाण्यो । वसकसनै टोरड़ा रे कामड्यां री मारै । टोड़ियो भाग्यो जावै, मूंडा सूं भाग पड़ रिया । टोरड़ियो दौड़े जो राती भरी रेत रो

भतूळियो उड़तो जावै, रेत रा रंग जिसो ऊंट रो रंग, रंग में रंग मिलग्यो । राईके ऊंट ने अस्यो दवायो के बीने बौभा उड़ता लागै, पग नीचली घरती भागती दीखै ।

बूड़ाजी री गैलीराणी गोखड़ा में बैठी देखै तो ओठी ऊंट भगायां आय रियो । गैलीराणी जाणगी व्हे न व्हे आपणै ही घरै कोई करड़ै काम आयो है ।

अतराक मे तो आय बूड़ाजी री पोळ आगै कुरिया ने जैकायो । गैलीराणी डावड़ी ने कह्यो, “हीड़ागर ! ओठी ने पूछ कठा सूं आयो, काई काम आयो ?”

हीड़ागर भट नीचे उतररी ।

“ओठी ! मन री बात कै ! कठा सूं आयो ? काम काई है बता ।

राईको बोल्यो “मन री वातां दासियां सूं थोड़ी कहीजै, राणी ने नीच भेजो ।”

आडो पडवो तंणाय गैलीराणी नीच उतररी ।

“ओठी ! बोलो, काई समाचार लाया ? कठा सूं आया ?”

“राणीजी ! गोगाजी रो भेज्योड़ो आयो हूं । राठोड़ां रा नै खीचियां रा भगड़ा रा समाचार लायो हूं ।”

“ओठी ! कै कै भट कै, दोई दलां रा समाचार सुणां । कुण हारघा, कुण जीत्या ?

“खांडां री जीत तो खीचियां री व्ही । जस री जीत थांरा देवर पावूजी री व्ही । भूंभारां री देवळी बन में व्हेशी ।”

या कैतां ही भट वीटा री डोर खोल, बूड़ाजी पचरंग पाग गैलीराणी रे मूडागै मेली । वीटा में हाथ घालतां ईं पावूजी री कलगी, काकणडोरड़ा गैलीराणी ने हाथ में भेलाया ।

सैनाण ओळखतां ही गैलीराणी तो पांखड़ा कटी मोरड़ी री नाई कुरळाई ।

“ओठीड़ा ! थूं म्हारो घरम रो भाई है । अमरकोट जा सोढी आपरे वाप री पोळ में बैठी वाट न्हाळ री व्हेला । ओठी, एक पलक देर मत कर । ये सैनाण जाय सोढी ने दे ।”

राणीजी ! ईं ऊंट रे मूंडा में भाग आय रिया है । अमरकोट रो मारग ईं सूं नी कटै । यो गैला में मर जावेला । थां थांरा ओठी ने अठा सूं भेजो ।”

गैलीराणी बोली, “म्हारे कस्या ओठी है अरवै ? म्हारा सवार नै ओठी तो सायब रे लारै, पावूजी रे लारै गिया । म्हारो तो ओठी एक जीवतो नी रियो । भाया ! थूं घरम रो भाई है । वेन रा अटकिया कारज ने कदे ही भाई नटै कै ?”

राईको भट अमरकोट जावा ने त्यार व्हेग्यो । गैलीराणी सोढी रे कागद लिख्यो ।  
 आगती आगती रोवती गी, चार ओळां मांडी,

“थांरा अर म्हारा सूरज चांद छिपग्या । दिनडो छिपग्यो अंधारी रात आयगी ।  
 करमां में वेमाता आंक लिख्या जो टळै नीं । म्हूं सती व्हेयरी हूं । थां ही सती व्हेता  
 व्हो तो भट आयजावो । नीं तो वाप रे घर वैठ्या माळा फेरजो । ”

सूरज ऊगतां ऊगतां राईको अमरकोट पूग्यो ।

फूलमदे सोढी ऊंट दौडतो लगे आवतो देख्यो । सोढी रो काळजो घूजग्यो ।

ओठी तो आवतां ही सोढां री पोळ उतरचो । जुहार मुजरा कीधा ।

“आओ, पगरखी खोलो । जाजम पं वैठो । कठा सूं आय रिया हो ?”

“कौळू सूं आय रियो हूं, सोढीजी रे कनें आयो हूं ।”

“दळां रा समाचार ?”

“जस तो पावूजी जीत्या, खांडे खीची जीत्या”

सोढां रो सगळो साथ फीको पडग्यो । माथा पै सोढां चाळ ओढ लीधी । दासी नै  
 दुलाय नै कह्यो, “ओठी ने फूलमदे कने लेजा ।”

ओठी जायनें देखै, साथण्यां रे वीचें सोढी यूं वैठी जांणें कूजा री डार रे वीचें कूज  
 वच्ची वैठी व्हे । भोळो भोळो मूंडो, हाथां रे कांकण डोरडा वंध्योडा, फेरां में  
 पँरचोडी पोसाक पँर राखी हाथां पगां रे वियाव री में दी मंज्योडी ।

ओठी आगे पग देवें नै पाछा पडै । काळजो वळ रियो, सोढी ने जायनें काईं  
 कैवूला ।

ओठी तो वजर री छाती कर गैलीराणी रो कागद नै पावूजी रा सैनाण सोढी रे  
 आगे कीधा । पावूजी री पाग देखी, सीस री कळंगी ओळखी । कांकणडोरडा ने  
 सोढी उठाय छाती रे लगावा लागी नै तिवाळो खाय नीचें जाय पडी ।

एक घडी सूं सोढी चेत करचो तो थरथर डील कांप रियो । डसूका भर डाड मारी ।  
 आंख्यां सावण भादवो व्हेगी । काठी छाती कर जेठाणी रो कागद वांच्यो । वांचतां  
 ही बोली रथ जुडावो । गैलीराणी वाट देख री है । भट करो । पावूजी कनें भट  
 जाय पूगूं ।

मां रा गळा में वाथ घाल सोढी रोवा लागी । मां री सारी कांचळी आंसुवां सूं  
 भीजगी । मां, वेटी रे माथा पै हाथ फेरें नै दोई कुरळावें । वेटी सासरिये जाय री  
 है । कसी आंख्यां सूं वेटी रो वो रूप देखै ? काईं कैयनें आसीस देवें ? सासरा री  
 सीख वेटी ने काईं देवें ?

मां रे मूंडा में तो जीभ सूखगी । पखाण री मूरती व्हे ज्यूं ऊभी । सोढी रा मूंडा रो दूध ही नी सूख्यो । बेमाता ये आक मांडवा लागी जद वीरी दवात क्यूं नी फूटी । सोढी रोय री, 'मां सांवरण रे मी'ने थां कसी बेटी ने बुलावोला ? कुण थां सूं अवं गळा में गळो घाल मिलेला ? मां कींने अबै था हंस हस छाती रे लगावोला ? कसी बेटी ने सासरा रा समाचार पूछोला ? कीने लाड़ कर घी घाल घाल चूरघो जिमावोला ? श्रीरां रा घर तीजणियां सूं रूपाळा लागैला, मा, थांरा आंगण मे कुण लैरियो ओढ़ फिरैला ?

सोढी ने यूं रोती देखी तो सूरजमल सोढा री करड़ी छाती मेंण री नाईं पिघळगी । बेटी ने छाती रे लगाय डसुका भरवा लाग्या ।

सोढी रोय रोय कंवा लागी, 'बाबाजी, म्हूं तो चाली यो थांरो डायचो म्हारे करम में नी लिख्यो । ये ढोलिया, निवार अठै ही घरचा रैगिया । म्हने था घणा लाड़ लड़ाया, रूस जाती तो हाथ सूं गिरास दे दे जिमाता, गोद मे लेनं खेलावता । थांरी गोद री चिड़ी तो उड़ री है । थां हाथ सूं म्हने सत रो नारेळ दो । म्हूं जावूं ।'

बाप, आखरी बगत माथा पै हाथ मेल्यो, नारेळ भेलायो ।

सोढी बाथ घाल भाईं सूं मिली ।

भोजाईं सूं मिली, 'आखरी मिलणा है अबै ईं जनम मे तो मिलांला नी ।'

एक एक साधण सू भुजा पसार पसार मिली, 'अबकें बिछड़ियां फेर नीं मिलांला । थां म्हारे आंगणै रमवा ने मत आवजो, नी तो म्हारी मां याद करकर ऊभी रोवैला ।' सगळा सूं मिल राम राम कर सोढी रथ पै चढी ।

डायचा में देवा ने रथ ब्रणायो जींरी लाल भूल बैलियां ऊपर सूं उतार घोळी भूल घाली । बळदां रीं लाल रंग री सींगोटी परी उतारी गळा रा घूघरा खोल लीघा ।

पूरी वीनणी नी वणी जठा पैली सती व्हेवा ने सोढीजी सासरें चाल्या ।

कोळू में आया । दोई देराणी जेठाणी गळा में गळो घाल रोईं जांणै काचो माट फूटियो । गेलीराणी रोवा लागी, 'आज घरें वीनणी आई । करम फूटिया नी व्हेता तो सोढी रा कोड करती, चांबळ भात रांध दोई देराणी जेठाणी भेळें जीमती । वधायनं घर में लेवती । आज म्हारा घर में जगाजोत लागगी व्हेती ।'

सोढी बोली, 'म्हने पावूजी रा मेल तो दिखावो ।'

गेलीराणी, सोढी ने ले पावूजी रा सूना माळिया में आया ।

“सोढीजी, अठै थारा स्याम रैवता वा वारी वैठवा री जगां, अठै चांदो अर डामो वैठता । यो कमवजिया रो भालो पड़यो । वारा हाथ में भालो रियो जतरै कोई जूंकारो नीं कीवो । यो गोखड़ो अठै पावूजी वैठता ।”

सोढी वैठक री रज लेनै माथा रे लगाई । गोखड़ा ने सलाम कीधी । भाला ने उठाय छाती रे लगायो ।

“भाला, थारो खोटो भाग । थनें वावणिया अठै खूणा में छोड़ परा गया । गोखड़ा में अबै कदूतरा बूँवाळा घालेला ।”

सोढी डसूका भर पावूजी री एक एक चीज देखवा लागी, यां मे'लां री सोभा म्हारा मन ने वाळ दीवो, अबै तन ने अगनी वाळेला । 'पोळघा, रंग रो डावो भट ला । पोळ पै छापो लगावू' । पोळिये संदूर में रंग घोळनै लायो । सोढी संदूर में हाथ भर पोळ रे माथै हाथ र छापा लगाया । सती व्हेवा ने थार व्हेगिया । देराणी जेठारणी, नेखचख सूं भिणगर कर लीला घोड़ा पै सवार व्ही ।

आगँ आगँ होल वाजता जाय रिया, पाछै वसती रा लोगां रा “हर हर” रा जंकारा सूं गगन गूँज गियो । घोड़ा रोक सतियां नीचै ऊतरी । रेसम डोर लगाय कुआं सूं पाणी खैच्यो । कपड़ा पैरियां सूवां ही छळखळ पाणी कूढनै सतियां सनान कीवो । सतियां माथां पै गंगाजळ री भारी रा मूंडा खोल दीघा । जो घन माल हौ सगळो वामणां ने पुन्न कर दीवो । चारण पावूजी री दीरता रो वखाण कीवो, जाने घोवा भर भर सोना रो गहणो देय दीवो ।

चन्नण नै नारेळां री चिण्योड़ी चिता में दोई सतियां वैठगी ।

## रजपूतारणी

रेत रा टीवा बळरिया । ऊनी ऊनी लू असी चाल री जो कानां रा केशां ने बाळती नीतर जावै । नीचै धरती तपरी, ऊंचो अकास बळरियो । खेजडा री छाया में वैठ्यो सोढो जवान भीतर सूनं अर वाहर सूनं दोनूं कानी सूनं दाभ रियो । वारला ताप सूनं वत्ती हिया में सळगती होळी री भाळां वाळ री । दुपैरी रा सूरज री सूधी मूंडा साम्हीं किरणां आंल्यां में गवोडा पाड़ री पण वीने ईं री चुष नीं । वो तो ऊंडा विचार में अस्यो डूवरियो के चारुं दिसा एक सी लाग री । आज वीरे होवण वाळा सासरा नूनं सुसरा रो सनेसो ले आदमी आयो,

“परणणो व्हे तो पनरासी रिपिया तीन दिनां में आय गिया जावो, नीं तो आखा तीज ने थांरी मांग रो दूजा रे सारै वियाव करवांला ।”

“सुणतां ही सोढा जवान री आंल्यां में भाळां उठी । अपराय आप ही हाय तरवार री मूठ पै पड़ग्यो । दांता सूनं होठां ने काट रैग्यो । वीं री मांग दूतरा री होजासी, जीरी खोळ वीरी मां रिपियो नारेळ घाल आज सूनं दस वरसां पैलां भरी अर वारो वियाव कर देणै रा मनसूवा करतां करतां मां वाप दोई मरग्या । घर में नैनपण पड़गी । कुण खेती वड्डी, गाय भैस सन्हाळतो । अबै पनरासी रिपिया कठा नूनं लावै ? “ए रिपिया दीघां विना वीरी मांग दूतरा री होजासी, जीरा सपना दस दस वरसां सूनं वो देखतो आयो, वी मांग ईंज आखा तीज ने दूजा रे सारै कर देला ।”

सोढा जवान री आंल्यां में खून उतर आयो । आज तक कदे ही असी व्ही है मांग रे वास्ते तो मायग कट जावै, म्हुं जीवतो फिरुं अर म्हारी मांग ने दूजो परराय, हरगिज नीं, हरगिज नीं ।

“बोहरा काका, म्हारी लाज यारे हाथां है ।”

“लाज तो म्हे घणी ही राखी है । थूं वता कस्या खेतां पै पनरासी गिया दूं ? अडारणै कांई राखैला ?

“म्हारे कने है ही काई ? रजपूत री आवरू एक तरवार रो खांपो म्हारे कने वच्यो है ।”

“तो भाई, कीं दूजा वोहरा रो वारणी देख ।”

सोढो तड़फग्यो । देख काका, ये म्हारा घर री सळी सळी, म्हारा नैनपण में भूठा सांचा खत मांड मांड लेय लीघी । म्हारा घर में ठीकरो तक नीं छोड़्यो । म्हे थनें सारो दीघो, अर जो ही मांगतो व्हे देवण त्यार हूं । पण ईं वगत म्हारी, म्हारा घराणां री लाज राखलै । जींरी मांग दूजा रे लारै परी जावै वो जीवतो ही मरधां वरावर है । ईं तरवार, जगदम्बा ने माथै मेल सोगन खावूं थारो पीसो पीसो दूध सूं घोयनै चुकावूं । थारे दाय आवै जतरं व्याज मांडलै । ईं वेळां म्हने रिपिया गिरा दे ।

“रजपूत रो जायो व्हे तो ये अस्या कोल करजे । म्हूं खत पै जो माड दूं वीं पै थूं दसगत कर देवैला कै ?

“मायो चावै तो दे दूं पण अवार म्हारी लाज राखलै ।”

वाणिये खत माड'र आगो कीघो । कान पै मेली लगी कलम ने उठाय हाथ में भेलाई ।

“वांचलै खत ने, छाती व्हे अर असल रजपूत व्हे तो दसगत करजे ।”

खत वांच्यो, मांड राख्यो “ये रिपिया व्याज सूधी नीं चुकावूं जतरं म्हारी परणी लगी ने वेन ज्युं समभूंला ।”

होटां ने दांता वीचं दवाय, राती राती भाळां निकळती आंख्यां सूं भांकतो दसगत कर दीघा ।

वरधां सूं सोढा रो सूनो घर आज वस्यो । आज वींरी मेडीं में दीवो वळ्यो । दीमकां लाग्यो, लेवड़ा पड़यो घर, लींप्यो चूंप्यो हंस रियो । घणा वरसां पछै आज वीरि घर में घूघरां री छम छम व्ही । पीयर सूं डायजा में आयोडा गाडो मरचा असवाव सूं गिरस्थी जमाई । सोढो जांमवा वंठ्यो, वीनणी हाथ सूं पोयोडी चीडां री वींभणी ले पवन धालवा लागी । दांत रो चूडो पैरचां हाथां सूं परूस री । सारो घर आज काई रो काई सोढा ने लाग रियो । रजपूतानी री आंख्यां में नेह उभळ रियो पण सोढा री आंख्यां गम्भीर । वा परूसती री यो जीमतो रियो । सोढो वोलणो चावै पण वोलणो आवै नीं वा तो आगै व्हे वोलै ही किरण तरह ? खाय, चळू करण लागो, रजपूतानी भट ऊठ लोटा सूं हायां पै पाणी कूढवा लागी, सोढा री नजर घूंघटा में पसीना री वूंदा सूं चमकता मूंडा पै पडो, वींरी आंख्यां रे

आगै वाणिया रो खत भाटा री चट्टान ज्यूं आय ऊभो व्हेग्यो, वीरा हाथ कांपग्या । लोटा सूं पड़ती पाणी री धार जमीं पै पड़ बैयगी । रात पड़ी, सोरौ री वेळा आई । सासरा सूं आयोड़ा ढोल्या पै सूता । भट म्यान सूं तरवार काढ़ दोय जरां रे बीच में मेल, मूंडो फेर सोयग्यो ।

रजपूताणी सहमगी । “थूं क्यूं, म्हारा सूं काई नाराज है ?”

एक, दो, तीन, दस पनरा रातां बीतगी । या हीज तरवार काळी नागरा ज्यूं रोज दोवां रे बीचै । दिन में बोलै, बात करै जद तो जाणै सोढा रे मूंडा सूं अमरत भरै, आख्या सूं नेह टपकै पण रात पड़तां ही बीज मूंडा सूं एक बोल नीं निकळै वे हीज आख्यांसांम्ही तक नी भांकै । रात भर अतरा नजीक रैवता थकां ही घणां दूरा । दिन मे घणां दूरा रैवतां थकां ही घणां नजीक ।

रजपूताणी वारीकी सूं सोढा रो ढंग देखै गैराई सूं सोचै । बी सूं रियो नी गियो । ज्यूं ही तरवार काढ़ ढोल्या पै सोवा लाग्यो, भुक पग पकड़ लीघा ।

“म्हारो काई दोस है ? म्हारा पै नाराज क्यूं ? गलती कीधी तो म्हारा मा बाप जो थाने रिपिया सारूं फोड़ा पाड़्या ।” टळ टळ करता आंसू सोढा रे पगां पै जाय पड़्या ।

“कुण कै म्हूं थारा पै नाराज हूं । थूं म्हारी, म्हारा घर री धणियाणी है ।” आपरा हाथ सूं वीरा हाथा ने पगां सूं दूरा करतो सोढो बोल्यो ।

“तो अतरा नजीक रैवतां लगां, म्हासूं अतरा दूरा क्यूं ?” सोढा रे ललाट पै दो सळ पड़ग्या ।

“थूं जाणणो ही चावै ?”

“हां ।”

“तो ले वांच ई खत ने ।”

दीवा री वाती ऊची कर टमटम करता दीवा रा चानणां मे खत वांचवा लागी ।

ज्यूं वांचती गी ज्यूं ज्यूं वीरा मूंडा पै जोत सी जागती गी । आजस अर संतोस सूं वीरो मूंडो चमकवा लाग्यो । खत भेलाती लगी, वेफिक्री री सांस लेती बोली “ई री कोई चिंता नी, म्हेने तो डर हो थारी नाराजगी रो । वरत पाळणो तो घणो सोरो ।”

दिन ऊगतां ही आपरो छोटोमोटो गैणोगांठों, माल असबाब रो ढिगलो सोढा रे मूंडा आगै जाय कीघो,

“ई ने वेच घोड़ा लावो, करजो उतारणो सवसूं पैलो घूम है। घरै बैठ्या तो करसा चोखा लागै। रजपूत चाकरी सूं सोभा देवै। कोई राजा री जाय चाकरी करां।”

“थनें पीयर छोड़ दूं ? थूं कठै रवेला ?”

“पीयर क्यूं ? जठै थां वठै म्हूं, दो घोड़ा ले आवो।”

“परण, परण थूं साथे निभेला कस्यां ?”

“क्यूं नीं, म्हूं किसी रजपूत री जायोड़ी नीं कै, रजपूताणी रा चूंख्या नीं कै ? म्हंने ही थारी नाई तरवार बांधणो आवै, म्हे ही म्हारा बाप रा घोड़ा दौड़ाया है।”

“थारो मन, सोचले।”

“सोच्योड़ी है।”

तेज सूं चमकतो मूंडो सोढो देखतो रैग्यो।

सवा हाथ सूरज आकास में ऊंचो चढ्या व्हेगा। चित्तोड़ री तल्लेटी सूं कोस दो एक पै दो घोड़ा एकीवेकी करता चित्तोड़ साम्हा जाय रिया। दोई जवान सवार एक सी उमर एक सी पोसाक पैरचां, घोड़ां ने रानां नीचै दवायां दौड़ायां जाय रिया।

हाथ रा भाला, ऊगता सूरज री किरणां सूं चमक चमक कर रिया। कमर में बंधी तरवारां घोड़ा रे दौड़वा रे साथै साथै रगड़ा खाय री। बां ने देख कुण केवै के यां में एक स्त्री है। रजपूताणी ईं वगत एक सूरापण भर्या जवान सी लाग री। दांत री चूड़ो पैरचां कंवळी कळायां नी री। मजवूत हाथ भाला ने गाढो पकड़चां लगां। लाजती लाजती धीरै धीरै कोयल री सी बोली री जगां अरवै मेरी रो सो कण्ठ सुर वराय लीघो। घूंघटा में ही सरम सूं लाल लाल पड़जावा वाळा कपोल नीं रिया। सूरज री किरणां री नाई मूंडा सूं तेज फूट रियो। लाली लीधां लोयणां सूं नेहचो ऊफण रियो। जाणै सागी डुरगा रो सरूप व्हे।

घोड़ा दौड़ता, एक भपाटा में चित्तोड़ री तल्लेटी में जाय पूग्या। वठी ने राणाजी दरवाजा वारे निकल्ल्या। नजर सूधी वारा पै पड़ी, दो पल वी जोड़ी पै नजर रुकगी घोड़ा री लगाम खैच पूछ्यो,

“कस्या रजपूत ?”

“सोढा।”

“अठी किसतरै आया ?”

“सेर वाजरी सारूं, अन्नदाता।”

“सिकार में साथै हाजर व्हेजावो ।”

मूजरो कर दोई जवानां घोड़ां री बाग मोड़, लारै घोड़ा कीघा ।

सूरां रे लारै घुड़दौड़ व्ही । आगै आगै सूर भागरियो वारे लारै हाथ में भाला लीघाँ सिरदार घोड़ां ने नटाटूट फँकरिया । एकल सूर दूँड री मारतो विकराळ रूप करचां घोड़ां रा घेरा ने चीरतो वारै निकल्चो । चारूँ कानी हाको व्हीयो, एकल गियो, गियो, जावा नीं पावै, मारो मारो ।”

सगळा ही घोड़ां री रासां एकल कानी मुड़ी, जतराक मे तो एक घोडो बीजळी री नाईं आगै आयो, सवार भाला रो वार कीघो जो पेट ने फाड़तो, आंतड़ा रो ढिगलो करतो आर पार जाय निकल्चो । राणाजी दूरां सूं देखतां ही सावासी दीघी ।

पसीनो पूँछतो लगे सवार नीचें उतर मुजरो कर घोड़ा री पूठ पै पाछो जाय बैठयो । कुण सोच सकै के भाला रा एक हाथ में एकल सूर ने घूळ भेळै करवा वाळी लुगाई है ।

राणाजी राजी व्हे हुकम दीघो “थे वीर हो, आज सूं थां दोई भाई म्हारा ढोल्या रा पैरा री चाकरी दो ।”

खम्मा अन्दाता कर चाकरी भेली ।

सावण रो मीनों, खळ खळ करता खाल बैय रिया । तळाव चादर डाक रिया । डेडका हाका कर रिया । एक तो अंधारो पख, ऊपरै चौमासा री काळी रात, काळा काळा बादळा छा़य रिया । बीजां सळाका लेवै तों असी के आख्यां मिच जावै, खोल्यां खुलै नीं । इन्दर गाजै तो अस्यो के जाणै परथी ने ही पीस दूँ । अंधारी भयावणी रात हाथ सूं हाथ नी सूभै । राणाजी तो पोढ्या, दोई रजपूत पैरो देवै ।

हाथ में नांगी तरवारां लेय राखी । बीजळी चमकै जो यांरी नांगी तरवारां वीं चमक में भलमल करै । आधी रात रो वगत, राणाजी ने तो नींद आयगी परण राणी री आख्यां में नींद नीं । सूती सूती कुदरत रा रूप रा अदभुद मेळ देख री ।

दोई रजपूत तरवारां काढ्यां मेलां रे वारणा आगै ऊभा ।

उत्तर में बीजळी चमकी रजपूतारणी ने याद आई म्हारा देस कानी चमक री है । ईं याद रे लारै केई वातां याद आयगी । आज कमावा खातर यो मरदानो भेस करचां विदेस में आधी रात पैरो देयरी हूँ ।

दूजी अस्त्रियां घरां में आडा वन्द कर सोय री है। म्हुं नांगी तरवार लीवां ऊभी ऊभी रातां काटूं। अतराक में कने ही पपैयो वोल्यो “पी पी”। नारी हिरदे री दुखळता जागी। “पी कठै ? घरणोई खने है पण कांई व्हे ? म्हारी गिणती नीं तो संजोगण में है, नीं विजोगण में। म्हांसूं तो चकवा चकवी चोखा जो दूरा दूरा बैठ वियोग काढें। म्हुं तो रात दिन साथै रैवती लगी ही विजोगण सूं भूंडी।” वीरो वांघ टूट गियो। जाय’र सोढा रा कांधा पै हाथ मेल्यो, जाणै बीजळी पडी व्हे। दोई जणां कांपग्या। सोढो चेल्यो, “चेतो कर रजपूतारणी।” रजपूतारणी सम्हळी। एक निसासो न्हांकती बोली,

देस विया घर पारका, पिय वांघव रे भेस।

जिण दिन जास्यां देस में, वांघव पीव करेस ॥

देस छुटग्यो, परदेस में हां। पति है वो भाई रा रूप में है। कदे ही देस में जावांला जद ईं ने पति बणांवाला।

राणी सूती सूती या लीला देख री। दिन ऊगतां ही राणी राणाजी ने कह्यो, “यां सोढा भाइयां बीचै तो कोई भेद है।”

“क्यूं कांई बात है ? माथो तोड़ दूं ?”

“तोड़णै री नीं जोड़णै री बात है। यां में एक लुगाई है।”

“राणी भोळी बात मत करो। या सूरता, यो आंख रो तौर, या मरदानगी, लुगाई में व्हे कदी ?”

“आप मानो भले ही मत मानो। यां में एक लुगाई है अर कोई आफत में है।”

“यां रो पतो कस्यां लगावां ?”

“ईं री परीक्षा म्हुं कहूं। आप मे’लां में विराज जावो, जाळी, में सूं भांकता रीजो वां दोई भाइयां ने बुलावूं।”

चूल्हा पै दूध चढाय दीघो, डावड़ी ने इसारो कीघो, वा वारै निकळगी। दूध उफणतो देख्यो तो रजपूतारणी हाको कर दीघो, “दूध उफणै दूध उफणै।” सोढो आंख रो इसारो करै जतरै तो राणीजी वारै निकळ पूछघो, “वेटी, सांच वता थूं कुण है। म्हारा सूं छिपा मती।” रजपूतारणी आंख्यां आणै हाथ दे राणीजी री छाती में मूंडो घाल दीघो।

सोठे सारी ब्रात सुगाई । राणीजी बर्णा राजी व्हीया ।

“यांरा करजा रा रिपिया व्याज मूत्रां म्हूं सांडणी सवार रे सायै थारे गांव मेई ।  
थां अठै रैवो गिरस्थी बसाओ ।”

सोठे हाथ जोड़्या “अन्नदाता रो हुकम माया पै परण जठा ताई म्हूं जाय न्हारा  
हाथ सुं रिण चुकाय खत फाड़ तीं न्हांकू जतरं हुकम रो तानील क्रियां व्हं । न्हाने  
सीख बगसावो ।”

राणाजी करजा रा रिपिया अर गिरस्थी बसाणुं रो बर्णा सारो सामान दे बाने  
सीख दीवी ।

वीं पड़वा रो रात रा आखंड रो विचार ही कतरां मीठो है ।

## पिउसंधी

“या अल्ला !” पीड़ा सूं टसकतै वूढै बिलोच करूंट फेरी ।

कनें ही वैठचोड़ी बेटी श्लेरो देवा ने हाथ आगो कीधो । बाप री लांबी चोड़ी देह साम्ही देखवा लागी । बिलूचिस्तान सूं आयोड़ा बिलोचियां रो सरदार कांगड़ो माचा पै पड़चो मौत सूं लड़ रियो, जमराज रा दूत लेजाण ने खैच रिया । बरस चवदा पनराक री पिउसंधी सिराणै ऊभी बाप री पीड़ा देख छटपटाय री । सारी ऊमर घोड़ा री पूठ माथै घर बसावणियो बिलोच प्राणां ने कंठा में अटकाय राख्या । वा पीड़ा ही सिकारपुर रा पठाणां सूं व्हीयोड़ी हार । वीं वेइज्जती रो बदलो लेण ने पठाणां री घोड़्यां खोस ले आवा री घणी कोसीस कीधी परा जतरी दांण गियो, नाक रगड़तो, खाली हाथां पाछो फिरणो पड़चो । पिउसंधी वीर मन रा दुख ने देख री, बाप रा माथा पै हाथ फेरती बोली, “तुस्सांभे जीव नूं चैण रक्ख ।”

कांगड़ो बिलोच, घणी पीड़ा अर निरासा रा आंसू भरचां बोल्यो,

“अस्सांभे पुत्तर नीं, पुत्तर होय तो सिकारपुर पठाणां दी घोड़ी ल्यावै ।”

वेटो नीं जो घोड़्यां लाय बाप रो बैर ले, ईं दुख सूं बाप रो जीव नीं निकळ रियो है । पिउसंधी रा बिलोच रगत मे सरणाटो आयग्यो, लोही दौड़ग्यो । बाप रे साम्हे छाती तांणती बोली,

“मैड़ा बोल सच्चा जांणै, जै तुस्सांभी पुत्तरी हूं तो घोड़ी ल्यादूं ।”

बूढा बाप रे कानां में जाणै अमरत बरस्यो ।

“तो ला पंजा दे ।” हाथ लांबो पसारियो ।

पिनसंधी हाथ पै हाथ राख बचउ दीधो । सन्तोख री सांस रे सागै बिलोच रा प्राण उड़ग्या ।

पिउसंधी माथा रा केसां रो जटाजूट बांध्यो, माथै लपेटो बांध्यो । बाप रा घोड़ा पै जीण कस्यो । बाप रो तीर कवांण संभाळ्यो । बिलोच जवानां रे लारै सस्तर विद्या सीखै । रोज घोड़ो दौड़ावै । सारो दिन कवांण पै तीर चलावै, रात पड़्या विद्याणां पै सूती २ सपना देखै तो पठाणां पै तीर फँकवा रा । खावतां, पीवतां, उठतां, बैठतां तीर अर कवांण । ग्यान ध्यान सगळो तीर कवांण ! वा भूलगी के वा एक सोळा बरसां री सु दरी है । वीने चेतो ही नीं रियो के मिनख जाति रा अस्त्री अर पुरम दो भेद है । वा सोचती के वा कांगड़ा बिलोच रो बेटो है, वीरो मन कैवतो, वा बेटो है, आत्मा हूँकारो भरती वा बेटो है, दुनियां कैवती अर जांणती के या कांगड़ा बिलोच रो बेटो है ।

बाप री पोसाक पैरघां, बाप रा ही सस्तर बांध्यां, बाप रा घोड़ा पै सवार व्हे निकळती जद लोगां री अंख्यां वीरा मूंडा पै एक पल तो अटक ही जाती । नित री कसरत सूं कस्योड़ो सरीर, सूरज री किरणां री नाईं फूटतो मूंडा ऊपरै तेज । देखवा वाळा देखता रै जाता । बूढां रा मूंडा सूं निकळ जातो “कोई जवान है ।” जवानां री नजर वी सूं हट आपणै सरीर माथै बराबरी करण ने अपणै आप परी जाती अर दूजै ही पल पलकां भुक जाती । मांवां देखती तो एक अभलाखा मन में आय जाती, “म्हारो बेटो ही अस्यो व्हे ।” जवान स्त्रियां अपणै पति रा मन में मांड्या चित्तर में ईंरो रंग घोळवा लागती ।

पिउसंधी बिलोच जवानां रे सागै तीर चलाणै रो अभ्यास करती जद मजाल काई के कोई ईं रा मुकाबला में आय तो जावै ।

कान तांई खैच'र तीर छोड़ती जद हजार पांवडा दूरो जाय निसाणो लागतो ।

दाना बूढा दाद देता, “ईं रां बाप रो तीर पांचसो पांवडा पूगतो थो हजार पांवडा दूरा री खबर ले ।”

सांभ रो वगत, सूरज भगवान आपरी किरणां ने भेली कर घरै पधार रिया । आखा दिन डाळी डाळी फदक नाच'र पंछी घरां साम्हां मूंडा कीधा । सूरज री किरणां सूं सुनैरी रंग्योड़ी पांखां पसारघां लीला आभा रे नीचै उड़ रिया । घूसाळा में सूं छोटा छोटा मूंडा काढघां वच्चा मांवां रे आणै री “चूँ चूँ” करता बाट न्हाळ रिया ।

रेत रा टीवां रे ढाळ में, छोटी सी तळाई पै एक जुवान बैठयो, पाणी में भांकतो काई सोच रियो । कनें ही एक मोटो हिरण मरचो पड़यो, वीरी गावड़ में धंस्योड़ा तीर कनें सूं टपकती लोही री बूदां वताय री के अवार अवार ही सिकार कीधी

है। खेजड़ रे गोड़ सू वंध्यो घोड़ो हींस रियो, तीरां सू भरचो माथो जीण रा सिघाड़ा में लटक रियो।

टीवां रे पाछली कानी, मिनखां रे बोलणै री, घोड़ां रे टापां री आवाज सुण जवान ऊंचो माथो कीवो। टीवा रे ऊपरै ऊभो एक आदमी हाथ सू आणै रो इसारो करतां आपरा साथ बाळां ने हेलो मारचो, “तळाई में पाणी है, आय जावो।”

घोड़ी ही देर में, कतरा ही तिसाया घोड़ां रा मूंडा पाणी सू जाय लागा। आयोड़ा घोड़ा घोड़्या ने देख वीं जवान रो घोड़ो ऊंचो मूंडो कर जोर सू हींसवा लाग्यो। आयोड़ा मिनख डोढी डोढी आख्यां सू वीं जवान साम्हां देखै, मन में केवै, रूप अर तेज रो अस्यो मेळ देखणै में नीं आयो, ईं सूरज री किरणां तो डूब री है अर ईं रा मूंडा सू किरणां फूट री है। कुण व्हेला यो। एक सवार सू रियो नीं गियो, जाणै कोई सगती वींने खैच'र वठै लेजाय री व्हे। घोड़ा सू उतर वीरे कानी चाल्यो।

“काळेर तो ठाढो है, कठै मिल्यो?” सिकार करचोड़ा हिरण रे कानी भांकतै, सवार पूछ्यो।

“अगला ताल में। आओ वँठो विश्राम करो।”

या ही तो चावतो वो। सवार वँठ्यो, जवान सरक'र विछयोड़ा जीण पै आधी जगां सवार ने दीवी। बातां व्हेण लागी। आपणी आपणी ओळखांण कराई।

“म्हंने भीमजी भाटी केवै, पाटण गांव रो हूं।”

“म्हूं कांगड़ा बिलोच रो वेतो।”

“आप तो सिघ रा रैवासी हो, अठी ने कियां आया?”

“सिकारपुर जाणै रो मनसूवो है।”

“सिकारपुर जाणै रा मता सू तो म्हे ही आया हां। पठाणां री घोड्यां रो नाम तो आप ही सुण्यो व्हेला।”

“सुण्यो कांई वारी खातर तो अतरा दूरां सू चाल'र आयो ही हूं।”

“आछो! घरणो आछो!” भीमजी राजी व्हेयो। आछो साथ व्हीयो। म्हारे साथ तीन सौ रतपूत है। आपरे साथ कतरोक साथ है?”

पिउसंवी भीमजी साम्ही मुळकती बोली, “म्हारा साथी तो म्हां हीज हां।”

कंथा रण में पेंसकै, कांई जोवै छै साथ ।  
साथी थारा तीन है, हियो, कटारी, हाथ ॥

ठाकरां ! म्हारा तो ये हीज तीन साथी है । तीन सौ कोनी ।”

भीमजी राजी राजी, साथ वाळां नें वठै हीज ठैर जाणै रो कह्यो । एक आदमी ने भेज्यो सिकारपुर पठाणां री घोड़्यां चरवा ने कठी ने जावै जीरो पतो लगायने आवै ज्यूं ।

खबर लाया, घोड़्यां बीड में चर री है, दस वारा आदमी रुखाळी में साथै है । ये गिया जो घोड़्यां ने घेरी, जो आदमी साम्हो व्हीयो बीरे माथा में मारी । रुखाळा भाग'र गांव मे जाय हाको कीघो, पठाण तीर कवांण ले घोड़ा पै सवार लारै रा लारै भाग्या । घोड़ां रा खुरां सूं उडी खेह रो बादलो छायग्यो । भीमजी कह्यो, “पठाण आयग्या है भट भागो ।”

“कोरा भाग्यां काम नी चालै, भीमजी, थां आवतां पठाणां ने रोको । एक काम थांरो, एक काम म्हारो । कै तो रुकनै पठाणां ने रोको, कै घोड़्यां घेर आगै बढो । वोलो भट ।” विलोच जवान दाकल कीधी । घोड़्यां घणी है, म्हां ले'र आगे बढ़ां, थां याने रोको ।”

“घणी आछी बात । याने एक पग आगै नीं देवा दूं, थां धीरै धीरै खड़ो, पाछलो सोच ही मत करजो ।”

भीमजी अर वारा तीनसौ ही साथी घोड़्या घेर आगै बढ़्या । पिउसंधी कवांण पै तीर चढ़ाय, मारग में ऊभी व्हेगी । पठाणा रो भुण्ड, दांता सूं होठ चावतो, भाळ मे भरघो, घोड़ा दपटातो आयो ।

“ठैर जावो, वठै रा वठै, आगै पग दीघो तो मारघा जावोला । जीरी ग्यारासौ पावडा तीर फैंकवां री हिम्मत व्हे जो आगै आवजो ।”

लारै रो लारै तरण करतो तीर गियो । हजार पांवडा पै ऊभा एक पठाण री छाती में जाय गळ्यो । पठाणा रा आगै बढता घोड़ा घीमा पड़ग्या । पठाण तारा तारा तीर फैंकै जो कीरो ही तीनसो पांवडा पै पड़ै तो कीरो ही साढा तीनसो पावडा पै, हद जो एक दो जणां रो चारसो पावडा तक पूग्यो । पिउसंधी पागड़ा पै पग दे ऊभी व्हे'र तीर फैंकै जो हजार पांवडा दूरां ऊभा पठाणां रा जत्था में जाय जवानां ने बीधै । छाती वाळा दस बीस जणां, घोड़ा दौड़ायां आगै बढणो चाहा पण गैला रा गैला में हीज पिउसंधी रा तीर वाने अर वारा घोड़ां ने ठिकारै राख दाधा । एक रो ही तीर पिउसंधी तक पूग्यो नीं ।

पठाए ढीला पड़ पाछा फिरचा, पिउसंधी पाछै फिर फिर देखती जावै, घोड़्यां रे खोजां खोजां चाली ।

“वाह ! विलोच वाह !! कमाल करग्यो भाईड़ा आज ।”

“कमाल वमाल कुछ नी, भीमजी । लाओ घोड़्यां री पांती करां, आधी धांरी आधी म्हारी ।”

“या क्रिया होवै ? आधी धांरी अर आधी म्हारी क्यूं ? थां एक म्हां अतरा ।” भीमजी रा साथ बाळा खळभळिया ।

“आधी क्यूं नीं ? आधो काम थां सगळा मिल'र कीधो, आधो काम म्हें एकलै कीधो । थां घोड़्यां घेरी, म्हें पठाणां ने रोख्या ।”

“या नीं व्हे, जतरा मूंडका वतरी पांती ।”

पिउसंधी ने आई रीस, कवांण पै तीर चढायो “आय जावो सामने, जो जीतं वींरी घोड़्यां, सणण सणण करता दो तीनेक तीर खेजड़ा रा गोड ने आर पार करता निकळग्या । एक री छ्याती नीं चाली आगै आवा री । भीमजी घोड़ां री आधी पांती कीधी । एक सांड घोड़ो वत्तो । भाट्यां पाछो रगड़ो कीधो “थो तो म्हे ले जावांला ।”

पिउसंधी तो काढ तरवार वीं सांड घोड़ा रे कमर में भाटकी जो दो बटका । आपरी पांती री आधो आध घोड़्यां घेर वढी, पांवडा पचासेक तो गी अर पाछी फिरी । “भीमजी, लो ये घोड़्यां थां ही राखो । म्हारे कांई करणो । लेगी ही जो ले लीधी, अवे थाने दीधी ।”

या कैतांई पिउसंधी तो घोड़ा रे एड लगाई, घोड़ो वायरा सूं वातां करवा लाग्यो । साथ बाळा देखता ही रैग्या ।

भीमजी साथ बाळा ने समभाया, “थां खोटी कीधी जो ईं विलोच ने नाराज कर दीधो । म्हूं जावूं ईं ने राजी करूं । अस्यो वादर आडी वगत काम आवै । अस्यां सूरमा सूं बणांया राखणी चावै ।”

भीमजी लारै, खोज देखतो चलयो जावै । एक वावड़ी गैला में आई । कांई मन में आई जा भींत री कोचर में सूं भांक्यो । देखै तो ऊपरलो सांस ऊपरै, नीचै रो नीचै रैग्यो । विलोच जवान री जगां एक सुन्दरी पाणी में डील रगड़ न्हाय री, कर्ने पगत्या पै विलोच रा मर्दाना कपड़ा, तीर कवांण पड़्या । अतरा दिनां सूं आज एकांत जगां देख, पिउसंधी कपड़ा उतार न्हावण वैठी । कमर कमर तांई लटकता कैसा रे मांयने सोना रो सो सरीर चमक रियो । भीमजी री छ्याती नी पड़ी के ईंने

बतलावै, पाछा पगां फिरयो, सौ पांवडा दूरा जाय, खेंखारा करतो खांसतो खांसतो बावड़ी कानी आयो । अतरा में तो पिउसंधी कपड़ा पैर कबांण नै हाथ में नचावती बारै निकळ ही गी । भीमजी आख्यां में रस भरचा मुळकता लगा कहयो,

“नाराज क्युं बैग्या ? घोड़ा ही हाजर म्हूं ही हाजर । चालो गांव चालो, थां हुकम दो म्हां चाकरी करां ।” डोढी डोढी आख्यां करधां, मधरो मधरो मुळकतो, हाथ पकड़तो बोल्यो, “चालो ।”

“सांच साच कैदो, भीमजी, थां थोड़ी देर पैलां बावड़ी में आया हा काई ?”

“चाहे मारो चाहे जिवावो, या तरवार लो यो म्हारो माथो । जीवणों तो थारि साथै साथै, मरणो तो थारि हाथ सूं ।” भीमजी आपरी तरवार काढ पिउसंधी रे हाथ में भेलाण लाग्यो । “थांरा हाथ सूं तो मरणो ही भीठो ।”

तरवार ने अळगी करती पिउसंधी कहयो,

“म्हूं बिलोच मुसलमान, थां भाटी सिरदार थारि घर वाळा.....”

“भीमजी मूंडा पै हाथ राख दीधो “ऊं हूं” जांत पांत तो गुंवार देखै । रजपूत री जात वीरता । जो आपां एक जात रा हां हीज ।”

मूंडा पै सूं हाथ दूरो करती पीउसंधी बोली,

“म्हूं टाबर ही जद म्हारी सगाई आंटा भील रे साथै व्ही, म्हूं वीरी मांग हूं, वो बैर लीधा बिना मानेला नीं जो सोच लीजो ।”

“वीरो काई सोच ! थाने मंजूर ?”

पिउसंधी रा गाल लाल व्हेग्या, नींची आख्या कर मुळक दीधो । भीमजी ने लाग्यो जाणै आसमान में उड़ रियो है ।

अंधारी रात, हाथ सूं हाथ दीखै नीं, भरमर भरमर छांटा पड़ रिया । पिउसंधी अर भीमजी डोल्या पै सोय रिया । कनें ही डोलणी माथै पिउसंधी रा दो वेदा गहरी नीद में सूता ।

भीमजी तो नसा में, जो गाढा सूता पड़्या पण पिउसंधी ने नींद नीं । बीजळी रो पळको पड़यो, पळका में पिउसंधी ने दीख्यो भींत पै चढतो दांतां में तरवार पकडचां एक आदमी, पिउसंधी चमक गी, आंटे भील ! जरूर आंटे भील !! दूजो कोई नीं आंटे भील देख्यो बीजळी रा पळका में, पिउसंधी ने अर भीमजी ने एक डोल्या पै सूता थका । नस नस में वासदी लागगी । “आज दोवां रा ही एक भूटका में टुकड़ा करूं । घण्णां दिन व्हेग्या घात घालतां ने, नींठ आज मोको मिल्यो ।” धीरै धीरै पग बजायां बिना वो भींत सूं नीचै उतरयो ।

पिउसंधी ढोल्या सूं धीरै सी नीचै उतरी सिराणा सूं नांगी तरवार उठाय हाथ में तोल्यां ऊभी । सांस रोक राख्यो तरवार ने पूरी ऊंची हाथ में उठाय राखी । आंटी भील ज्यूं ही ढोल्या कनें आयो अर सोची के दोवां ने एक साथ ही बाढूं, जठा पै'ली तो पिउसंधी री तरवार आंटा भील पै पड़ी जो माथो दूट पगात्यां कानी गुड़ग्यो, घड़ वठै हीज ढोल्या कनें पड़ग्यो । लोह्यां सूं आंगणों आलो व्हेग्यो ।

तरवार ने सिराणै मेल पिउसंधी सोयगी ।

पाछली पो'र रा भीमजी रो नसो उतरचो, नीचै उतरचा तो लोह्यां में पग पड़चो, चप चप करता पग भरग्या, जाण्यो परनाळा रो पाणी भरचो दीखै, बोल्या, “रात अंधारी चीखलो”

भट पिउसंधी बोली, “आंटी बीखरियो”

मैं पिउसंधी भाटकियो, सो भीमो ऊवरियो”

जखड़ा मुखड़ा दोई वेटा ने पिउसंधी आप तीर कवांण चलावणो सिखावै, तरवार रा हाथ वतावै ।

गांव रे वारै, साथियां रे साथै दोई भाई खेल रिया । एक गुवाळ दौड़यो आयो, छाती में सांस नीं माय रियो, गांव साम्हों भाग्यो आवै । जखड़ै रोकतै लगै पूछचो,

“काई व्हीयो ? भाग्यो क्यूं जाय रियो है ?”

“ना'र ना'र, गाय ने मार रियो है, मोटो ना'र ।”

“कठै कठै ?” जखड़ै मुखड़ै साथै साथै पूछचो ।

“यो कनें ही ।”

“चाल, चाल वता” गुवाळ रे लारै जखड़ो व्हेग्यो ।

देखै तो ना'र गाय ने पकड़, छाती नीचै दवायां वैठचो, चारूं कानी भांक रियो ।

यां ने देखतां ही ना'र भपटचो, जखड़ै तो आवता ना'र रे साम्है साथै तरवार री भापटी सो भेजो खुलग्यो । “हो, हो” करतो ना'र जमीं पै ढळग्यो । पूंछ पकड़'र घोंसता लगा घरै लेग्या ।

भीमजी राजी तो व्हीया पण बोल्या, “ना’र सिंघ रा घणी री सिकार है । ओल्मभो आवैला ।”

सांचे ही दूजे दिन तो सिंघ रा नवाब रा सवार आयग्या, ना’र मारचो व्हे जीने हाजर करो ।

भीमजी जखड़ा ने ले नवाब रे कने गिया ।

नवाब डपटतै लगै पूछ्यो, “ना’र कुण मारचो ?”

जखड़ो ऊभो व्हीयो, “म्हे मारचो ।” नवाब मूंडो देखतो रंग्यो । ईं दस वरस रा टावर रा निस्संक पणां पै अचंभो आयो ।

“क्यूं ?” नवाब सवाल कीघो ।

“ना’र गाय ने मार रियो जो वीने वचावा ने, दूजो बस्ती रे कने आयग्यो ज्यूं, मारतो नीं तो मिनखां रो नुकसाण व्हेवा देतो ?”

नवाब चुप रंग्यो । माथा सूं लगाय एड़ी तक गौर सूं वीने देख्यो । लडका रो डील, मूंडा रो तेवर, चेहरा रो रोव, बोलणै री हिम्मत । भीमजी कांनी देख्यो । भीमजी डील डील सकल रो तो आछो पण जखड़ा री तो वात ही और । नवाब सोच्यो, टावर कै तो मां पै व्हे कै बाप पै व्हे । यो जरूर ईं री मां पै है । ईं री मां ने देखणी चाहीजै, कसीक है ।

भीमजी सूं कह्यो, “ईं जखड़ा रो खेत बतावो, जीं खेत में यो नीपज्यो, वीने देखण री लालसा है । थां घरां जावो पण जखड़ा रो खेत बतावो ही पड़ेला ।”

भीमजी ढीला ढीला घरै आया । पिउसंधी पूछ्यो, “कांईं बात व्ही ? अतरा उदास क्यूं ?”

“उदास कांईं है, कै तो घर छूटैला कै मनख जमारा पै कळंक लागैला । और कांईं नीं व्हेणी है । नवाब जखड़ै रो खेत देखणै री जिद्द करै । म्हुं म्हारी लुगाईं ने कीने वताऊं ? भीमजी उदास व्हे ढोल्या पै पड़ग्या ।

पिउसंधी वीं दिन भीमजी ने अमल रो दूणो गाळमो दीघो । भीमजी ने गैरो नसो व्हेग्यो, वाने सुवा देय पिउसंधी आपरी पुराणी पोसाक काढी, आपरा घोड़ा पै जीण कीघो । सुरज ऊगतां ऊगतां, नवाब रा दरवाजा वारै आय ऊभी री ।

चोबदार रे सागँ अरज कराई कांगड़ा विलोच रो वेटो आयो है, मुजरा री अरज करा वै ।

नवाव बुलायो, मुजरो कर अदव सूँ वैठी ।

“थांरो नाम ?”

“सिकार खां । आपरै सिकार री तारीफ सुणी है, म्हारे ही सिकार रो सोक है । सिकार पधारो तो सिकार खेलां, देखां अर दिखावां । सिकार करां अर करावां ।”

नवाव भट सिकार री ल्यारी रो हुकम दीघो, करनाळ कराई, सिकारी कुत्ता साथै लीघा, हाथां रे बाज बांध्या, सिकार चाल्या ।

जठी ने पिउसंधी निकळ जावै, वठी ने जिनावरां रो ढिगलो व्हेतो जावै । वीरा निसाणा देख देख, नवाव साबास, साबास करै । तीरां री मार देख दांता तळै आंगळी देय दीघी ।

सांभ तांई सिकार रम्या, घणो आणंद आयो । ना'र सूरां रो ढिगलो कर दीघो पिउसंधी तो । सामर, हिरणां सूँ गाडा भरघा ।

पिउसंधी घरै जाणै री सीख मांगी । नवाव कह्यो, दो दिन और ठैरो । थांरे साथै घणो आणंद रियो सिकार रो । काले और चालांला ।

पिउसंधी सलाम कीधी, “फेर दो चार दिन पछै हाजर वूँला, आज तो जरूरी जाणो ही है । नवाव कड़ा सिरोपाव दे सीख दीघी ।

पिउसंधी घरै आई जतरै भीमजी ढोल्या पै पड़घा आळस मोड़ रिया हा । दूजे दिन तो नवाव रा सिपाही भीमजी ने आय ताकीद कीधी हीज जखड़ा रा खेत ने बतारौ री । पिउसंधी कड़ा सिरोपाव भीमजी रे हाथ में दीघा, ये नवाव रे मूँडागे राख दीजो पछै वो खेत ने देखवा रो नाम नीं लेवै । भीमजी ने देखतां ही नवाव आंख्यां काढी ।

“एकला एकला आया ? म्हें देखवा ने कह्यो वा चीज कठै है ?”

“वा तो नजर गुजार कद की ही व्हेगी ।” भीमजी हंसते हंसते कह्यो ।

नवाव लाल पड़ग्यो, “भीमजी ! तमोज सूँ बात करो ।”

“तमीज ही सूं तो कर रियो हूं । ये कड़ा सिरोपाव म्हारै पैरवाने है जाने ओळखो । कालै सिकारखां आप सूं मिल्यो कोनीं हो के ?”

नवाब अचम्भा सूं बाको फाड़ दीघो ।

“वाह रे वाह सिकारखां ! असी मां हीज अस्या पूत जणै । गावड़ हलावतो, दूहो बोल्यो,

भुंई परक्खो हे नरां, कांई परक्खो विद ।  
 . भुंई विन भला न नीपजै, कण तृण, तुरी, नरिंद ॥

घरती (मां) ने देखो । विना उत्तम घरती (मां) रे, तृण, घान चोड़ा अर नर आछा पैदा नीं व्हे सकै ।



## हंकार री कलंगी

“यां मरठां तो पूरो घोड्यो घाल राख्यो है।” उदपुर रा भेलां में राणाजी मूंडागै दैठ्या परवान रे साम्हां झंकता बोल्या। बांरा ललाट पै चिता रा सळ पड़ग्या। आंल्यां में ऊंडा ऊंडा भाव भरग्या।

“घोड्यो कांई घाल राख्यो है, अन्दाता, सारी मेवाड़ तवाह व्हेयगी। लूट मार सिवाय ये तो कांई करै ही नीं, गांवां में वासदी लगाता आगै बढै।” कनें दैठ्यो एक जणो दोल्यो।

“असी दुखसा तो बादसावां रा अर मुसलमानां रा हमला सूं ही कोयनी व्ही जसी यां मराठां रा उतपात सूं व्हेगी है। वे लड़ता तो ढंग सूं हा, ये तो जाणै के तो वामदी लगाणो, के लूटणो।” दूजे जणै हंकारो भरयो।

राणाजी रा मूंडा ऊपरला भाव और ही गंभीर व्हेग्या।

मराठां री फोज मेवाड़ ने बाळती, लूटती आगै बढ री ही जिए सूं मुकाबलो करणै री त्यारी रा सल्लासूत व्हेय रिया। रात आबी परी गी पण सोवा रो यो बगत योडो ही हो। खास खास काम करण्यां आदमियां ने दुलाय, बन्दोबस्त री सलाह व्हेय री।

“बजाना में रिपियो नीं, रात दिन रा कल्टां अर हमला सूं लोगां में भय अस्थो जमग्यो के मराठां रो नाम सुणतां ही गांव खाली कर कर भिन्न भाग जावै। रजपूत पैलां सरीला जोरदार रिया नीं जो छाती पै हाथी रा दांतां रा घमाका भेलै।” परवान जी सारी हालत पै गौर कर समझावता बोल्या।

कनें दैठ्यो एक सरदार तड़फग्यो, “रजपूत कांई रिया कोयनी? कदे ही पाछा रियां व्हां तो बतावो। वेटी रा बापां! गाजर मूळी ज्यूं माया कटाय रियां हां। पूरा पूरा दोयसो वरसा सूं मेवाड़ पै हमला व्हेता आय रिया है। पैलां मुसलमान अर

अवै ये मराठा । रात दिन रा जुद्धां सूं म्हांरां घरां री कांइ दसा व्ही है जो गांवा में पघार'र देखो तो खबर पड़ै । एक एक घर में दस दस रांडां वैठी है ।”

राणाजी ऊंचो माथो कर ठिमरास सूं बोल्या, “घरती रा घणी वाजै जाने तौ गाजर मूळी ज्यूं माथा कटावणां ही पड़ै । घणी वणणां सोरो कोयनी । वाप दादां री पीढ्यां री पीढ्यां ईं भोम री इज्जत अर मान सारूं काम आई, वीं भोम ने यां घाड़ायतियां रा हायां सूं लूटवा देणी के ? लुगायां रा माथा री ओढण्यां खँचवा देणी के ? वैठ्या बहन करणी है के काम करणां ? बोलो, सारा जणां भेळा व्हीया हो, कांई कांई वन्दोवस्त करणां ?

एक पल सारूं सारा चुप व्हेग्या । छाती पै चढ़ी थकी विपदा रो भीतरण रूप सारा री आंख्यां आगै आयग्यो । कठै कतरौ तोपां लगाणी । कीनें फोज मुसाहिब बणावणां, रिपिया अर धान रो परवंध कठां सूं अर किरण तरह करणां, फौज भेळी करणी, सारी वातां पै विचार व्हेण लाग्यो ।

मेवाड़ रा सारा सरदारां रे नाम हुकम लिख्यो गियो ।

“सारा सरदार आप री पूरी जमीन अर पूरा ससतरां सूधी उदैपुर हुकम पोचतां ही हाजर व्हे जावै । देर नीं करै ।” हुकम रे ऊपरै राणाजी आप रा दसगतां सूं दो ओळां लिखी, “जो हाजर नीं व्हेला वी री जागीर एकदम जव्त करली जावैला । कांई तरै री रियायत कोनी होसी । देस री विपद नी वेळा में हाजर नीं व्हेणां हरामखोरी मानी जासी ।”

सवारां ने हुकम रा कागद दे दोड़ाय दीघा ।

कोसीथळ रा कामदार रा हाथ में सवार जाय हुकम पकड़ायो, रसीद पाई कराई । वांच्यो, वांच्यो, वांचतां ही कामदार रो मूंडो उतरग्यो । कोसीथळ चूंडावतां री छोटी भी जागीर ही । वठा रा ठाकर दो तीन बरस पैलां एक भगड़ा में काम आयग्या । दो बरस रा टावर ने छोड़ग्या । ठिकारणां में नैनपण ! राणाजी रो यो करडो हुकम !! भगवान चोखी बणाई !!!

टावर ठाकर, री मां ईं वाळक माथै आसां रा दीवा जोवती, आपरो रंडापो काट री ।

कामदार जनानी डोढी पै जाय अरज कराई, “माजी साव ने अरज करो, जरूर वात अरज करणी है ।”

डावड़ी जाय कह्यो, “ठिकारणै रा कामदार फोजदार डोटी पै ऊभा है । आप मूं मुंडामूं ड बात करवा ने हाजर व्हेवा री कै है ।”

“माजी री छाती घड़ घड़ करवा लागी, “फेर कोई नवो दुख तो नीं आयग्यो ।”

डावड़ी ने कह्यो, “वारणा पै पड़दो बांध दे, वाने मांयने बुलाय ला ।”

बेटा री आंगळी पकड़, पड़दा रे सारै मांयने ऊभी व्हेयगी । कामदार फोजदार, मुजरो कर पड़दा सूं वारै ऊभा व्हेय्या । हाथ लांवां कर राणाजी रा हुकम रो कागद पड़दा में माजी ने भेलायो ।

“अवै ?” वांचतां ही माजी रा मूं डा सूं कोरा दो अक्तर ही निकळ्या । “अवै आप हुकम दो जो ही करां । ठाकरसा तो पूरा पांच बरस रा ही कोयनी व्हीया, चाकरी में लेर जावां तो किस तरै ले जावां ।” माजी री नजर आंगळी पकड़ने ऊभा बेटा री काळी काळी भोळी भोळी आंख्यां सूं जाय टकराई । मां री ममता जाग गी । हूं हूं ऊभो व्हेय्यो, छाती में दूध उतरवा रो सो सरणाटो आयग्यो । लारै रो लारै “जो हाजर नी व्हेला वीरी जागीर जव्त करली जासी” हुकम री ओळां चळवळना खीरा री नाई आंख्यां आगै चमकगी ।

मन में एक साथै कतरा ही विचार आयग्या । “जागीर जव्त हो जासी ? म्हारो बेटो बाप दादां रा राज वाहिरो व्हे जावैलो । वीं री पांच भायां में कांई इज्जत रैवैला ? वीं रे बाप नी रिया परण म्हूं तो हूं । म्हारे जीवतां जीव बेटा रो हक छूटै, धिरकार है, म्हारे मिनख जमारा पै । म्हूं असी खोड़ली हूं कांई जो पीढ्यां री भोम ने गमाय हूं । म्हारा वंस पै दाग नीं लागै ?”

वींरी आंख्यां रे आगै एक तसवीर सी आयगी जांरुं वीरो जवान बेटो ऊभो है, सगा परसंगी रोळ में मोसो मार रिया है, “ये लड़ाई में नीं पधारया सा जो कोसीचळ ने राणाजी खोस लीवी । हें हें हें ! यां चूंडावतां ने आपरी वीरता रो घरां चमड है ।” हुजे ही पल दांतां री कटकट्यां भौंचता बेटा रो नीचो माथो, नीची नजर व्हेती लगी दीखी ।

माजी रा माथा में चक्कर आयग्यो । जवान व्हीयां बेटो ईं मां ने जतरो धिक्कारे थोड़ो । वाने याद आयगी आपरे बाप रा मूं डा सूं सुरणी जूनी काण्यां, लुगायां कसी कसी वीरतां सूं भगडा कीघा । अरे ईंज खानदान में पत्ताजी चूण्डावत री टुकराणी अकवर री फोज सूं लड़ी, गोळियां री रीठ बजाय दीघी । पछै म्हूं क्यूं नीं जावूं ?

ईं विचार सूं वारा हालता मन में थिरता आयगी । नेत्र चमकग्या । जीव सोरो व्हेग्यो । घरां ठिमरास सूं पड़टा री आड में सूं बोली, “घरियां रो हुकम माथा पै । करो, जमीत री त्यारी करो । घोड़ां, आदमियां ने त्यार होण रो हुकम दो ।”

“वो तो ठीक है । पण घरी बिना फोज कसी ?”

“क्यूं ? म्हूं हूं के घरी । म्हूं जावूंला ।”

“आप ?” अचम्भा सूं कामदार अर फोजदार दोवां रा मूंडा सूं एक साथ ही निकळग्यो ।

“हां म्हूं । अचम्भा री काईं वात है । थारे ईंज घराणा में कतरी ठुकराणियां लड़ाई में भूभी है के नीं ? थां कस्या जांणो कोयनी ? म्हूं कोई अणूती वात कर री हूं के ? पत्ताजी री मां अर वारी ठुकराणी अकबर सूं लडता लडता मरचा कै नीं ? म्हूं ही वारा हीज घराणां में आई हूं । म्हूं क्यूं नीं जावूं ?”

जमीत सजगी । नंगारा पं कूंच रो डंको पड़यो । निसाण री फरियां खोल दीधी । पाखर घल्यो घोड़ो आय ऊभो व्हीयो । माथै टोप, जिरह बख्तर रा काळा लोह सूं ढंक्वा हाथ वेटा री कंवळी कंवळी वांहां ने पकड़ गोद में उठावा ने आगै व्ही । टावर सहमग्यो । बोली तो मां सरीखी अर यो अजब भेख रो आदमी कुण । गालां रे होठ अड़ातां अड़ातां मां री पलकां आली व्हेगी, “बेटा, यो सब थारै वास्तै, थारी इज्जत वास्तै ।”

एक ठडी सांस रे साथै वारा होठ हाल्या ।

आगै आगै घोड़ा पै भालो भळकावतो फोज रो मांभी अर लारै लारै सारी जमीत उदैपुर आय हाजरी में नामों मड़ायो, “कोसीथळ रा फलाणसिघ चूंडावत मय जमीत रे हाजर ।”

हमलो व्हीयो । हड़ोल चूंडावतां री । हमलो करै तो पैलां हड़ोल वाळा ही आगै वढै अर सत्रुवां रो हमलो भेलै तो ही हड़ोल पै ही जोर आवै । सिधु राग गावण लाग्या । हड़ोल रे अघवीचै, चूंडावतां रा पाटवी सळूंवर रावजी ऊभा व्हे बोल्या, “मरदां ! दुसमणा पै घोड़ा ऊर दो । मर जाणों पण पण पाछो नी देणों । या हड़ोल मे रैवा री इज्जत, आपां पीढ्या सूं निभाय रिया हां, आज ईं आपणीं जिम्मेदारी ने पूरी निभावजो, देस सारूं मरणों अमर व्हेणो है । हां, खैचो लगामां ।”

एक हाथ सूं लगाम खैची दूजा हाथ में तरवारां तुलगी ।

## मांभल रात

हड़ोल बाळां रा घोड़ा उड़्या जरि भेले माजी घोड़ा ने उड़ायो । खचाखच सर व्ही । तरवारों रा बटका व्हेण लाग्या अर माथां रा भटका ।

माजी री तरवार ही पळका लेय री, एक जरां पै तरवार रो वार कीघो, वीं फुरती सूं वार ने हाल पै भेल पाछी भालो मारयो जो पांसळी ने पोवतो लगो वारं निकळयो । माजी री रान झूटगी साथै रे साथै घोड़ा सूं नीचं ढळक्या । -

सांभ पड़ी । भगड़ो वंद हुयो । खेत संभाळवा लाग्या । घायलां ने उठाय चठाय पाटा पींड करवा लाग्या । लोह री टोप सूं वारं केस लटक रिया । पाटो बांधवा ने हाथ लगायो तो देखै लुगाईं । बठै रा बठै ठवक्या रय्या ।

“या कुरण अर क्यूं ?”

राणाजी ने अरज व्ही,

“घायलां में एक लुगाईं पूरा वीर भेस में मिली । नाम पतो पूछां तो बतावै नीं ।”

राणाजी गिया । लोह री टोप नीचै गज गज लांबा केस लटक रिया, लीयां सूं भरया त्रिपक रिया ।

“सांच सांच बतावो नाम ठिकारों । छिपावो मत दुसमण व्हेला तो ही मूं थारो आदर करूं । म्हारे वेन ज्यूं हो ।”

“कोसीयळ ठाकर री मां हूँ अन्दाता” माजी बोल्या ।

“हूँ ! राणाजी अचम्भा सूं कूदया । थां लड़ाई में क्यूं आया ?”

“अन्दाता रो हुकम हो । जो लड़ाई में हाजर नीं व्हे जीरी जागीर जवत व्हे जावेला म्हारे टावर छोटो है । हाजर नीं व्हेणो मालकां री अर मेवाड़ री हरामखोरी व्हेती ।”

करणा अर गुमान रा आंसूं राणाजी रे आंख्यां में छलक गिया । “बल्ल है थूँ !” राणाजी गदगद व्हेया । “यो मेवाड़ वरसां नूँ आन राख रियो जो थां जसी देवियां रो परताप है । थां देवियां म्हारो अर मेवाड़ रो माथो ऊंचो कर राख्यो है । जठ तक असी मांवा है जतरै आपां रो देस पराधीन कोनी व्हे ।”

ई वीरता री एवज में, थाने ईज्जत देणों चावूं, बोलो थां ही बतावो, जो थारो इच्छा व्हे ।”

माजी सोच में पड़ग्या, काई मांगे, कोई इच्छा व्हे तो मांगे ।

वांरी आंख्यां आभै बेटा री बे काळी काळी भोळी भोळी आंख्यां फिरगी । मां री ममता भटको खाय जागगी ।

“अन्दाता राजी हो अर मरजी हीज है तो कोई असी चीज बगसावो जीसूँ म्हारो बेटो पांचां में ऊंचो माथो करनै बैठै ।”

“हूँकार री कलंगी थाने बगसी जो थारो बेटो ही नीं पीढ़्यां लग या कलंगी पँर ऊंचो माथो कर थारो वीरता ने याद रखावैला ।”



## हाड़ी रागी

रूपनगढ़ रा रावळा में अचरणचक सण्णांटो व्हेग्यो । सीळो वाजतो वायरो जांरौ तातो व्हेग्यो व्हे । डावड्यां रा छमछम वाजता घूघरा थम गिया । गादी पै ब्रैठी राणियां रा मूंडा घोळा पडग्या । वायरो करती दासियां री मुठ्ठी में वींभणी री डांडी यूं री यूं रैगी ।

श्रीनाथजी रा मंदर में आरती रा दरसण करता राजाजी रा हाथ में वादसा ओरंगजेव रा हुकम रो कागद पकड़ायो । हुकम वांचता वांचता राजाजी री आख्यां आगै काळा पीळा आयग्या ।

हुकम काई हो, जहर रो प्यालो हो, जीरी घूंट नीं तो गळा नीच उतारणी आवै अर नीं थूंकणी आवै ।

राजकंवरी चारुमती रे साथै ओरंगजेव रा व्याव रो पैगाम ! कोरो पैगाम ही नीं हुकम अर जुल्मी हुकम, तिथि समै सब निरुचै ।

एक कानसूं दूजा कान में गी, दूजा सूं तीजा में । मरदां री रीस सूं मुट्टियां वंधगी, वूढां रा सरम मूं माथा नीचा भुकग्या । कै तो ईं अपमान री कड़वी घूंट ने नीचो माथो कर गळै उतारणी कै काळ ने नूतणों । रणचंडी री तसवीर आख्यां आगै फिरगी । कायरां री छाती घड़घड़ करवा लागी । चारुमती सुण्यो, काची केळ ज्यूं कांपगी जांरौ वीजळी पड़ी । रीस सूं राती पड़गी ।

“वेइज्जती री कोई हद व्हे ? वादसा लुगायां ने समझ काई राखी है ? वें कोई खेलवा रो खेलकणो हूँ ? इज्जत ही लुगाई रो संसार में सब सूं अमोलक घन व्हे । मरजाणों मंजूर पण इज्जत रे साथै । वादसा रो यो जोर जुलम कदे ही मंजूर नीं ! नीं !! नीं !!!

चारुमती बीफरगी । माथा री नसां तंगणी । छाती में सांस नीं मावै । वाप ने साफ नां केवाय दीवो “मरजावूं पण वादसा ने नीं परणूं ।”

अपमान सूं दाइयोड़ा, नीचो माथो घाह्यां, कसक ने कालजा में दवायां, बाप गळगळा व्हे समभाण लाग्या, “वेटा, थूं केवै जो सारी सांची है पण वता ओर उपाय काई है जो म्हूं करूं ? आलमगीर री फोजां सूं टक्कर लैण री आपां मे तागत नीं । वीरी एक पलटण आपणां सारा सैर ने उजाड़ देला । हजारं घर वरवाद व्हे जावैला । थारा जसी सैकड़ां बहू वेट्यां रांडां व्हे जावैला अर वां पै जो सिपाही जुलम करैला वो तो सोचणी नीं आवै ।”

हमेसां अदव सूं भुकी रैती वे आंख्यां आज पूरा जोर सूं तंगी, हाथ जोड़ नरमी सूं बात करवा बाळी चारूमती, छाती तांण साम्ही ऊभी व्हेगी ।

“जुलम, वेइज्जती भेलवा सूं तो वरवाद व्हे जाणो आछो । ओरत री इज्जत सारूं थां नी मर सको तो मत मरो, म्हूं जीवते जीव कदे ही नीं मानूं ।”

थां अतरा जरां हाथां मे तरवारा लीधां फिर रिया हो, वयूं नीं एक भटको म्हारे माथा रे मारो ? सारो भगड़ो ही खत्म व्हे जावै ।”

हरणी जसी आंख्यां में आंसू भरचां माथो आगो कीघो ।

“थूं नीं जांणै ईं रो नतीजो काई निकळ ही ।” गलानि अर अफसोच सूं राजाजी माथो पकड़ बैठग्या ।

चारूमती ने अत दीखै नीं गत । दिन पनरा रैग्या । पैरवा रा गावा वैरी व्हे रिया जांणै खीरां पै लोटै । भीत पै टंग्योड़ा दरपण साम्ही नजर पड़ी । मूंडा रा परतीबंव सूं दरपण भळमळाय उठयो । चारूमती मूंडो फेर लीघो । एक ठंडी सांस काळजो चीरती निकळगी, “यो रूप ही पापां रो फळ है । पैली पदमणी ने बाळी, अवं म्हारो ओसरो है ।”

लारै री लारै याद आई पदमणी री इज्जत सारू माथा कटावण्यां वीरां री ।

रूम रूम ऊभो व्हेग्यो । “आज वा री वा म्हारा में वीत री है पण मरवा बाळो कोई है ? वीरी आंख आगै चित्तोड़ रा सूरमा चमक गिया । लारै री लार राणा राजसिंघजी री तसवीर आंख्यां आगै नाचगी । जोतदान रा चित्तरां में राणा राजसिंघजी र्हे जीं दिन वीं चित्तर देख्यो हो तो देखती रैगी । कस्यो रोवदार चेहरो, आंजस सूं भरचा नेत्र । वारी वीरता री काण्थां, ओरंगजेव सूं अड़वा री वातां वीं घणी दांण उछळतै काळजै सुणी ही । राजसिंघजी रा जस गीत याद आया ।

पदमणी सारूं लोहचा रा खाळ वैवावा बाळा री संतान राजसिंघजी म्हारी रक्षा नी करैला ? जरूर करैला । ईं विचार सूं चारूमती री आंख्यां चमकगी ।

‘वे व्याव करले तो ?’ मीठा विचार सूं कुँवरी रा नैण मिचग्या ।

“अस्या सूरमा परतावी पति सूं वत्तो रजपूत री वेटी ने चावै काई ? दो पल दूसरा ही जगत में चारुमती परी गी ।”

भट्ट कलम ले, राणा राजसिंघजी ने एक कागद लिख्यो, “महें आपने मन वचन सूं पति अंगीकार कर लीघा है । आप म्हुंने ले जावो । ज्यूं किसन, रूकमणी री सिसुपाल सूं रक्षा कीधी ज्यूं ही अबै म्हारी करो । म्हुं आपकी व्हे चुकी ।

“बोलो, अबै काई करणो ?” दरिखाना में कागद बांच राणाजी सारा सरदारों कानी पूछता नजर न्हांकी ।

कीरा ही तो हाथ मूँछां पै पड़ग्या, कीं री ही रीस सूं अस्यां में सूं भाळां छूटवा लागी, कीरे ही रगत रो संचार वचग्यो । घणां करां रा मूँडा उतरग्या ।

“करणो काई है ? है जो चौड़े है, वाईजी ने परण पधारो ।” एक जणो आगतो बोल्यो ।

“आगली पाछली सोच ने बात करो, दिल्ली रा घणी सूं लोहो लेवणो है ।” दूजे थोड़ी सोचर कह्यो ।

“दिल्ली रा घणी सूं कदे ही अड़्या कोयनी हां काई ? घणो व्हे ही मर जावां, और नवी बात काई व्हेला ?”

बहच मुवाहिसो व्हेण लाग्यो । आप आपरी कैण लाग्या ।

“यो काम जाणों जस्यो सोरो नीं है ।”

“सवान लुगाई जाति री इज्जत रो है ।”

“घर री तागत देखणी पै लां जरूरी है ।”

“सरण में आया री रक्षा करणों सब सूं मोटो घरम है ।”

राणाजी कह्यो, “फळ ईं रो चावै जो व्हीजो । मरणो एक दांण है, आगै के पाछै । लुगाई री वीरता टाळ दे वो मरद ही नीं । नारी रो अपमान नजरचां देखणों ही मद्रसूं मोटो पाप है, जीवता जीव नरक भोगणो है । करो फोज री त्यारी करो, म्हुं परणवा ने जावूँला । थां फोज ले, दिल्ली रा गैला ने रोक्यां राख जो, व्याव नीं व्हे जावै जतरै । खबरदार, बादसा रूपनगढ री सीमा में पग नीं देण पावै । सळूँवर रावतजी ने खबर भेजो, फोज मुसाहिबी रो जिम्मो संभाळै ।”

एक जगै अठीने उठीने भांक हाथ जोड़्या, “अन्दाता ! सळूंवर वाळा तो परणनै काले हीज घरे आया है । बांरा हाथ रा कांकण डोरड़ा ही नीं खुल्या ।”

“हूं” ललाट पै गैरा गैरा घणां सारा सळ पड़ग्या विचार में थोड़ी देर डूवग्या, धीरै धीरै ऊंची गावड़ कर, घणां ठिमरास सूं वोल्या “आपां जीं जोखम ने उठावा जाय रिया हां वीं ने तो देखी । करतव भाटा सूं ही ज्यादा करड़ो व्हे ।”

एक लांवी सांस खैचता राणाजी धीरै मन ही मन में वोल्या, “आपणां देस री मान मरजादां राखवा सारू थां कतरा कतरा बलिदान कीधा है ।” आखी उमर जुद्धां में रैण्यां राणाजी रो आख्यां में ही पाणी आयग्यो ।

सळूंवर रा गढ में राग रंग रा फुंवारा छूट रिया । सरणाई में वधावा वनड़ा गाईज रिया । लुगांयां रा भूमका रा भूमका अठीने वठीने गोटा कांगरी री श्रीढारया ओढ्यां फिर रिया । नीचै वैठी डोलणियां मांड में दूहा देय री । ऊपर मे'ल में मखमल री गादी पै मनसद रो सहारो लीघां रावत रतनभिघजी बैठ्या, कनें ही नवी परणी वीनणी हाड़ीजी, लाल परणेतू पोसाक अर लाल हाथीदांत रो चूड़ो पैर्यां बैठ्या । हींगळू री पोट सरीखा लाल हीठां री भाई, वीं रूप री राणी रा गालां री लाली ने श्रीर ही गैरी कर री । अतर रा दीवां रा भळमळ करता चानणा पे, कंचन सरीखा रंग दूणां दूणां दमक दमक जावतो । रावतजी एक टक वारै साम्हा चोघरिया, जाणै मंतरचोड़ो सांप भोला लेवै । वारी तिसाई आख्यां एक ही नजर मे आखी रूप पी जावा ने आगता व्हेय री । वे हाड़ीजी साम्हा-भांक्या, वीं नजर रो अरथ समझनै लांवी लांबी कैरी री फांक जसी आख्यां लाज सूं नीची व्हेगी, भींणी भीणीं पसीनां री वूंदा आयगी । रावतजी रा लुभाया नैणां रो नसो चोगणो व्हेग्यो । हुकम री वाट में हाथ जोड़्यां ऊभी डावड़ी चतरसाळा सूं वारै क्लिमकगी । वारै वैठी डावड़्यां कलाळी उगेरी ।

कंवळा कंवळा कंवळ सरीखा हाथा ने हाथ मे ले नैणां रा प्याला सूं सारो रस ऊंघाता रावतजी वोल्या, “हाड़ीजी, थें म्हंने मिलग्या, तिलोक री संपत मिलगी । नो निधि मिलगी । अवे काई नीं चावै म्हंने ।”

पडूंतर देण ने हाड़ीजी रा होठ हाल्या पण वोल निकळ्या नीं । नैण नीचा कीघां मन ही मन आखंद रा सागर में तिरवा लाग्या ।

“थां सरीखो रतन म्हंने मिल्यो देखो मिनख तो काई देवता ही म्हारा भाग पै इसको कर रिया है । आवो म्हारा कनें ।”

आखंद रा भार सूं हाड़ीजी री आख्यां आवी मीचणी आयगी । अतराक में तो

डावड़ी, हाय में परवानो लीवां मायने आई, भुकर कागद नजर करयो ।

“यो बगत है ?” रावतजी आंख काढी ।

“तम्मा परयीनाय । उदैपुर सूं सवार आयो । जरूरी हुकम है ज्यूं तावेदार हाजर व्ही ।”

परवानो बांच्यो । जांगै आमा में चमकता चांद पै काळो वादळो आयग्यो व्हे, चळमळ करता दिवला री दाती पै गुल आयग्यो व्हे । मे'लां रा हंमता लगा थांभा पूनपुन व्हेग्या । रावतजी रो मूंडो पीळो पडग्यो ।

“बात काई है ?” हाड़ीजी हाय सूं कागद लेतां बांच्यो । काळजो कटग्यो । नैणां में करणा री देवी जांगै सैसरीर विराजमान व्हेयगी । यो अयाग नेह अर यो विजोग ! यो वंण अर काचा सूत ज्यूं टूटवा वाळो !!

रावतजी बैठ्या रा बैठ्या रंग्या जांगै पाखाण री पूतळी व्हे । घणी देर पछै हाल्या ।

“लड़ाई में म्हुं नीं जावूंला ।”

हाड़ीजी आंख्यां फाड़्यां देखता रंग्या । कांतां पै भरोसो नीं आयो ।

“नीं म्हुं नीं जावूं । थाने छोड़ कठै ही नीं जावूं ।” कांपता कंठा सूं बोल निकळ्या ।

हाड़ीजी सनसली, “म्हारो मोह थाने जावा नीं देवै ।”

नैणां री कोरां में पाणी भरग्यो । मन तो कह्यो हाय पकड़ अठै ही राख लूं परा आतमा अंतस सूं बक्को दीवो, रजपूत अर जुद्ध सूं मूंडो फेरे ? विक्कार !

हाड़ीजी पूछ्यो, “काईं फरमा रिया हो ?”

“सांज कैय रियो हूं । थाने छोडणी नीं आवै ।”

हाड़ीजी रो दरप जाग्यो ।

“ये सवद आप रा मूंडा सूं सुण री हूं ? आज घणियां ने, जनम भीम ने आप री चररत है ।”

“जनम भीम रो म्हुं एकलो वेटो नीं और घणां ही है ।”

“आप चूंडाजी रा वंसज अर या कायरता ? चूंडावतां री वादरी री वातां घणी सुणी । या हीज है नीं आप लोगां री वादरी ? देख लीधी । कुळ री मरजादा रो

ध्यान है के नीं ? आप री सारी पीढियां रणभूमि में सूती अर आप नट रिया हो । तवारीख में काई नाम मंडेला ?”

“तवारीख अर मरजादा री बातों थें म्हने काई सुणावो हाड़ीजी, सब समझूं । कायर कोनी हूं, म्हारी वादरी री बातों सुणाणी व्हे तो म्हारा ईं खांडा ने पूछो । अवार म्हारो धरम करम, मान मरजादा सब थें हो । सुरग नरक री चिन्ता नीं । म्हने चिन्ता है थारी, कोरी थारी ।”

हाड़ीजी सुण्यो । काले अमीज नेह री बातों अमरत सूं मीठी लाग री पण अबाहूं वळवळता खीरा ज्यूं लागी । वीं ने याद आयगी, वां रे हीज भूवा जोधपुर जसवन्त-सिधजी री हाड़ीराणी री । वां भाग'र आया पति ने किला में कोनी घुसण दीघा । किला रा दरवाजा बन्द कर दीघा । “भाग्योड़ा पति रो मूंडो कोनी देखूं ।”

हाड़ीजी री सांस जोर सूं चालण लागगी, रगत में उवाळो आयगयो ।

“म्हारी चिन्ता मत करो । तरवार हाथ में पकड़ो । जीत'र आया तो अठै आरांढ करांला, मरग्या तो सुरग में म्हूं ही लारै री लारै आवूं ।”

“कतरा कठोर हो हाड़ीजी थें ।”

हाड़ीजी रो आवेग सूं मूंडो रातो व्हेग्यो, “कायर पति ने बाथ में घाल नै घर मे घाल्यां राखवा सूं तो वीर पति री रांड व्हे जाणो लाख दांण चोखो ।”

रावतजी एक लाबी सास लेता लळचाया नंण सूं भाक्या, “म्हूं तो जुद्ध में खैर आवूं ही हूं पण पाछा सूं थारो काई व्हेला । थारा हथळेवा री मे'दी नीं सूखी ।”

हाड़ी तड़फगी, “म्हारो काई व्हेला ?” लो यो वचन । आप जो लड़ाई में काम आयग्या तो लारै री लारै म्हूं सती व्हे जावूं ।”

रावतजी कूच री त्यारी पै लाम्या पण अणमणा मन सूं । त्यारी करे पण जीव हाड़ीजी मे । घोड़ा पै सवार व्हीया, पाछा फिर फिरनें भांकता जावै । हाड़ीजी रा गोखड़ा रे नीचं घोड़ो निकळयो । घोड़ा री वाग खैब लीधी । ऊपर भांक्या, परणेतू पोसाक मे जीरा हथळेवा री मे'दी रो रग ही नी फीको पड्यो, वे हाड़ीजी भररोखा री जाळी मे बीजळी ज्यूं चमकता दीख्या । घोड़ो रुकग्यो । हजूरी ने हेलो पाड्यो, “जा हाड़ीजी ने अरज कर कोई सैनाणी म्हारे खातर लावै ।”

रावतजी री आख्यां गोखड़ा री जाळी सूं आगै नीं डिगै ।

हाड़ीजी देख्यो, “यो मोह ! ये रण जाय काई फते करैला ? पीढियां रा नाम रे काळो लागवा रा दिन है । उठी ने तो कायर पति रा उमीणां, म्हारी साथण्यां म्हने सुणावैला, वठी ने चूंडावतां रा ऊजळा इतिहास पै पैली दांण यो कायरता रो दाग लागैला । ईं सगळा रो कारण म्हूं । म्हारो मोह ही तो सगळा अनरथ री जड़

है।" वाने याद आयग्या वे हीज जोवपुर वाळा भूवा, हाडीराणी जो आपरा हाथां सूं पेट चीर ओरंगजेव री फोज रे लारें जुद्ध कर मरथा । "म्हूं ही तो वीं खानदान में जनम लीघो है।" अतराक में डावडी आय हाथ जोड्यां बोली, "अन्दाता आप री सैनांगी मगावें, लारें ले जावा ने।"

"हां हूं थोड़ी वा तरवार भेलाजे।"

तरवार म्यान सूं काढ़ता बोल्या, "अन्दाता ने अरज कर दीजे, या सैनांगी तो ले पवारो जीं में आपरो जीव है वा आप सूं पैलां जाय री है। अवं आप पाछा पग मत दीजो।"

या कंवतां ही हाडीजी तो तरवार ने हाय में काठी पकड़ आपरी हीज गावड़ पै जोर रो भटको मारयो। तड़ाक देतां लोह्यां रा फुंवारा रै साथै माथो घम्म देणी को जर्मां पै जाय पड़यो। जारुं चांद वरती पै टूट पड़यो व्हे।

राजसंभद री पाळ ऊपरला मेंलां री चानणी पै राजसिंघजी वारी राणी चारुमती रे साथै ऊभा। नीचै नजर पड़ै जतरै तळाव रो पाणी पाणी दीखें। ऊपरै पूनम रो चांद चमक रियो, वीरो चलको नीचै पाणी में करोड़ करोड़ रूप वारण कर नांच रियो।

चारुमती उछाव, कल्या अर सरवा री तिरवेणी नैणां में भरयां, राणाजी ने पूछ री "हाडीजी आपरा हाथ सूं हीज आपरो माथो काट सैनांगी देय दीघी? पछै?"

"रावतजी आपो भूलग्या, वींरा कट्या माथा ने केसां री लट सूं आपरे गळा में बांध लीवो। छाती पर वारो मुण्ड लटकतो रियो। जांरुं वारी आंख्या में भून लड़ रिया व्हे, दूजो मा'देव रणभौम में उतर आयो दुसमणां रो गैलो रोकनै ऊभा रंग्या। एक आगळ पाछा नीं सरक्या, कटकट'र वारा बटका बटका नीं व्हीया जतरै। अस्यो दुस्य कदे देख्यो नीं, सुण्यो नीं।" भरथा कंठा सूं राणाजी सुणायो।

"पछै?"

"पछै काई? वारा परताप सूं थां अठै म्हारे कनें बैठ्या हो।"

चारुमती रो सरवा सूं मायो भुक्तयो, पलकां आली व्हेगी।

## ऊगो भागोज

रतनागर सागर हलोळा लेय रियो, गरजना कर रियो, लैरां रा टोळ रा टोळ उंछाळा खाय रिया, पाणी रा हड्डाटा लाग रिया, टापू पै बस्या, पाटण नगर रा गढ़ री भीत रे पाणी री पछांट लाग पाणी पाछो नीचै पडै । राजा अणतराय साखलो आपरी सभा लगायां ईं पाणी रा परकोटा ने देख देख मन में मावै नीं । आपरा लांबा चोड़ा परवार रे वीचै बैठयो वो पाटण री लंका सूं होड़ करै ।

जाजम बिछ री, जाजम पै सफेदभुक चांदणी लाग री, भाई भतीजा सिरदार डावा जीमणां बैठ्या, आप गादी पै छतर छांगेड़ लगायां बैठयो, साम्हा साम्ह मरदंग मजीरा बजाता कलामत बैठ्या ।

वीच में सवासोक छोटा मोटा राजावां ने हाथां में हथकड़चां पैरायां ऊभा कर राख्या । वाने देख देख राजा ने भरम व्हेय रियो के वो सांचै ही लंकापुरी रा राजा सूं कम कोयनी ।

कैदी राजावां ने सलाम करवा रो हुकम व्हीयो । सारा ही भुक्या । आज ही कोई नवी बात तो ही नीं, यो तो रोज सुबै रो नेम हो । नित रा कायदा रे माफग भूंगड़ा चांदणी पै बिखेरणै री वगत व्ही घोळी घोळी चांदणी पै काळा काळा भूंगड़ा छांट दीघा । बापड़ा कैदी भुक्या, गोळ्यां टेक, नीचो मूंडो कर दांता सूं होठा सूं चुगवा लाग्या, जो नी भुक्यो वी रे तीखी तीखी लोह री आरां चुभावता जाय रिया, पींड़ा सूं कळमळाय ज्यूं ही होठा में भूंगड़ा रो दाणां पकड़तो ज्यूं ही हंसी री लैर ईं कूणां सूं वी कूणां तक पूग जाती ।

चुगणै वाळा री आख्यां में रीस, लाचारी गलानि अर सरम रा भाव राजा अणतराय रा दरप ने दूणां कर देता ।

“जाड़ेचा सरदार व्हेग्या है सूघा ।” एक सिरदार, एक कैदी राजा साम्ही आंगळी कीधी ।

“तीन दिन री मरोड़ व्हे, चोये दिन सारा ही सूघा व्हे जावै अपणै आप ।”

“सारी गुजरात ने भेल्ली कर नाथ दीधी है आंपा । अबै वाकी रियो ही कुण है । सारा आयग्या ।” कैदियां ने न्यारा न्यारा गौर सूं गिणता राजाजी फुरमायो ।

“एक वाकी रियो अबै बस गिरनार रो राजा केवाट ।”

“हां” केवाट । याद आई, वीं ने वाकी क्यूं छोड़ो । “आज ही लावो” डावा जीमणां वैठ्या सिरदारां ने हुकम मिल्यो ।

परधान सुजाण साह हंसी कीधी, “ये जदी जावै जदी हजारं आदमी अर घोड़ां रो नास करनै आवै । म्हारा जस्यो व्हे तो वातां ही वातां में पकड़ ले आवै ।”

सिरदारां हाथ जोड़्या, “परधान जी ने हीज हुकम व्हे जावा रो । म्हे ही देखां, वातां ही वातां में पकड़ लागै रो चमत्कार ।”

अणतराय, परधान साम्हा फिर्या, “कह्यो जीने करलै वो मिनख व्हे ।”

“हाजर, सीख बगसाओ ।”

वाळद भरूं मज्जीठ की, कोडी न देऊं डांण ।

लावूं सरवरिया कुवाट ने, तो म्हें साह सुजाण ॥

सुजाण साह मुजरो कर विदा व्हीयो ।

“ऊगा भागोज व्हे तो थां जस्यो । अबखी दगत में आडा आवण्या थोड़ा व्हे । थां कह्यो जो कर बतायो ।”

वादळां सूं वातां करता गिरनार पहाड़ रे गढ़ में राजा केवाट, आपरे भागोज ऊगा राठोड़ ने वधाय रिया । वां पै व्हीया हमला में जीं चतराई सूं ऊगै खून खरावो कर्यां दिना ही मामला ने सम्हाळ, मामा ने वचाय दीधी, वीं चतराई पै मामा मुगध व्हे, ऊगा ने आपरे कनें गिरनार में राख लीधी ।

गिरनार रो ऊंचो पहाड़, वीं पै ऊंचो गढ़ जींरा ऊंचा गोखड़ा में ऊभा मामा भागोज वन री सोभा देख रिया । तर भरंग पहाड़ ऊंडा ऊंडा खाळ्या, भर भर भरता भरणां, नाचता मोरया, उछळता हिरण, जाणै देखवो ही करो । वांरा सरीर रे अड़ती लगी वादळी अठी सूं आई वठी ने निकळगी, कपड़ा पै नमी रा सैनाण छोड़गी ।

नीचै पहाड़ री तळेटी में लाखी दणजारो पड़्यो, घरयो सामान बेचवा रो लीधां । वींरा डेरा साम्हीं आंगळी करता केवाट कह्यो, “भागोज, ईं दणजारा कनें ढाल घरयो बढिया, सुणी है ।”

“मंगवो मामाजी ! बुलावो भेजूं ?”

बण्णजारो आयो । ढालां नजर कीवी । वां में असल गैडा री एक ढाल । तरवारं रा वार कर परीक्षा कीवी, एक खुरडो पड़घो नीं, रामचंगी रो गोळो ढाल माथै वाह्यो, रंग री चटक तक नीं उतरी । ढाल मामा भाणेज रे हिया में उतरगी ।

“बतावो ईं ढाल री कीमत काई ?”

“कीमत ? जो वसत पिराणां री रक्षा करूं वी रो मोल ही काई ?” बण्णजारं चतराई रो उत्तर दीवो ।

“बा तो खैर है ही, परण मोल बतावो ।”

“मोल काई अरज करूं ? पसन्द आयगी तो म्हारी तरफ सूं नजर है । आपरा सरीर री रक्षा करैला तो मोल वसूल व्हे जावैला ।”

“नां नां” करता राजा रे हाथ में बण्णजारं ढाल नजर कर ही दीवी ।

“मामाजी या ढाल तो म्हूं राखूंला ” कैता कैता ऊगै, ढाल ने आपरा हाथ मे लेय लीवी ।

“यूं एक हाथ सूं तो ताळी मत बजावो, भाणेज ।”

“ऊगो तो एक हाथ सूं ही ताळी बजावै आप देख ही राखी है ।”

“यो तो खैर भाई वन्वां रो मामलो हो परण कदी अवखी पड़ैला जद देखां, एक हाथ हूं ताळी किच तरै बजावो” मामाजी वोल्या ।

“बगत आवैला जद ऊगो बताय देला । नीं बतावै तो रजपूताणी रा नीं चूंल्या ।” ढाल री बगसीस रो मामाजी सूं मुजरो कर ऊगो नीचै उतरघो ।

मोको देख बण्णजारं अरज कीवी, “या ढाल ही आप सिरदारं रे अतरी पसन्द आई तो आप घोड़ा देलावो तो काई करो । एक तो जळहर घोड़ो है, पसन्द आवै तो आप रखावो ।”

“मंगवो अवार रो अवार ।”

बण्णजारं हाथ जोड़्या, “माफ करावो, अठं तो आय नीं सकै । वीं घोड़ा ने तो सदा ओढायां राखूं, खाली चार सूम सूम उघाड़ा रैवै । रोज घूप खेवीजै, लूण उतारीजै, पाणी पीवा तक ने वारै नीं काहूं, डेरा में ही पाणी पाळं । मुलाहिजै करवा ने तो नीचै हीज पधारणो पड़ेला ।

केवाट सूं घोड़ा री तारीफ सुण रियो नीं गियो, वणजारा रे लारै वीरे डेरे गियो । घोड़ा ने देखतां ही मन राजी व्हेग्यो, असली जळहर घोड़ो, पुट्टा पै थाप देवतो, देखतो रैग्यो ।

“घोड़ो कांई है चीज है, थां कह्यो जीं सूं सवायो ।” केवाट रो मन वाग वाग व्हेग्यो ।

“मन तो राजी व्हेला आपरो ईं री चाल देख्यां ।”

“कसावो जीण ।”

एक घोड़ा पै केवाट अर दूजा घोड़ा पै वणजारो ।

“च्यार कोस दोड़ै नीं जतरै तो ईं री चाल ही नीं जमै । दोड़ायनै ईं री चाल तो देखाद ।”

घोड़ा छकड़ी करता दोड़वा । लाग्या जांगुं पाणी रो रेलो जाय रियो व्हे । च्यार कोस तांई एक पट्टी भाग्यां गिया ।

“ठैरो” री आवाज रे लारै पनरा बीसेक सवार ससतरां सूं सज्या केवाट रा घोड़ा रे घेरां देय दीघो ।

वणजारो घोड़ा सूं नीचै कूदयो, ठळोकळी करतो मुजरो कीघो, “खम्माघणी । म्हूं पाटण रो परधान हूं । पाटण पधारो ।” खणण करती केवाट रे हथकड़्यां पड़गी ।

“कर सलाम” ! कैदी राजांवां री ओळ में हथकड़्यां पेरचां केवाट ने अणतराय हुकम दीघो ।

“कांई वात रो मुजरो करूं ? मुजरो करावा रो सोक व्हे तो वेटी ने परणा, जमाई वणां जो सुसराजी ने मुजरो करूं ।”

जतरा रोव सूं अणतराय हुकम दीघो, वतरा ही रोव सूं केवाट जवाव दीघो । चांदणी पै भूंगड़ा विखेरचा, केवाट रे दीखी तीखी आर चुभाई पण नीं तो सलाम कीघी नीं भूगड़ा ही चुग्या । रोज सुवै या री या व्हे पण केवाट नमै नीं ।

अणतराय हैरान व्हे, एक कठपीजरा में केवाट ने वन्द कर दीघो । तीनूं पासै तीखा तीखा खीला गडाय काढ्या जो पसवाडो फेरचां चुमै, गैला रे माथै कठपींजरो मेलाय दीघो । आता जाता आदमी कठपींजरा माथै पग देता निकळै ।

“राजा आज दरीखाना में नीं पधारचा ?”

“नीं, काल ही नीं पधारचा, रावळा में विराज रिया है ।”

“तीन दिनां सूं गैर मे’लां में हीज पोढणो व्हेय रियो है के ?” एक जगणों धीरेक रो वोल्यो ।

ऊगै कह्यो, “जनाना में खबर करो, मन राजी नीं है काई, वारें क्यूं नीं पधारचा ?”

पाछा आय खबर दीघी, रावळा में तो तीन दिन व्हेग्या पधारचा ने ।

खळभळो मचग्यो । एक दूजा ने पूछवा लाग्या । “बणजारा रे साथै घोड़ो दोड़ाबा ने पधारचा जठा पछै री म्हूं नीं जाणू” खास खवास बतायो ।

“बणजारा रो डेरो ही वी सांभ ने लदग्यो ।”

ऊगो वोल्यो “गजब व्हेगी, घोखो । वैंम अणतराय रो आवै, राजावां ने पकड़ पकड़ भेळा करवा रो वी घघो कर राख्यो है ।”

मैंगळ भाट ने कह्यो, “जावो पाटण में जाय नीगं करो । श्रीरां री तो पाटण में पूग व्हे नीं, पैरा रो इन्तजाम घणो करड़ो, भाट तो गावतो बजावतो, मांगतो खावतो परो जाय कोई पूछै नीं ।”

अणतराय सभा जोड़्यां, कैदी राजावां ने भूंगड़ा चुगाय रियो । जोम में भरचो आरां चुभाय रियो । कलामत गाणों कर रिया ।

मैंगळ भाट साम्हे ऊभो व्हे सुभराज दीघो ।

“राजावां रा मान ने मरोड़ण्यां, गढपतियां रा गरब ने गालण्यां, छत्रपतियां ने नमावणहार, राजा अणतराय आज रा वगत में थारा जस्यो कोई व्हीयो नीं व्हे ।”

अणतराय री जोम में चढ़ी आख्यां ओर ऊंचो चढगी, “भाटराज, कठै रैवास ?”

“गढ गिरनार रो हूं ।”

“घर रा घणी ने सुभराज दे आया काई ?” अणतराय घमंड में भूमतै पूछ्यो ।

“हाल तो दीघो नी, हुकम व्हे तो दे आवूं ।”

“हां हां जरूर, देख आवो, घण्यां री सोभा ।”

कठपीजरा कनै जाय मैंगळ भाट सुभराज दीघो । केवाट पीजरा में सूतै सूतै कुरव दीघो, वैठणी तो आवै नीं पीजरा में ऊपर लांवा लांवा भाला लाग रिया ज्यूं । केवाट दूहो कह्यो,

मैंगळ ऊगा ने कहे, कठपींजर केवाट,  
छाती ऊपर सेलड़ा, माथा ऊपर वाट ।

थूँ कहतो तिरण बार, ताळागढी वाळा घणी,  
ताळी हम्में वजाव, एकरण हाथै ऊगडा ॥

“मैंगळ ऊगा ने कीजै केवाट कठपींजरा में पड़यो है । माथा ऊपरै गैलो वैय रियो है । छाती ऊपर सेलड़ा लाग रिया है । ऊगा, थूँ कैवतो, एक हाथ सूँ ताळी वजावूँ जो अरवै वगत पड़ी है, वजाव ।”

मैंगळ जो अंख्यां देखी सारी हगीगत ऊगा ने आय सुणाई ।

ऊगो, रावळा में आयो । मूंडागै थाळी पड़ी जीरे अंगळी नीं अड़ाई । वंधी कमर यूँ रो यूँ बैठयो, आधी रात व्हेगी परण ढोल्या पै पग नीं दीघो । अतरा ऊंडा सोच में पड़यो के दीने खबर ही नीं के दो घड़ी सूँ गेहलोतणी वैठी वींरा पग दाव रो है । वठीने वो भांकयो ही नीं । पग दबाय लीघा, ध्यान खैचवा ने मोकळो खांस लीघो, दीवा री वाती ऊंची नीची कर अंधारो उजाळो कर थाकी परण ऊगो ऊंची अंख कर कठी ने हीं नी भांकयो । हैरान व्हे गहलोतणी बोली ।

“काई सोच में पड़्या हो ?”

“काई सोच में पड़्या हो ? सुणयो कोय नी काई ? कोई कसर री है अरवै ?” ऊगो चिगड़यो ।

“आप सोच मत करो” गहलोतणी बोली, “मूँ वाळपणां में पाटण में रह्योड़ी हूं म्हारी मासी रे घरै, मूँ जाणूँ वठा री सारी हगीगत ।”

“बता बता” ऊगारी अंख्यां चमक गी । “जाणूँ जाणूँ जो वठा री सारी बात बता ।”

“एक तरकीब है, समंदर चारूँ कानी व्हेवा सूँ घोड़ां रे चारा री घणी अरकाई रैवे, वठै रातव वारों तो घोड़ां ने घणो ही खुवावै परण चारा रो तोड़ो रैवै जो वारां सूँ कोरड़ अर घोव मांगणी पड़े । घोव अर कोरड़ लेर जावो तो काम वण जावै ।”

“साबास रजपूताणी । म्हारा माथा री मोटी गाळ उतारी ,”

गहलोतणी और ही वठा री फोज फांटा, गैला घाटा, अणतराय रो सुभाव, उठयै बैठयै रो वगत सारी वातां बताई ।

पाटण रा गढ़ री पोळ कनें करसां रो साथ ऊभो ।

“राजाजी रे अरजाऊ आया हां” सुण'र पौळचे रोक्या नीं । आगै आगै करसां रो पटेल, लारै लारै करसा । गोडा गोडा ताई ऊंची विना पाण काढी घोवत्यां, रेजा री

अंगरखी पैरचां । माथै पांच पांच हाथ लांवा पोत्या वांध्यां । हाथां में मोटी मोटी डांगा ले राखी । पटेल हाथ में ढाल तरवार लीधां, माथै पागड़ी वांध्यां, राजाजी कने हाजिर व्हीयो ।

पटेल करसां री बोली में बोल्यो, “राम राम, राजाजी, राम राम । समाज्या तो हो ?”

राजाजी वारा गंवार पणां पै मुळक्या ।

पटेल बोल्यो, “म्हां करसा तो कांकड़ रा रोझ हां । बोलणो, थोड़ो ही आवै माफ करियो ।”

राजा पूछ्यो, “कठै रैवो, अतरा दूरा क्यूं आया ?”

“माळवा रा रैण वाळा हां, आधी पांती देवां तो ही राज खंचल घणी करै । बैठ वेगार घणी ले । घणी रे आगै सुणाई नीं । सुणी एक थारे राज मे रैत ने सुख है, जो थां कने आया हां ।”

राजा कह्यो, “थां अठै बसो, आध में ही थारे रैवायत करांला । आद्या खेत टाळने थाने देवांला ।”

अतराक में एक करसो, घोड़ा रा मूंडागै पड़्या चारा रो पूळो उठाय, पटेल ने देखावतो बोल्यो, “पटेलां ! देखो, राजा रा घोड़ा अस्यो चारो खावै ।”

पटेल बोल्यो, “भाराज म्हारे कने घोव कोरड़ है, थां देखो ।” पांच दस पूळा काढ राजा रे आगै राख्या, भाई भतीजा सारा ही कोरड़ सराई ।

“असी घोव कोरड़ आपणां घोड़ा रे आवै जदी है ।”

“म्हांने आवा दो, वारा ही मी'नां थारा घोड़ा ने असी घोव सूं घपाय दांला ।”

“असी घोव कोरड़ थां म्हांके घोड़ा सारू देवता रैवोला तो आध में ही म्हें थाने रैवायत दांला ।”

“म्हांरे लारै घोव कोरड़ लायां हां जो थारा घोड़ा रे राखलो ।”

राजा राजी व्हे साळू री पाग वंधाय, पटेल ने सीख दीधी ।

“थारे पोळयां ने कै दो जो म्हांने रोकै नीं काले चारो लेय'र म्हां आवांला” जात जात पटेल कह्यो ।

समदर रे किनारे नावां लाग री । सातसो ही चारा रा भारा सातसो ही गांठां कोरड़

री बंधी लगी जां में ससतर छिपाय राख्या । सातसो ही आदमी गांठां ने ले नावां पै चढ पाटण में उतरचा ।

राजा, दरीखाने वैठयो, कोरड़ घोव लाय नजर कीधी, सगळा जणां सुवापंखी घोव रा भारा देखनै राजी व्हीया ।

“कठै न्हांखां ईं चारा ने ?” पटेल पूछयो ।

“बुरज मे”

भारा न्हांकवा ने गया, भटा भट भारा खोल तरवारां काढ़ी । एक दम अणतराय री सभा पैट्ट पड़चा । जाणै खेत काटवा लाग्या । राजा ने ढालां री ओट दे पकड़ लीधो । कोळाहळ मचग्यो । तरवारां री भणभणट केवाट कठपींजरा में पड़चो सुणी, आरांद सूं उछळतो बोल्यो,

कोळाहळ कटकेह, कहीजै पाटण में किसो ।

भींक लागी भटकेह, आयो दीसै ऊगलो ॥

पाटण में सेना रो कोळाहळ व्हे रियो है । भटका री भींक लाग री है । जरूर ऊगो आयो है ।

हूंका वागी रीठ, भोट पड़ी माथां भड़ां ।

तोड़ण मामा त्रीठ, आयो दीसै ऊगलो ॥

तरवारां री रीठ वाज री है, भड़ां रा माथा पै भोट पड़ री है, मामा रा बंध तोड़वा ने ऊगो आयो दीखै ।

पाटण रा वींज गढ़ में सभा लाग री । पण आज कैदी गादचां पै वैठचा है । अणतराय वींरा परवार नै सिरदारों सूधी हथकडचां पैरचां, ऊभो । गादी मसनद पै चंवर छतर लगायां केवाट वैठचो, कनें ऊगो बेटा री जगां वैठचो । ऊगै हुकम दीधो,

“सगळा कैदी राजावां ने सलाम कर ।”

वींज सफेद चांदणी पै भूंगड़ा विखेरचा, “चुग” । वे हीज तीखी तीखी आरां अणतराय रे चुभोई । सलाम कराई भूंगड़ा चुगाया, ऊगै कहचो,

“विना कांईं कारण रे थें यां वेकसूरां ने अतरो दुख दीधो, जींरो फळ थाने मिलग्यो वसूला सूं कटाय थारा टुकड़ा टुकड़ा करदे तो सजा थोड़ी । पण थनें माफ कीधो, या सजा मिली जो ही धणी ।”

सुजाणराय साम्हो भांक्यो, “क्यूं ? वता थनें काईं सजा मिलै ?”

परधान भट बोल्यो, “म्हारी काईं गलती ? जीरो लुण खावां वीरा हुकम री तामील करां । धरियां रा भला ने दोड़ां, अवे आप धरणी, आप हुकम देवोला जो ही करांला ।”

“थनें अर थारा धरणी ने छोड़ां पण म्हां कैवां ज्यूं कर । अणतराय री बेटी ने तो राजा केवाट ने परणा और दूजा सारा राजावां ने परवार री बेट्यां परणा ।”

दूजे ही दिन चंवरचां मंडायनें सगळां रा व्याव कर दीघा ।

ऊगै कड़ा सिरुपाव दे घोड़ा पै वैठाय, अणतराय ने पाछो पाटण देय दीघो । “म्हारा सगा है सगां री सी इज्जत व्हेणी चावै ।”

केवाट, ऊगा राठोड़ रा कांधा थपेड़ता कह्यो,

राठोड़ां री कुळ त्रिया, सीळा गरभ न धरंत ।

ज्यां भरतार न भज्जणां, सो भज्जणां न जणंत ॥

केवाट राजा ने अणतराय री बेटी अर दूजा कैदी राजां ने वीरा भाइयां री बेटियां ने परणाय, जवांई वणाय सीख दीघी । जुहारी रो नारेळ भेलतां केवाट अणतराय सूं मुजरो कीघो, “सुसराजी, मुजरो । जवांई वणनें मुजरो कर रियो हूं ।”



## डाढ़ालो सूर

एक समै री बात, आवू रा पहाड़ में एक डाढ़ालो नूर रैवै । सूर मूंडण नै वारा च्यार छेवरचा ! आवू रो पहाड़ तर भंगर व्हीयो लगे, भांत भांत री वनसपती उग्योड़ी । जगां जगां पाणी रा भरणां वैंय रिया । सूर खूब चरै, आछा नरमळ पाणी में कलोळा करै, मूंडण अर छेवरचा रे लारै मस्त रै । घणां आणंद में दिन बीतै, आछो खाय खायनै सूर मच रियो । मोटी मोटी दांतळथां वारै निकळ री अर पेट जमीं के अड़ै । खांवता पीवतां, मौज करतां घणां दिन व्हेग्या पहाड़ पै मोटा मोटा रुंख, भाड़ सुं भाड़ अड़ रियो, भगवान रे करणी जो वांस सूं वांस रगड़ाय वासदी लागी । वासदी लागी तो अत्ती लागी के आखो आवू रो मंगरो सळगयो, रुंख वळग्या, सारो जंगळ भसम व्हेग्यो ।

खळ खळ वैंवता लगा भरणां सूखग्या । आवू रो रूप ही कुरूप वैंग्यो । चरवा ने चारो रियो नीं, खावा नै वनसपती री नीं । मूंडण छेवरचां ने लीघा अठीने वठीने रुळै परण पेट भरै नीं । भूखा पाछा आयनै थोह मांयने पड़ै । जदी एक दिन मूंडण बोली “भूखा कतराक दिन रैवां, यूं भूखां मरतां तो दिन काढ़णी आवै नीं, चालो कठै ही ओर कठै चालां जो पेट भरनै तो खावां ।”

डाढ़ालो सूर बोल्हो “एक जगां तो है, जठै खावाने ही घणो परण पाछा जीवता आवां के नीं ।”

मूंडण कह्यो, “भूखां मरतां मरां जींरी जगां लड़ता तो मरां । क्यूं जीवतै जीव यां छेवरचा ने भूखां मारो ।”

सूर कह्यो, “चालो सिरोही राजाजी रा राज में चालो, व्हो म्हारे लारै । आगं आगं तो डाढ़ालो सूर चालै अर पाछै पाछै मूंडण अर छेवरचा । आडै मंगरै उतरचा खाम खाम व्हेता आवू रे नीचै सिरोही रा राज में आया । देखै तो सांठा रा वाड़

ऊभा, जो गेहूँ आड़ै माळ ऊभा । हरचो पट्ट पड़चो कोसां ताई धान ही धान । भूँडण तो ले छेवरचा ने राजाजी री घर खेती में जाय वळी । भूखा ! जाय पड़चा खावा ने । खाघो तो थोड़ो नै बगाड़ कीघो घर्णां । पेट भरनै जाय सूत्या । खूब धान चरै, सांठा रा वाड़ तोड़ै । एक एक बिलांत घरती ने खोद दीघी । खाय खायनै मस्त व्हेग्या । एक दिन सूर तो चरनै भाड़ में पड़चो, भूँडण छाया में वैठी, छेवरचा रम रिया । अतराक में रुखाळा आया, देखै तो खेत ने तो ऊँघो कर राख्यो, सांठा भांग्या पड़चा, खेत खुदचोड़ो पड़चो, धान मरोड़चा पड़चा, छेवरचा रम रिया । रुखाळा ने आई रीस उठायनै एक भाटो फँक्यो ।

भाटो फँकणां व्हीयो नै तो छेवरचा खो खो ' करता रुखाळा रे लारै व्हीया । आगँ रुखाळा नै पाछै छेवरचा, खेत बारै काड़ दीघो । रुखाळै जायनै दूजा रुखाला ने बुलाय लायो । दस बांस जणां लाठचां भाला गोफणां लीघां आया ।

गोफण भाड़ में वाही, भूँडण डकरनै निकळी, भूँडण व्ही लारै, भाला अर लाळ्यां हाथां री हाथां में रँगी । मार मार टूँडा री रुखाळा ने भगाय दीघा । ले छेवरचां ने चरवा लागगी ।

रुखाळा भाग्या भाग्या राजाजी कनें पुकारू गिया के एक डाढाळो सूर थोह घाल्यां वैठ्यो है । आगँ देखै तो राजाजी तो रावळा में पधारचा थका । घोड़ा ने तो हरचा वाघ दीघा, सिरदारं ने घरँ जावा री सीख देय दीघी अर आप रावळा में दो मीनां सारू दाखल व्हेग्या । हुकम देय राख्यो कोई खास काम व्हे तो मांयने अरज कराय दीजो । रुखाळा पुकारू गिया तो चोकी रा सिरदार कह्यो, “मायने राजाजी ने अतरीक वात री काई अरज करावां कोई गनीम चढनै तो आयो नी है । आयो तो सूर है, चालो सिकार आई ।”

मे'लां रा सारा ही सिरदार भाला ले जाड़चां वांघ घोड़ा चढ़चा । जाय थोह ने घेरी । घोड़ां री कळहळ सुणनै भूँडण भांकी तो थोह ने तो घेर राखी ।

सूरो सूतो भाड़ में, भूँडण पैरा देय ।

जाग निंदाळु सायवा, कटक हिलोळा लेय ॥

वट्टकां रा फेर व्हीया, गोळियां छूटवा लागी, भूँडण रीस में आय वारै निकळी । घोड़ां रे साम्ही व्ही । भालां रा वार व्हेवा लाग्या, गोळ्यां री रीठ वाजवा लागी । भूँडण तो खोखारा करती रपटी जो घोड़ां ने टूँड सूं उछाळती, सवारां ने घूळ भेळा करती अठीने वठीने निकळगी ।

भूँडण छेवरचां ने छाती रे लगाय वैठगी । घोड़ां रा मूँडा पाछा फिरग्या, चढनै आया लगा सवार आपरी पागड़चां संभाळता, फीका मूँडा कीधां पाछा फिरग्या ।

सूर, भूँडण छेवरचां ने लीधा खूब चरै, आणंद करै और घणां ही जणां सूर पै चढ़ चढ़नै आवै पण आपआप रा मूँडा लेयनै पाछा फिरै । सारा खेत ने उजाड़ काढ़यो । राजाजी रा घोड़ा हरचा वंध्या जांरे हरचा जौ कठा सूं आवै ? हवालो तो सूर चर रिया, रुखाळां रो जोर चाले नीं । मीना डोढ़ सूं राजाजी रावळा सूं बारै पघारचा, हुकम व्हीयो, “घोड़ा मुलाहिजा करावो । हरचा चरनै घोड़ा कस्याक निकळचा है ?”

राजाजी गोखड़ा में विराज्या, घोड़ा मुलाहिजा व्हेवा लाग्या । घोड़ा माता नीं दूवळा दूवळा दीख्या । राजाजी साहणी पै नाराज व्हीया, “अरे घोड़ा मच्या क्यूं नीं ?”

साहणी हाथ जोड़ अरज कीधी, “अन्दाता, घोड़ा मचै कठा सूं ? हरचा जौ तो पूरा चरवा ने ही नीं मिल्या । एक एकल सूर हवाला में बड़ रियो जीं सारा हवाला ने ऊंधो कर दीघो ।”

राजाजी तो रीस सूं बळग्या । रीस कीधी, “थां अठै अतरा भेळा व्हे रिया जो कांई काम रा, थां सब नाजोगा हो ।”

कोटवाळ हाथ जोड़चा, “परथीनाथ, यूं हुकम नीं व्हे । वीं सूर ने मारवा ने ये सगळा ही भड़ चढ़ चढ़नै गिया पण खाटल्यां में भर भरनै घायलां ने पाछा लाया । सूर कांई है काळ रो अवतार है ।”

या सुणनै तो राजाजी ने घणीज रीस आई, हुकम दीघो, “करावो त्यारी अवार री अवार ! वीं सूर ने मारनै लावूं ।”

सिकार री त्यारी व्हेवा लागी । नगरां पै चोव पड़ी लुहार भाला सुधारवा लाग्या ।

एरण ठमक्को म्हें सुण्यो, लोहो घड़े लुहार ।

सूरां सारूं सेलड़ो, भूँडण सारूं भाल ॥

दूजे नंगारे पाखर मंडी । तीजो नंगारो असवारी रो व्हीयो । नगरा पै डंको पड़यो, “कडिंग घींग कडिंग घींग” नै सूती लगी भूँडण चमकी । “डाढ़ाळा ! ये नंगारा आपां पै वाज रिया है । आवै खैर नी ।”

डाढ़ाळो बोल्यो, “भूंडण सोच मत कर वाजवा दे निसाण । आज धार भरतार रा हाथ रण में देख जे ।”

डाढ़ाळो दांतळियां घिसतो घिसतो भूंडण ने कैवा लाग्यो, “आज कै तो मे'लां में पदमणियां हीज रोवैला, कै म्हारो मांस हीज बटेला ।”

“काय रोवणू पदमणी, कै मंस बटाऊं हट्ट”

नंगारा पै रणताल वाज री, निसाण फरक रिया, रावजी सिकार पै चाल्या ।  
नंगारखाना री सरणायां वाजी,

“सूररिया रे धीमो मधरो चाल ।  
भाखर रा भोमियां धीरो मधरो चाल ॥”

अठीने तो रावजी रा रसोवड़ा में सूरा रो मांस रांघवा ने सिल बट्टा पै वेसवार वांटवा लागी । वठीने डाढ़ाळो दांतळिया घिस घिसनै पांण लगावा लाग्यो ।

राजाजी सिकार चढ़्या । आगं आगं नोकरचा चाल्या, पाछे फोजां । अड़वी तासा वाजवा लाग्या । घोड़ा हणणाय रिया । हाथी भूम रिया । सिकारी भाला हाथां मे लीघां घाड़ां री वागां मरोड़ रिया । वाका मूंडा, रा घोड़ा एकी बेकी खेलता चाल्या, जाय जंगल ने घेरचो । हाको लाग्यो, हाका रा आदमी भाटा फेकवा लाग्या, घोड़ां रो घेरो घाल दीघो, नका नाका पै हाथी ऊभा कर दीघा । भालां री अणियां सूं अणियां अड़गी ।

भूंडण बोली, “डाढ़ाळा ! सूतो काई है ऊठ थारे माथे कटक हिलोळा लेय रियो है ।”

डाढ़ाळो बोल्यो, “नचीती रे ! यां घोड़ां ने अवार टूंड सूं उलाळ फेकू तो जाणजे धारो भरतार है ।”

तुरी उलाळूं टूंड सूं, पाखरिया हजार ।  
पाला मारूं पांचसो, तो भूंडण भरतार ॥

भूंडण बोली, “डाढ़ाळा ! थोड़ो ठेर । दो घड़ी थारी भूंडण रा हाथ ही देखलै ।”  
या कैर भूंडण रौरूप कीषां । झाड़ वारै निकळी ।

हाको व्हीयो, “आयो आयो ।”

मूंडा आगला रावजी ने अरज कीधी, “मुलाहिजो व्हे, वो एकल ऊभो ।”

रावजी री नजर पड़ी, “अरे या तो मूंडण है, दांतळियां कठै ? फिट रजपूतां, ईं लुगाईं सूं थां लड़ लड़ने हारचा आज तांईं । डूव मरो रे कै !”

मूंडण तो घोड़ां माथै रपटी । बंदूकां रा भड़ाका व्हेवा लाग्या नै वरछां रा वार । वल्लम हाथां में लीधां घोड़ां ने छोड़चा लारै । मूंडण रे लोही भर रियो, डील में गोळचां गरक व्हेय री अर वा रपट रपटनें घोड़ां ने उलाळ री । घड़ी दीय तांईं मूंडण भूंकती री, लोह्यां सूं लथपथ व्हेगी, मूंडै भाग आयग्या । मूंडण तो कर हिम्मत नै दीधी एक दड़बड़ी जो घोड़ां रा घेरा ने फाड़ती थोह मे डाढाळ तीरै जाय पूगी । ऊभी रै डील घंघुण्यो तो वरछां अर फाळां रो सवा मण लोह डील सूं उछट नीचै जाय पड़चो ।

डाढाळो वोल्यो, “सावास ! मूंडण सावास !! अवे थारा भरतार रा हाथ ही देखलै ।”

डाढाळो आयो । टेकड़ी माथै ऊभो रैयनें फोज साम्हो भांक्यो । रावजी री नजर सूर माथै पड़ी । सिकारचां ने हेलो पाड़चो,

“अरे, डाढाळो ऊभो । खबरदार, जावा नीं पावै । जीरा कनें व्हेयनें थो वारै निकळग्यो बीने देस निकालो ।”

डाढाळै मन में विचारी, “कीं वापड़ा री रोजी गमाऊं व्हे न व्हे तो रावजी साम्हो हीज जावूं ।”

गावड फुलाय कान ऊंचा कर डाढाळो तो लगाईं रवड़की । सूधो रावजी रा घोड़ा साम्हो । रावजी वल्लम उठावै उठावै जतरै तो घोड़ा रे पेट रे नीचै वळ नै ठोकी दूंड री, घोड़ो उछळनें पड़चो दस हाथ दूरो, लारै रा लारै रावजी घड़ाक । “खमा खमा” करनें रावजी ने उठावा ने मिनख दोड़चा । घोड़ा रो पेट चीरणी आयग्यो । रावजी भट दूजा घोड़ा पै सवार व्हे लगाम खैची । अवे जुद्ध व्हेवा लाग्यो ।

साठ वरस रो तो सूर, पांच वरस रो घोड़ो अर पच्चीस वरस रो सवार । यांरो जदी जुद्ध व्हेवा लागै तो देखवा ने एक घड़ी सूरज रथ रोक दे वो गंदन्तो डकर डकरनें रपटै, घोड़ां ने दांतळ्यां सूं चीर न्हांक्या, पंदलां ने दूंड सूं उलाळ दीधा । हाथ्यां रे पगां वीचै निकळतो, जोर रो जुद्ध मचायो । घोड़ां रा मूंडा में भाग आयग्या, सवारां रे पसीनीं टपक रियो, घायल कुरणाय रिया, डाढाळो लोह्यां

में भगावोळ व्हीयो ऊभो । वीरी चंपा बरणी दांतळ्यां लोह्यां में लाल व्हेयगी ।

फोजां दल ने फेरनै, जीतण ऊभो जंग ।  
चम्पा वरणी दांतळी, भरी कसूमल रंग ॥

गोळियां री रीठ वाज री है, बल्लमां रा फाळ डाढाळा रे डील में जगां जगां धंस रिया है । डाढाळो रपटै जांगै तोप रो गोळो छूटचो व्हे । जठीने रुंगी मार'न निकळ जावै वठीने घायलां रा हेर व्हेता जावै । साहजांही तील रो दो मण लोह गोळियां रो नै फालरो डाढाळा रा डील में रैग्यो । यूँ युद्ध करतां करतां सांभ पड़गी । डाढालो तो अंधारो पड़तो देख दे दड़बड़ी आपरी थोह आड़ी ने भाग्यो ।



## लालजी पेमजी

भाटीपा में जसलमेर कानी एक लालजी भाटी रैवै ! वे चोरी नी कळा में घणां हुंस्यार ! आपरी जवानी रा दिनां में वां घणी हाथ री चतराई कीघी ! अरवै वूछा व्हेग्या पण मन में उछाह घणों, काम पड़ै तो अरवै ही पांचसो कोस रीं मुसाफरी कर आपरी कळा ने बतावा ने त्यार । लालजी ने एक सोच घणों, आपरी दाईं रा डोकरां साथै वंठया, निसासा भर कंबो करै,

“आजकाल रा छोरां में काई तन्त नीं । कोई हुंस्यारी नीं, फुरती नीं, चतराई नीं । कोई ईं कळा ने सीखवा री हूस ही नीं राखें । सिखावां तो कीने सिखावां ? म्हारे वेटे व्हे तो दुनियां देखती अस्यो सिखातो !”

घरवाळी डोकरी समभावै “पार रे दुख थे दूवळा क्यूं ? आखी ऊमर घणां ही वंधा कीघा, अरवै तो रामजी रामजी करो ।”

पण लालजी तो ईं दुख मे ही घुळ्या जावै के या विद्या तो लुपत व्हेती जाय री है । म्हारी विद्या कोई सुपातर मिलै तो बीने सिखावूं पण यां पाछला छोरां में तो कोई ऊरमा वाळो दीखै ही नीं । अठिने वठीने नींगे करता रैवै । वारा कान में पेमजी सेखावत रे नाम रो भणकारो पड़्यो । सुणी, पेमजी जुवान छोरो है, हुंस्यार है अर पांच सात जगां आछी चतराई रा हाथ बताया है । डोकरा रो जीव थोड़ो ठंडो पड़्यो चालो कोई वण्यो तो है । यूं घरती माता कसी वांभड़ी थोड़ी ही व्हे । लालजी रे मन मे पेमजी ने देखणै रा, वीरी हुंस्यारी पतवाणवा री खांत घणी ।

डोकरी रै नटतां नटतां एक दिन आपरो काळो ऊंट पलाण ही लीघो । अमल रा ठामड़ा खड़िया में घाल सेखावाटी रा मारग में ऊंट रे एड़ लगाई ।

तिरकाल दुपैरी तप री । नीचै रेत तपै, ऊंचै आकास में सूरज तपै । गैला रे माथै, एक रूखड़ा री छाया में लालजी वंठ्या दुपैरी गाळ रिया । कनें ही ऊंट छाया में वंठ्यो चर रियो । आप जाजम विद्यायां वंठ्या, हुक्का री नेज ने पकड़्यां, धीरै

धीरै पी रिया, विसराम ले रिया । अमल रो गाळमो व्हे रियो । नीचै चांदी री प्याली पडी जीं में एक एक टोपा नितर नितर अमल रो पाणी टपक रियो ।

मारग में एक ऊंट खड्यो आवै । ऊंट कनें आयो । आवा वाळो छाया री जगां देख ऊंट जेखायो नीचै उतरयो । आपस मे जैमाताजी री व्ही ।

“पधारो पधारो, कठै विराजवो है ?”

“सेखावाटी कानी रैवूं । आपरो विराजवो ?”

“भाटीपा मे ?”

“भाटीपा में ? घणी आछी बात म्हूं ही वठीने ही जाय रियो हूं । लालजी रो नाम घणो सुण्यो । वारी तारीफ सुण सुण मिलरां री घणी इच्छा व्ही । देखां तो सरी कस्याक है ।”

“लालजी तो मिनख म्हंने ही कैवै है” डोकरो मुळक्यो । “आपरो नाम ?”

“पेमजी”

“भली बात म्हूं तो आपसूं ही मिलण ने आय रियो हो !” उठ वाथ में वाथ घाल मिल्या । हुक्का री मनवारां व्ही । अमल पाणी कीधा । वातांचीतां व्हेवा लागी । दोवां रे ही एक दूसरा ने परखवा री अर आपरी चतराई बतावा री मन में ।

“चालो तो कठै ही चालां ।”

“पधारो, और आया कीं सारू हां ”

“थां जुवान हो, थां कांई चतराई बताओ ।”

“आप दानां हो, पैलां आप ही बताओ ।”

“पेमजी, आपां चालां तो हां पण पैलां सुगन तो लेलां ।”

“देखो ईं रूख रे माथै, वा कुडदांतळी वोलै, वा अंडा सेय री है । वोलवा रो टूंकारो मारै जीरे सागै एक पल सारूं या ऊंची व्हे भट पाछी अंडां माथै बैठ जावै । थें जाओ, चतराई सूं ईं पंछी रा अंडा काढ लावो ।”

पेमजी उठ्या, ऊंट रा चार मीगणा ले रूख माथै चढ़्या । धीरै धीरै पंछी रे कने गिया । ज्यूं ही वा टूंकारो मारवा रे सागै ऊंची व्हे ज्यूं ही अंडो तो उठाय ले अर मीगणां वीरे नोचै राख दे ।

पेमजी ने ऊपरै जावा देय, लालजी धीरै धीरै लारै रा लारै चढ़्या । ज्यूं पेमजी

मींगणों मेल अंडा ने आपरी जेव में घालै ज्यूं लालजी पेमजी री जेव में सूं अंडो तो काढले अर मींगणों घालदे ।

एक ! दो !! तीन !!! चार !!!!

चार ही अंडा पेमजी री जेव में सूं काढ, मींगणां घाल भूट नीचै उतर आपरी सागी जगां, हुक्का री नेज ने मूंडा में घाल बैठग्या । जांणै कठै ही गिया ही नीं । पेमजी राजी राजी आया ।

“ले आया ?”

“हां” गरव सूं माथो ऊंचो करता पेमजी बोल्या ।

“अै लो” जेव में हाथ घाल साम्हो कीघो ।

लालजी हंस्या, हाथ में मींगणां । पेमजी चकराग्या, “ओ काईं व्हीयो”

हंसता हंसता लालजी आपरी जेव सूं अंडा काढ्या ।

पेमजी सुगन विगाड़ न्हांक्या, “खैर माल तो आवैला पण एक र हाथ सूं निकळ्यां पछै ।”

ठै, ठै, ठै, ज्यूं घड़ियाल रे माथै इंको पड़ै जीरे लारै री लारै खीलां माथै लालजी नै पेमजी हथोड़ा री मारै । रात रो वगत, वारा वजी, घड़ियाल पै वारा डका पड़्या अर वारा ही साख्या लाग्या । वारा र वारा चोईस इंका रे लारै रा लारै चोईस खीला गाड़ता अेमदावाद रा किला री भीत पै लालजी पेमजी चढ़ग्या । वठै घुमटा पै सोना रा कळसां काटै ।

आधी रात रो वगत, सारी दुनियां सोय री । किला रे कनें एक सुनार रो घर ।

“सुनारी, सुण, कठै ही सोना माथै करोत चाल री है, म्हूं जावूं नींगै करूं ।”

सुनार वारै पाछै लाग्यो, मसाणां में आया । सुनार मुरदां रे वीचै जाय सोयग्यो ।

“पेमजी, यां चारूं ही कळसां ने जमीं में गाडां जीसूं पै लां थां देखतो लो यां मुरदा में कोई जीवतो आदमी तो नीं सूतो है ।”

पेमजी रे हाथ में भालो । एक एक मुरदा कनें जावै अर जांध में भाला री मारै । देखले, लोही तो लाग्यो नीं । मुरदा रो लोही कठा सूं लागै । ज्यूं ही सुनार रे भालो मारयो लोही सूं भालो लाल व्हेणो ही हो पण सुनार वारै निकळता निकळता भाला रा फळ ने आपरा हमाल सूं पूंछ लीघो । लोही लाग्योड़ो दीखै कठा सूं ।

“सारा मुरदा है, कोई सोच नी, गाडो कळसां ने । कालै आय कळस काढ ले जांवाला ।”

पेमजी लालजी तो गाड रवाना व्हीया । सुनार उठचो जो कळसां ने खोद, आपरे घरै ले आयो ।

“कळस तो कोई लेग्यो, खाडो पड़चो है”

“गजब व्ही । जरूर कोई मुरदां भेले सूतो देख रियो हो ।”

दिन ऊगतां जाय कचैरी में ठेको भरचो, सिवाय म्हाके, म्हारी दुकान रे नगरी में कोई कांदो हळदी बेच नीं सकै ।

सुनार धावां री बळत सूं तडफै । अतरी देर व्हेगी, सुनारी हालतांही पाछी आई नीं कांई गैला में ही रैगी, अस्या कांदा हळदी समंदा पार परा गया के ।

“यो कांई रे. कांदा हळदी रो ही ठेको, फिरती फिरती थाक गी ।”

सुनारी बड़ बड़ करती आई ।

“हैं ? कांदा हळदी रो ठेको ? गजब व्हेगी, भारचा, जा दोड़ आपां रा घर रे बारै देख कोई नवो निसाण तो नीं है, देख ।”

“पेमजी, घर रे निसाण कर आया ?”

“कर आयो चालो ।”

दोई जणां आया । देखै तो वसी ही चोकड़ी रो सैनाण सारी गळी रे घरां पै लाग रियो ।

“ईंज हुंस्यारी पै घमंड खाता हा के ? देख ली थांरी चतराई । थां जाओ घरै, म्हूं देख लूंला ।” लालजी लाल लाल आख्यां काढी ।

पेमजी नीचो माथो घाल ऊभो ।

घर घर रे पछवाड़ै कान लगायो । सुनार रे बळत, नींद नी आवै । पड़चो पड़चो कुरणावै ।

“यो घर अर यो मिनख । म्हारी परीक्षा कदे ही गलत नीं निकळै । । लगावो सांतो माल काढां ।”

गैला फंटे, एक सेखावाटी कानी दूजो भाटीपा री दिसा में । लालजी पेमजी माल री पांती करै । दो दो कळस पांती रा लीघा । अवं सुनार रा माल री पांती करवा लाग्या । बराबर आधी आधी कीधी । सुनार वादसा री वेटी रा रमभोळ घड़्या, घणां सुवावणां, सोना रा घूघरा लाग्योड़ा ।

“या जोड़ी, फूटरी घणी, पांती करचां जोड़ खंडत व्हे जावेला, थां पूरी जोड़ ले लो, पेमजी ।”

“या कदी व्हे, पांती में तो एक एक ही आवेला, म्हूं अस्यो घरमहार नीं ।”

“म.न जाओ पेमजी, घर में कळेस व्हेला एक रमभोळ लेग्यां । म्हारी घरवाळी तो डोकरी है । कांईं पैरै, थां लेजाओ ।”

“म्हारी लुगाईं असी नीं जो म्हंने कांईं कैवै । एक थारो एक म्हारो ।”

सोना रो ढेर देख, पेमजी री लुगाईं हरखी नीं मावै । सारो गैणो, पांती में आयो जीने भट पैरयो । पग ऊंचो कीघो पैरवा ने तो एक रमभोळ ।

“दूजो रमभोळ कठै ?”

“वो तो पांती में दूजा रे गियो ।”

क्यूं भूठ वोलो, कोई रांड ने देनै आया हो । म्हंने भोळावो मत ।”

घर में कळेस व्हेत्रा लाग्यो । लुगाईं तो अणखण ले सोयगी ।

“दूजो रमभोळ नीं आवैं जतरै अन्न नीं खावूं ।”

पेमजी ने लालजी रा वोल याद आया । “अवं मांगू तो म्हारो कांईं माजनो जांगै । छानै ले आवूं, म्हारा पै वैंम थोड़ो ही करै ।”

डोकरी पोसाक कर एक पग में रमभोळ पैर सूती जो जाय खोज ले आयो ।

‘दिन उग्यां देखैं तो एक पग में रमभोळ नीं । लालजी ने रीस आई । म्हारी लुगाईं रा पग में सूं काड़नै लेग्यो । म्हारे ही साथै चोट ? मांगतो तो म्हूं यूं ही दे देतो । म्हें तो पैलां ही कहच्यो यूं लेजा ।’

लालजी रीस भरचा विदा व्हीया । पेमजी री व्हू राजी व्हे दोई पगां में रमभोळ पैर सूती । खेत सूं कपास आयो जो मेडी में पड़यो । लालजी कपास में वासदी मेली, पेमजी री व्हू ने उठाय ऊंट पै लाद आपरे घरं ले आया ।

“वासदी लागी, वासदी लागी” गांव रा मिनख भेळा व्हे बुभाई। पेमजी री व्हू तो वळग्या। पेमजी घरां रोया, विलख्या। किरया करम सारो करायो।

मीना छै: वीत्या। पेमजी दूसरा व्याव री सोची, आछी लडकी देखण ने नीसरचा।

भाटीपा कानी गिया, लालजी जाण्यां, चांने आपरे घरें बुलाया, ठैराया, व्हू मरगी, समाचार पूछ्या। पेमजी रोय रोय, वासदी में वळ मर जावा री हकीगत सुगाई।

लालजी ने हंसी आयगी, बोल्या, “थांने कह्यो हो पेमजी, रमभोळ ले लो पिच्छतावोला। वा ही वात व्ही? लो संभाळो थारी लुगाई ने। थां परणवा आया हो, या म्हारी वेटी है, लो परणो।”

पेमजी ने थारी लुगाई सूपी अर घरां ही गैणो गावो दे वेटी ज्यूं विदा कीधी।



## जसमल ओडगा

ओडां रा डेरा रा डेरा गुजरात साम्हा खड्घा जाय रिया है। माळवा, मेवाड़, मारवाड़ सून ओडा ने गुजरात में राव खंगार बुलाया। राव खंगार एक मोटो तळाव खुदावा रो मनसूबो कीधो, अस्यो मोटो तळाव जो राव रा नाम ने अमर करदे।

देस देस रा ओडां ने घणी खतारी रा कागद देर बुलाया। ओड ओडणियां आप आप रा परवार सूधी, कोड सून भरचां गुजरात रो गैलो पकड़यो। रासवा पै आपणों असबाव लादचा, रात पड़्यां तो रूख रे तळै सोय जावै, दिन में वातां करता, रासवा घेरता, तळाव रा सतुना बांधता मारग चालता जाय रिया।

माळवा सून ही ओडां रा डेरा गुजरात चाल्या। रासवां रा गळां में मोरपांखां में पोयोड़ा घुघरा भूमभूम वाजता जाय रिया। ओडणियां रासवा माथै बँठी गीत गावती गैलो काट री, कीरी कांख में छोरा छोरी रोय रिया, कोई कुदाळी फावड़ा ने सूधा सामती जाय री। राजी राजी हंसती बोलती गुजरात पूगवा ने आगती गैलै चाल री।

“अस्यो मोटो तळाव खुद रियो है के दो बरसां ताई तो गुजरात सून हालवा रो नाम ही नीं लेणो पड़ै।”

“दो बरसां ताई? अतरा दिन माळवा सून बारै गुजरात में रैणो पड़ैला? ये तो घणां दिन व्हे।” जसमल ओडणी केरी री फांक आख्यां में भोळप भरचां पूछयो।

“धून गैली है, वीनणी। गुजरात कांई अर माळवो कांई? आपारे मजूरी सून काम, जठै मजूरी मिल जावै जो ही आपणों देस।” रासवा रे टचकारी मारती एक अघकड़ सी ओडण बोलै।

जसमल पाछी बोलै तो नीं पण जाणै क्यून वीरो काळजो अणजाण्या में सून कांपयो।

जसमल ही तो तळावां री माटी खोदण वळी ओडणी । वाळपणा सूं कांई पींढ्यां सूं माटी खोदण रो काम करता आय रिया । पण वीने देह्यां कुण कै या ओडणी ? रूप रा कंचन में सीळ री सुगंध ही । हिरणी जसी भोळी आंत्यां में सीळ रो सुरमो और ही रूप ने वधाय दीघो । ओडां रा फाटघोडा तंवूडा में वा बोलती तो लागतो जांण वन में कोई वीण रा तार हिलाय गियो ।

तडकता तावडा मे माटी खोदती, खोदती रे मूंडा पै पत्तीनो यूं लागतो जांण कंवळ री पांखड्यां पै पड़ी पाणी री वूदां ।

तळाव रो काम चाल रियो अर घणां जोर सूं चाल रियो । राव खंगार ने घणी हूस तळाव त्यार करावा री । ओडां रा डेरा रा डेरा रोज नवा नवा आवै । तळाव रे कनें ही आप रा तंवूडा ताण दीघा, सारो दिन ओड खोदै, ओडणियां रासवा भर भर होवै, टावरिया पाळ बांधै, कामैती वैठ्या हाजरी मांडै, राजाजी दिन में दो दांण आवै, मन में आगत, कद यो तळाव यूरो व्हे ।

जसमल ही दूजा ओड ओडणियां रे लारै तळाव पै माटी खोदै, हेलां न्हांके । चांदी री घूघरियां लागी, ओडणी रा पल्ला सूं मूंडा रो पत्तीनो पूंछती तो घूघरियां रा छणकां लारै देववा वाळा रा मन रा घूघरा वाज जाता । दोई हाथां में फावडो पकड़ माटी खणती तो दूरां सूं लागतो, वायरा सूं चंपा री डाळ भोला खाय री है । रासवा सूं माटी री भरघोड़ी गुणती उठायनै न्हाकती जद वीरी कमर बेंत री कामड़ी ज्यूं लुळ जावती ।

ऊनाळा में वैसाख रो मीनों दिन ढळ रियो, सांभ पड़वा आई । मजुरां छुट्टी कीधी, दिन भर रा धाक्या ओड ओडणियां आपण रासवा संभाळ्या, टावर कुदाळ फावडा कांवा पै मेल्यां डेरा कानी चाल्या, ओडणियां चूल्हा सलगावा लागी. कोई माथै घडा मेल्यां पाणी लावा ने चाली ।

सांभ रो वगत, सूरज भगवान अस्ताचळ रो गैलो पकड़यो. तपी घरती निसासा छोड़ती ठंडी पड़वा लागी, पंछियां रा जोडा चांचां में चुगो भरचां घुंसाळा साम्हा उड्या, घुंसाळां में वच्चा मूंडो काड्यां चुगा री बाट देख रिया । आंथमणी दिमा री मंगरी डूबता सूरज री किरणां सूं पीळी पीळी व्हेयरी, वीरे नीचै भरी तळाई में सारस रो जोड़ी चांचां सूं पाणी उळीच रियो । लाल मखमल रो जीण कस्योडो, अवलक घोडे सवार राव खंगार हाथ में सोना री मूठ री तरवार लीघां, दिन में तळाव पै हुयोडा काम ने देखतो देखतो वठी ने निकळयो ।

जसमल माया पै घडो मेल्यां पाणी लेवा ने आई, घडो पाळ पै मेल घूळा सूं भरचो मूंडो घोय री ।

राव खंगार री द्रस्टि मूंडो घोवती जसमल पै पड़ी, द्रस्टि ही जठै नी जठै अटकगी. हाथ री लगाम ढीली पड़गी, घोड़ा री लगाम रकगी, खंगार तो त्रिचाम व्हे ज्युं ऊभो रैग्यो, नीं हालणी आयो नीं चालणी आयो । माटी सूं लथपथ व्हीया पगां ने जसमल पाणी में धाल मसळचा, भाटा पं एडी रगड़ी, लाल लाल एडी री भाईं सूं पाणी गुलाबी गुलाबी व्हेग्यो । राव खंगार रो काळजो हालग्यो ।

जसमल आपरे सहज भाव सूं पग घोया, मूंडो घोयो, कुरळा करचा, घड़ो भरघो । राव बीरा रूप ने एकधार आंख्यां सूं पी रियो । जसमल अणजाण, भोळी, पवित्तर । राजा सोच रियो यो रूप ! यो योवन !! अर यो भोळापणो !!! कठै ही देख्यो नीं, कदे ही सुप्यो नीं । भारो रावळो गुललंजा सूं भर राख्यो है परा ईं रूप री तो छाया ही नजर नीं आवं ।

ये माटी सूं लथपथ व्हीयोड़ी एड़ियां ही असी लाल है तो रणवास रा गलीचा माथै ये पग फिरै तो कजाणां काई व्हे ? ईं ओडण रा पान खायां विनां ही होठ अस्या लाल बूंद है तो तंबोळ चढायां तो यां होठां रा रंग ने माणक ही कांणी पूगं ।

तावड़ा में तपी लगी व्हेवा सूं ही ईंरो लाल पड़ी आंख्यां में अतरो उनमाद है तो आसा रो पियालो पायां नैणां में ललाई आवैला जद तो काईं गजव व्हेला ।

मोटी रेजा री ओडणी में ही ईंरो अंग यूं लागं जाणं कवळ रो फूल भोला लेख रियो है तो जद या सोळा सिणगार कर राजसी ममनद पै वंठेला तो अपछरां ही लजाय जावैला । यो रतन भूपड़्यां में रैवानै थोड़ो ही विधाता सिरज्यो है, रतन तो राज मैलां रा सिणगार व्हे ।

पवित्तर आतमा जसमल, माथै घड़ो राखर चाली, काम सूं त्रिब्योड़ो राव खंगार ही बीरे लारै लारै छोड़ो छोड़ दीवो । जसमल रा छोटा छोटा पग वूळा में मंडला जावै, बीरी कंकु वरणी एडी ने निरखतो लारै लारै खंगार चाल्यो । थोड़ी सी जसमल चाली । राव खंगार सूं रियो नीं गियो, आड़ो घोड़ो ऊभो करनै वोल्यो,

राजाजी वृलावै जसमल ओडणी ए,  
जसमल ! मैल जोवण आव ।  
केसर वरणी कामणी ए,  
थां पर रोझ्यो, राव खंगार ॥

जसमल चमकी, राजा ? कांपणी केळ रा हंख ज्युं । संभळर हाथ जोड़्यां बोली,

काई तो जोवं थारा मे'ल ने ओ,  
भूल्या राजा, म्हाने म्हारी सरक्यां रो कोड ।

रात्र खंगार बोल्यो, “म्हारा मे'ल देखवा नीं तो कुंवरां ने देखवा ने तो आ कदे ही ।”

काई जोवूं थारा कुंवरां ने ओ,  
भोळा भूपत म्हाने म्हारे ओडां रो कोड ।

जसमल यूं जबाव देतां ही आगै चाली । रावजी भट पाछो जसमल रो गैलो रोक्यो,

राजाजी बुलावै ओ जसमल ओडणी,  
ए जसमल ! राणियां जोवण् आव ।  
आछी म्हाने लागै ओडणी ए,  
जसमल थां पर रीझ्यो राव खंगार ॥

जसमल ने रीस आई वीं ऊपड़तां ही जबाव दीघो, “परजा ने विगाडू राजा ! थारी राणियां ने म्हूं काई देखूं ?”

काई जोवूं थारी राणियां ने ओ,  
भोळा राजा, म्हाने म्हारी ओडणियां रो कोड ।  
रैत विगाडू रावजी ओ,  
भोळा राजा ! भूल्यो भूल्यो राव खंगार ॥

राव खंगार फेरूं नीं मान्यो, वीज ढंग री वात चुरू कीघी,

जसमल घोड़ला जोवण घर आव  
काजळ रेखी ओडणी ए  
जसमल थां पर रीझ्यो राव खंगार ।

जसमल रीस सूं राती पड़गी । वींरा पतळा पतळा होठ धूजवा लाग्या,

“रावजी, थारा घोड़ा थारे घरै राखो, म्हारा गवेडा सूं ही म्हूं राजी हूं । गुणहीरा राजा, थूं मूल रियो है, म्हंने समझी काई है ?”

यूं कंती जसमल रावजी रा घोड़ा ने टल्लो देती आगै निकळगी । रावजी जाण्यो यूं

या वातां में नीं आवाँ । ईंने लाळव देणों चावै । लारै लारै घोड़ा पै चाल्या, गैला में वीने केता जावै,

वसवा ने देस्यां हो जसमल घोरियो ए,  
जसमल ! खिणवा ने देस्यां तळाव ।  
आभै केरी वीजळी ए, जसमल !  
थां पर रीझ्यो राव खंगार ॥

जीमवाने देस्यां जसमल वाजरी ओ,  
जसमल ! दूवा ने देस्यां घोली गाय ।  
सावण सुरंगी तीजणी ए जसमल,  
थां पर रीझ्यो राव खंगार ॥

ओड खोदे ओडणी ठोवै ए,  
जसमल ! भूलरिया तो वांधै पाल ।  
सदा ओ सुरंगी ए जसमल,  
थां पर रीझ्यो राव खंगार ॥

जीं दिन सूं राव खंगार जसमल ने देखी वीं दिन सूं ही घायल मिरग री नाई धूम । नेलां ने छोड़ दीघा, नवा खुदता तळाव री पाळ पै आप रा ही डेरा तरांय दीघा, कोई काम न काज, ओड ओडणी खोदै, जठै वँठ्यो रँवै । जसमल रो मोटघार देवर जेठ खोदै, जसमल वीरी देराणी जेठायी गवा भर भर माटी लायनै गेरै । पनीनों टपकतो जावै, जसमल फावड़ा सूं माटी खोदै । राजा देखै अर अचभो करै, या अतरी मेनत कर री है । भूहारा दियोड़ा लाळव साम्ही नीं भांकी री है । राजा घणी कोसीस कीवी पण जसमल तो राजा साम्हीं नीं भांकी जो नींज भांकी ।

राव खंगार भूलग्यो वो राजा है, जसमल वीरा आसरा में आयोड़ी परजा है । एक तो यूं ही राजमद ऊपर सूं काम रो मारयोड़ो । राजा ने चेतो नीं रियो के वो कर कांई रियो है ?

घन जोवन अर ठाकरी, तां पर अविवेक ।

ये चारुं भेळा हुवं अनरथ करै अनेक ॥

तळाव री पाळ पै वँठ्यो रँणो, जसमल सूं कांई न कांई मिस दात करणी वीने तो ।

जसमल माटी री ठोकरी उठाय ज्यूं ही पाळ माथै न्हांकी, खंगार बोल्यो,

थोड़ी थोड़ी ढोवो जसमल ! ढोकरी ए ।  
जसमल ! पतळी कमर वल खाय ॥

सुरातां ही जसमल रे लाय लागी । वा पग पटकती पाछी फिरी, रीस री भाळ सूं हियो सुळग गियो, आंख्यां मे पाणी भरग्यो, पर कैवे कीने ? राजा ही यूं करण लाग्यो जद । रीस तो वीने असी आई के मार दे कै मर जावै । जसमल मरोड़ो खायनै जी वगत तो निकळगी पण जाती कठै ? पाछो आणो तो तळाव री पाळ पै ही पड़तो ।

माटी खोदतां ओडों ने कह्यो, 'चालो आपां अठा सूं चल्या चालां दूजा देस मे जाय मजूरी करां ।'

"हो, हो" करने सारा ओड हसवा लागग्या,

"गेली री वात सुरां । लागी मजूरी छोड़'र दूजी जगां चल्या चालां । राजा कतरो सुख आपां ने देय राख्यो है ।"

जसमल जाणै सुख देवा रो कारण कांई है ।

वा डरपती डरपती पाळ पै जावै, काम करै, पण वीरी छाती घड़ घड़ करती रैवे । राव रे रणवास में जायनै रैवा सूं तो आखो दिन मेनत मजूरी करनै पेट भरणो ही चोखो । सीळ ने गवायनै मे'लां रा सुखां माथै घूळो पड़चो, आपणी भूंपड़ी भली । जसमल ने खंगार घणै घणी भोळाई पण वा सत सूं नीं डिगी । जसमल पाळ पै रासवा खाली कर री, खंगार लेर कांकरो मारचो ।

राजाजी वैठा है पाळ तळाव री,  
जसमल ! चुग चुग कांकरड़ी सी वाय ।  
मिरगानैणी मरवण ए जसमल,  
थां पर रीभचो राव खंगार ॥

कांकरी री लागतां ही जसमल रे भाळ उठी, पाछी फिरतां ही बोली,

मत नां वावो राजाजी कांकरी ओ,  
सामी राजा, देवै म्हारा देवर जेठ ।  
अकल अलूणां राजवी ओ हरामी राजा,  
भूल्यो भूल्यो राव खंगार ॥

“थें म्हारा घणी हो, घणी व्हे परजा री इज्जत लेवो । थाने लाज नीं आवै । हरामी राजा ! अकल राखो ।” जसमल रीस सूं कांप री, छाती सांस सूं ऊंची नीची व्हेयरी ।

राव खंगार वीं सती री आतमा री आवाज नीं समझ्यो, वो तो वीं रूप पै और ही रीभग्यो । वींरा सीळ ने नी कूंत सक्यो । वो समझ्यो या देवर जेठां सूं डरपै । हंसते लगै पूछ्यो,

किसड़ै उगियारै थारो घर घणी ए,  
जसमल ! किसड़ै उगियारे देवर जेठ ।  
तनक मिजाजण मोवणी ओ जसमल,  
थां पर रीभयो राव खंगार ॥

जसमल आंगळी उठाय माटी खणता सांवळा रंग रा मोटचार ने, लाल दुमालो बांध्यां देवर जेठां ने बतायां ।

राजा वारें साम्हें भांक मुळक्यो । जसमल आडी ने पांवड़ो भरतो बोत्यो, “बस, यां सूं ही थूं डर री ही ?”

कैवै तो मरा दूं थारो घर घणी ए,  
जसमल ! कैवै तो मरा दूं देवर जेठ ।  
ऊजलदंती ओडणी ए जसमल,  
थां पर रीभयो राव खंगार ॥

राव खंगार हाथ पकड़वा लाग्यो, जसमल बीजळी री नाई तड़पगी ।

“खबरदार, जो म्हारे हाथ लगायो । पापो ! हट जा अठा सूं ।”

खंगार आपा मे नीं रियो । ईं ओडणी री या हिम्मत ! एक मजूरणी अर म्हंने गाळ दे ! ईं री ओकात कांई ?

“मान जा जसमल, अवै ही मान जा, ज्यूं थारो मन राख रियो हूं ज्यूं थूं माथें चढ़ती जाय री है ? म्हूं जबरदस्ती थंने रावळा में लेजायनै वैठाय दूंला, थूं कर कांई लेवैला ?”

कैवतो कैवतो खंगार, जसमल रो हाथ पकड़्यो । जसमल तो एक हाथ सूं दीघो

राव खंगार ने धक्को । भूखी सिघरी री नाईं विकराळ व्हीयां हाथ में फावड़ो ले राजा रे साम्हीं तराँर ऊभी व्हेगी ।

“माथो फोड़नै मार दूँला अर मर जावूँला, जो एक पांवड़ो आगै दीघो ।” सती रो तेज सूरज रा तेज सूँ ही घराँ व्हे ।

“अवै ही समभ जा जसमल ! अवै ही समभ जा, हाल मोड़ो नीं व्हीयो ।” कैवतो कैवतो राव खंगार पाछो फिरग्यो ।

दिन उगतां ही राव खंगार जसमल रा तंबूडा साम्हीं भाक्यो । वठँ तो सून पड़ी, माळवा सूँ आयोड़ा ओडां रो एक ही डेरो नी । डेरां में चूल्हां री राख पड़ी । गधेड़ां री लीद रा दुगला रँग्या, ओड जायो एक नीं । डेरा पँ कागला पड़ रिया अर कुत्ता भुस रिया ।

ओडण लदी समी सांभ री ओ,  
कामी राजा ! ओड लदिया ढलती रात ।

जसमल रे साथै राजा रो यो बरताव देख ओड सारा ही उचाळो घाल आधी रात रा लदग्या । जसमल कोसां पार व्ही । यो हाल देख्यो तो राव खंगार घराँ पछतायो । घराँ दुखी व्हीयो ।

इसड़ी जाणूँ तो जसमल ओडणी ए,  
जसमल ! डेरा थारा देतो लुटाय ।

“गजव व्हेगी । असी जाणतो तो यां ओडां रा डेरा लुटाय देतो याने मराय देतो, जसमल ने खोस लेतो । जसमल हाथां बारै परी गी ।”

“मूँ गुजरात रो पराकरमी राजा, मूँने एक ओडणी ठोकर मार ओड रे लारै चलती व्ही ।” “जसमल, जसमल” करतीं राव उठ्यो,

घोड़ा दोड़ाया राव खंगार ओडां रे पाछै रा पाछै ।

“मार दो ओडां ने मुकाबलो करै तो । पकड़ लावो जसमल ने । राजी करो, जबर-दस्ती करो, परा जसमल आवणी चावै ।”

खंगार रा घुड़ सवार दोड़्या । ओड पाछै फिर फिरनै देखता जावै, चाल्या जावै । पाछै देखै तो घोड़ां री खेह उड़ती दीखी ।

“मारचा, खंगार री फोज आयगी। आंपां ने मारैला, जसमल ने पकड़ ले जावैला।”

जसमल कांपगी, खंगार म्हंने बंधाय ले जावैला। सीळ विना जीवणों कस्यो ? ईं सूं तो मर जावणो ही भलो। जसमल ओड़ां रे हाथ जोड़्या “म्हारी वेइज्जती मत कराओ, चिता चुण दो, म्हूं जीवती बळ जावूं पण वीं राजा रे रावळा में नीं जावूं।” वीरे मोट्यार रोवतै रोवतै लकड़्यां भेली कर दीधी।

जसमल अगनी में वैठगी।

राव खंगार आयो, देखै तो जसमल बळ री “जसमल, जसमल ! पकड़ो, पकड़ो ! चिता में सूं काढो, काढो।”

चिता में सूं जसमल बोली, “जसमल री राख चावै तो लेजा।” चिता री आळां में जसमल छिपगी। खंगार देखतो रैग्यो।

जसमल, सतियां री सिरताज जसमल सीळ रो मोल चुकायगी।



## ऊजली

कड़ड़ ! बीजली चमकी, आंखियां में पलको पड़यो तो पलकां मींचगी । जांणै सारा डूंगरां में लाय लागगी व्हे । घररर ! घररर ! बादळ गाज्या । बिछारणां में दब्योळा टाबरां आपरी भावां ने काठी पकड़ लीधी । बीजळियां रा सळाका लाग रिया । लारै री लारै इन्दर री गाज ! जांणै हजारं हाथी एक लारै चरळाया व्हे । वायरो वाजै तो अस्यो के घरां री छातां ने उड़ाय लेजावै, परळै रो रूप कर आचो । हड़ड़ाटा वायरा रा लाग रिया । ढांढा, डांगर वध्योड़ा, रीकवा लाग्या, खूँटा तुड़ावै, खळभळाटो मचम्यो । घटता में बाकी रैण ने ओळा तडातड़ तडातड़ पड़ण लाग्या । मोटा मोटा ओळा जांणै भाटा बरस्या । हूँखड़ा माथै बैठ्या पछ्यां रो साथरो बिछम्यो । डूंगर रा जिनावर भाडां नीचै जाय जाय माथो छिपायो । पाणी सूं पीटयोड़ा, सी सूं घूजता अठीने वठीने लुकता फिरै । जीव जंत सारा बेकळ व्हेग्या ।

बरड़ा रा डूंगरां में चारणां रो साथ, आपरे पसुवां ने चरावा ने आयोडा हो । डूंगर रा खालचा में दूरा दूरा आप आपरी भूंपड़्यां वांध्या पड़्या । ईं परळै काळ सा ओळा, आंधी में आप आपरी भूंपड़्यां में से घंस्या बैठ्या ।

पोह रो मीनो । ईंयां ही ठंड घणी अर आज रा ओळा मेह सूं तो चोगणी व्हेगी । वासदी सुलगाय तापै । टावर भावां ने नी छोड़ै । डोकरा डोकरी बैठ्या, “राम राम” करता, इन्दर सूं कोप कम करणै रा अरदास करै ।

एक भूंपड़ी में अमरो चारण, अस्सी बरसां रो बोभो उठायोड़ो । हाथ में माळा ले गूदड़ी में बंस्यो माळा रा मणियां सरकाय रियो । फाटी गूदड़ी सूं ठंड किसी जावै ? ठंड सूं हाथ घूजतो जावै । लारै होठ हालता जावै । सी मरता ने नीद आवै कोयनी । आधी रात, मंभ आधी रात । घोड़ा री टापां री आवाज आई । डोकरा रा कान ऊंचा व्हीया । ईं वेळा अठीने घोड़ा ? घोड़ा री पोड़ सुराी, घोड़ा री हीस वीरी भूंपड़ी रा दरवाजा कर्ने । अचम्भे में आय उठयो । देखै तो घोड़ो बरणा रे माथै टाप मार रियो, हींस रियो ।

“कृण व्हेला ?”

कोई जवाब नीं। घोड़ा री हींस कोरी। एक घमाको व्हीयो जांणै कोई पड़्यो व्हे। अमरो भूंपड़ी में जाय हेलो मारयो। “वेटा ऊजळी, उठ वारै अ, म्हंने अंधारा में सुभै कोयनी।”

ठड सूं कांपती, गूदड़ी फैंक ऊजळी उठी। संटी वाळी, वींरा उजाळा में ऊजळी री काया असी चमकी जांणै काळा वादळां में चांद। वारै निकळ सटी रा चांदणा में देखै तो घोड़ो ऊभो। जींण में सूं पाणी भर रियो, घोड़ा रे पगां कनें सवार गांठ व्हीयो पड़्यो। चेतो कोनी, कपड़ा में सूं पाणी टपक रियो, सारो सरीर करडो पड़्यो, होठ लीलायगिया, आंख्यां री पलकां वंद। डोकरै भट वींरी छाती पै हाथ मेलनै देख्यो, सांस तो आय रियो, नाड़ी पकड़ी, जीवै तो हे। गद गद पोठचा कर ऊजळी वीं ने भूंपड़ी में लेगी, गूदड़ी पै न्हांक्यो।

“काक, जीवै तो है सवार ?”

“जीवै तो है वेटी, पण ठड सूं अकड़्यो। भट वासदी सलगा। ईं ने तपावां, नीं तो मर जावैला। होठ लीला पड़्यो ईं रा।

“लकड़ी तो घर में एक नीं कांई सलगावूं ? घर रा सारा गूदड़ा ईं ने ओढाय दीवा।”

अमरा रे ललाट पै चिंता रा सळ पड़्यो। घरै आयो वटाऊ मर जावैला। घोर पाप ! सब सूं मोटो घरम ईं री सेवा करणो। दो पल सोच में डूव्यो मन काठो कर ऊजळी रा माथा पै हाथ राखतो बोल्यो,

“वेटी असवार मर जावैला तो आंपा ने नरक में ही जया नीं मिलैला। ईं ने गरमी पूगाणी है। घर में लकड़ी नीं, गूदड़ो नीं, म्हूं अस्सी वरसां रो वूढो, म्हारा डील में गरमी कठै ? एक उपाय है वेटा, थूं जवान है। थारा डील री गरमी ईं असवार ने दे तो यो जीवै। थारा कपड़ा उतार, थारा डील री गरमी ईं रा देह मे साथै सोयनै दे।”

बीस वरस री कुंवारी कन्या वाप रो मूंडो देखती रंगी।

“वेटी यो घरम है पाप नीं” नीचो माथो कर ऊजळी आज्ञा मान लीधी।

अचेत सूता असवार रे दो फेरा खाय इसवर ने साक्षी दे, “आज सूं म्हारो पति यो परदेसी असवार” वींरी सँख्या में गरमी देण ने सोयगी।

“थारो उपकार जनम भर नीं भूलूँला” ऊजळी रा हाथ पकड़चां परदेसी सवार कै रियो है ।

काल रो परदेसी असवार आज आंपरां, ऊजळी रा अंतर रो स्वामी बगन्यो । काल री आसमान सू ओळा रा गोळा वरसाती अंधारी रात आज री रूपावरणी रात व्हेगी । ऊपरै आसमान में चांद हंस रियो, नीचै मेहो जेठवो, पोरबन्दर रो राजकुंवार, हंस हस ऊजळी रा मन में उजाळो कर रियो ।

“आंपरां मिलणो, एक संजोग हो । डूंगरा मे पारस पत्थर मिल्यो, वन में सकुन्तला मिली ।”

“सकुन्तला ने भूल दुष्यन्त राजा मेलां में जाय तो नीं बैठ जावैला कठे ही ?”  
ऊजळी रे मन में वैम आयो ।

“मेलां मे तो जाय बैठेला, पण ऊजळी राणी रे साथै ।”

“चालो आपा चालां, साथै ही ले चालो ।”

“यूं नीं । म्हुं थाने पगणवां ने आवूँला । हजारं घोड़ां री जान चढ़ाय ढोलां रे ढमाकै ले जावूँला ।”

“लाओ वचन दो ।”

दिनां थाम्भा रा आसमान रे नीचै ऊभो व्हे सोगन लेवूँ । “म्हुं थारो जीवतो'र मरचो” वाथ मे घालता जेठवै परतिज्ञा कीधी । “बोलो, थें ही थारा सांचा मन सूँ परतिज्ञा करो ।”

ऊजळी परतिज्ञा कीधी, “म्हुं भव भव मे थारी, थां सिवा संसार रा दूजा मानवी म्हारा भाई, थां परणो नी परणो पण म्हे थाने पति रे रूप में अंगीकारचा । सूरज चांद डिगै तो म्हुं डिगूँ ।”

सुख रा दिन तो बात करतां निकळै, रातां भागी जावै । मेह नै पांवणा कतरा दिनां रा ? एक दिन घोड़ा साथै जीण कसतां कसतां मेहो जेठवो सीख मांगी । ऊजळी हिचक्यां भरती सीख दीधी । जेठवो कोल करग्यो, “एक पखवाड़ा मे पाछो आवूँला ।”

जेठवो, राजाजी सूँ सिक्कार करणै री इजाजत लेवै, सिक्कार रे मिस डूंगरां कानी आवै । ऊजळी सूँ छानै छानै मिल जावै । दिन में दोय घड़ी ऊजळी री गोद मे माथो मेल मन रो नै सरीर रो थकेलो मेटै । रूपावरणी रात में बैठ व्याव रा

मनसूवा बांधै । डूंगर रा वनफूलां रो गैणों वणाय ऊजळी ने सिएगारै । फूल कुमलावै नीं जठा पे'ली, काळजा पै भाटो मेल, आपरे डेरै पोह फाट्यां आय सोवै । दो घड़ी रा संजोग में हिवड़ा री वातां करै पण विजोग री नांगी तरवार माथै लटकती रैवै । यूं करतां मीना वीत्या । वात छानै कतरा दिन रैती । राजा जाण्यां, मिनख जाण्यां । राजा रीस में आया । पिरजा में चरचा चालण लागी ।

“चारण री वेटी, रजपूत रे वेन ज्यूं, घोर पाप, हाहाकार मच जावैला ।”

मेहा री छाती पड़ी नीं, राजा रो कोप भेलणै री । संसार रे सामै खुली छाती आपरी परतिजा पालणै री हिम्मत पड़ै नीं । मेहो जेठवो आपरा अंतकरण ने कचर भेलां में जाय वैठ्यो । ऊजळी ने मन में सूं काढणै री कोसीस करै । वठीने ऊजळी वैठी आमा री वेलड़ी में लाल लाख घड़ा सींच जेठवा री वाट जोवै । दिन पै दिन निकळता गया । कोई समाचार नी । घर रे काम अर वूढा वाप री चाकरी छोड़ मारग पै वैठी गैलो देखै । एक दिन देखै, दूरां सूं घोड़ां रो भूमको रो भूमको, जेठवो आतो वीं व्हाला वाट पै खड़ियो आय रियो हूँहै । ऊजळी री नस नस में उमंग री लै'र दोड़गी । वीरा मन रा आणंद ने जीभ जोर सूं हेलो मार कैय दीघो,

“वै आवै असवार, घुड़लां री घूमर कियां ।”

दोड़'र ऊपर मंगरी माथै चढ, आख्यां फाड़, जेठवा ने सोधवा लागी । नैणां सूं टळ टळ करता गालां पै अर्णविध्या मोती विखरग्या ।

“अवला रो आधार, जको न दीसै जेठवो”

“हाय, म्हारो आधार जेठवो तो यां में कोयनी” ऊजळी, जेठवा री याद में रात तारां सूं वातां करै, दिन में डूंगर रा भाड़ां ने वाता पूछै । असाढ रा बादळा निकळ्या, मेह री भड़ लागी, मेह रा नाम रे साथै “मेहो” नाम ने जोड़ विलाप करवा लागी,

मोटो उफण्यो मेह, आयो धरती धरवतो ।

मुझ पांती रो एह, छांटन वरस्यो जेठवा ॥

“ओ मेह तो मोटा मोटा छांटा वरमाय, धरती ने षपाय दीघी पण म्हारो “मेहो” तो म्हारे माथै एक छांटो ही नीं पटक्यो ।”

वसंत में लड़ाखूँव फूलां ने देख, लपटी वेजड़्यां ने देख रोय दीघी । जेठवा ने बुलावा देवा लागी,

फागण मीने फूल, केसूड़ा फूल्या घरां ।  
मूँघा करोनी मूल, आबी ने आभपरा धरणी ॥

डूगरा री खोहां में पसु पंछियां री लीला देखै । सारस चकवा री प्रीत देख सोचै,  
मानवी सूं तो पछी चोखा जो आपरी प्रीत तो निभावै,

दुनियां जोड़ी दोय, सारस ने चकवो सुरांंह ।  
मिल्यो न तीजो मोय, जो जो हारी जेठवा ॥

दुनियां मे प्रीत निभावण्यां कै.तो चकवो कै सारस री जोड़ी । जेठवा म्हूं तो देख  
देख थाकगी पण तीजो नजर आयो नी ।

ऊजळी जेठवा रे आरां री आसा छोड़ वैठी । वीं मेहा ने कैवायो, समाचार कैवायो,  
अंतर री वेदना रा गीत, दूहा वणाय वणाय भेज्या,

ताळा सजड़ जड़चाह, कूंची ले कीने थयो ।  
खुलसी तो आयांह, जड़िया रहसी जेठवा ॥

म्हारा अन्तकरण रे थूं मोटा मोटा ताळा जड़, कूंची ले कठी ने परो गियो । जेठवा,  
थूं आय, या ताळा ने खोलैला तो खुलैला नी तो ये ताळा जनम भर जड़चा ही  
रवैला ।

टोळी सूं टळतांह, हिरणां मन माठा हुवै ।  
व्हालां वीछड़चांह, जीवै किरण विध जेठवा ॥

आंपणी टोळी सूं, जोड़ी सूं विछड़तां, हिरणां रा, पसुआं रा मन ही दोरा व्हे ।  
जेठवा, आपरा प्यारां सूं विछड़चां किया जीवीज, थूं ही बता ?

थें पटकी पाताळ, ऊंची ले आकास तक ।  
पगत्यो वण पाताळ, जीव उठूं रे जेठवा ॥

थूं म्हने, प्रीत कर, आकास जतरी ऊंची उठाय अवं छिटकाय'र पाताळ में जाय  
न्हांकी । जेठवा, अवं ही म्हने सहारो दे पगत्यो वण जा । म्हूं जीव उठूंला ।

चकवा सारस वांण, नारी नेह तीनूं निरख ।  
जीरां मुसकल जांण, जोड़ी विचड़चां जेठवा ॥

चकवा री सारस री अर नारी री एक सी वाण है । जोड़ी विछड़चां पछै ये तीनूं  
ही जीवै कोयनी ।

जिण विन घड़ी न जाय, जमवारो किम जावसी ।  
विलखड़ी वीहाय, जोगण करग्यो जेठवा ॥

जीरे विना एक घड़ी रँगो ही दोरो लागै, वीरे विना यो जमारो जनम कियां  
वीतैला ? म्हूं विलख री हूं थूं म्हंने जोगण कर चलयो गियो, जेठवा !

ऊजळी घणां कळळापा कर कर जेठवा ने भूली प्रीत याद देवाई ।

जेठवै उत्तर में कँवायो, “आंपणी जूनी प्रीत भूल जा । घणां ही चारण है, कीरे ही  
सायँ व्याव कर घर वसा । थूं चारण री बेटी म्हूं रजपूत, आंपां रे तो जात रे  
कारण सूं भाई वेन रो सम्बन्ध है ।”

ऊजळी रे पगां नीचली जमीन निकळगी । सपनां में नीं सोचै जो वात सुणी । “भूठी  
वात कदे ही नीं । प्रीत रो, जात रे सायँ काँई ताल्लुक ?”

जिण सूं लाग्यो जोय, मन सो ही प्यारो मनां ।  
कारण और न कोय, जात पांत रो जेठवा ॥

जिण सूं मन लाग्यो, जो प्यारो लागै वो ही आंपणों । प्रीत में जात पांत रो कोई  
कारण नीं जेठवा !

वीणा जंतर तार, थें छेड़या वीं राग रा ।  
गुण ने रोवूं गंवार, जात न भूकूं जेठवा ॥

थें प्यार री वीण बजाई, प्रीत री राग गाई । म्हूं तो थारी वीं प्रीत ने रोष री हूं,  
गंवार, जात ने थोड़ी ही भूकूं हूं ।

तावड़ तड़तड़तांह, थळ साम्हो चढतां थकां ।  
लाघो लड़यड़तांह, जाडी छायां जेठवा ॥

तरकाळ तावड़ा में रेत रा टीवा पै माम्हा चढतां री गत व्हे जो गत म्हारी व्हेय री  
है । म्हूं लड़खड़ाय री हूं, जेठवा, ईं वगत थूं जाडी छायां दण म्हंने थारी  
छाया दे ।

जळ पीघो जाडैह, पावासर रे पावटै ।  
नानकियै नाडैह, जीव न घापै जेठवा ॥

जों मानसरोवर रो पाणी पी लीघो दीरो जीव तळयां रा पाणी ने थोड़ो ही दुकै ।  
थारा सूं प्रीत कर जेठवा, दूसरा साम्हें नजर ही नीं उठै ।

घरां घरां ओळमा लिख ऊजळी भेज्या, कंवायो पण जेठवा रो भाटा जस्यो मन पिघळचो नी । कायर रा काळजा में थीज्योडो लोही ऊनो व्हीयो ही नी ।

कंवाई “थंने जात रो विचार नीं है, राज ही चावै तो और घरां ही मोटा मोटा राजवी है, वांने अरदास कर, वे थारी मनसा पूरण करैला ।”

ऊजळी रे माथै जाणै वजर पड़चो । हूं हूं सूं रीस री लपटां निकळवा लागी । धिक्कार है । आपरे संगैती चारण खीमरा ने कह्यो,

खीमरा, खारो देस, मीठा बोला मानवी ।

नुगरां किसो सनेह, जेठी राण भल्यो नहीं ॥

खीमरा, यो देस ही खारो निकळचो । खारा मन रा मिनख, कोरा मूंडा सूं मीठा बोलै । अस्या नुगरां मिनखां सूं किस्यो सनेह । जेठवा सूं नेह रो भार भेलणी नीं आयो ।

काचो घडो कुम्हार, अणजाणेह उपाड़ियो ।

भव रो भांगणहार, जेठी राण जाण्यो नहीं ॥

अरे म्हूं अणजाण में कुम्हार रा घर सूं काचो घडो (काचा मानवी रो प्यार) उपाड़चो । म्हूं ईं जेठवा राणा ने म्हारी जिन्दगानी ने भांगवा वाळो नीं जाण्यो ।

परदेसी री प्रीत, जेठी राण जाणी नहीं ।

तांणी नै मारचा तीर, माथा भर भर जेठवा ॥

ईं जेठवै म्हारी परदेसी री प्रीत री पीड़ा समभी नी । वो तरकस भर भर दुख रा अर जीभ रा बाण म्हारे माथै तांण तांणनै मारचा ।

दुख सूं दाइयोड़ी ऊजळी, आभपरा रा डूंगरा में भटकती भटकती पोरबन्दर गी । जेठवा रा मेलां आगै तीन दिन भूखी अर तिमी वैठी री ।

“म्हंने एक'र जेठवा थारो मूंडो बतायदे ।”

गोखड़ा री वारी खोल जेठवै मूंडो काढचो, “थूं थारे जात रा वेटा ने परण ले, आघो राज थंने देयनै वेन बणाय दूलां ।”

कनें ही रतनागर समदर हिलोळा लेय रियो हो । ऊजळी उठी, संमदर री लै'रां में जाय कूदगी ।

## ढोला मारू

सपनी तो आयो अर परो गिया पण मारवण री आख्या में पाछी नींद नी आई ।

आख्यां खोलै तो बार अंधारो अंधारो लागै अर मीचै तो अन्तस में घोर अंधारो ।  
उठै, बैठै अर पाछी सोवै पण जीव ने जक नी । गांव रे वारै ताल में कुरजां  
कुरळायी ।

घर में सूती कुरजां रा वच्चा री लांबी गावड़ बाळी मारवण रो हिवड़ो ही वां  
कुरजां रे लारै रो लारै कुरळायो ।

सपना में दीख्योड़ो ढोलो अणसैधो व्हेतां ही मारवणी ने लाग्यो जाणै भव भव रो  
सैधो वीरो ढोलो है ।

बाळपणां में व्हीयोड़ा ब्याव ने वा सपना री नाईं भूलगी ही पण आज सपनी  
आयनै परतख ढोला ने आख्यां आगै ऊमो कर दीधो । वीने चीतां आयो वीरो ही  
कोई है पण वा वीने नी जाणै, वो वीने नी जाणै । सपनी कांईं आयो, वीरा तन  
ने, मन ने भंभेड़नै जगाय दीधो । कालै सांभ तांईं सायण्यां रे लारै दोड़ दोड़'र  
दड़ी रमती टाबरी यां चार पांच घड़ी में ही भावना रो भार उठायां जोध जुवान  
लुगाईं व्हेगी । हिड़दै री वीणां माथै सपना री आंगळ्यां फिरतां ही सनेह रा सुर  
बाजण लाग्या । जठीने भांकै वठीने ढोलो ही ढोलो दीखै ।

ताल में कुरजां यूं ही कुरळाय री ही, मारवण ने लाग्यो जाणै वांरी जोड़ी बिछड़गी  
जदी तो म्हारी नाईं कुरळाय री है । नीं तो वांरी आख्यां में नींद है, नी म्हारी  
आख्यां में ही । यारी अर म्हारी एक सी गत है पण यारि तो पांखड़ा है मन करतां  
ही उड़ जावै, म्हारे पांख कठै जो उड़नै मिल आवूं ।

मा देख्यो मारवणी अणमणी रैवै । सायण्यां सागै दूल्यां खेलणों आछो नी लागै,  
काम करवा रो जीव नीं करै । पे'लां ज्यूं दोड़, मां रे गळा में वांहां घाल लटकै नीं ।  
हंसणी आख्यां री कोर में ठावस री रेखा साफ साफ दीखै । मां थोड़ा में ही घणां

समझगी । चिन्ता व्ही । बेटी मोटी व्हेगी, सासरा सूं कोई समाचार नी । मौको देख राजा पिगळ ने कह्यो, “मारवण ने सासरें भेजणें री त्यारी करणी चावै ।”

‘हां अतरा वरस व्हेग्या । नरवर सूं कोई समाचार लेर ही नी आयो ।”

‘बठा सूं नीं आयो तो काईं, आपां ही भेजां । ढोला ने बुलावो भेजो । ढोढ वरस री ने परणाईं जद ढोलाजी तीन वरन रा हा, बाईं मोटी व्ही, वे री जुवान व्हीया । या ढील काईं काम री ?”

सांची बात तो या है, देवड़ी, म्हूं कतरा ही मिनखां ने कागद दे दे ढोला ने बुलावा भेज्या, जो गियो वो पाछो आयो ही नीं, म्हारा समाचार ढोलाजी ताईं पूगं ही नीं । ढोला रो व्याव माळवणी रे साथै व्हीयोड़ो है, जो माणस पूगळ रा मारग सूं जावै जीने माळवण मराय दे ।” पिगळ घणा उदास व्हे बोल्या ।

देवड़ी सलाह दीधी, ‘अवकाळं कोई जाचक ने भेजो जो वीरे माथै कोई वैंम नीं करै । मांगतो खावतो नरवरगढ़ जाय ढोलाजी ने वाता सूं, गीतां सूं रिभाय अठैं राजी कर ले आवै ।

पिगळ रे सलाह जंचगी ।

राग रा जाणकार, वातां रा वणावण्या ढाढ़ी ने ढोला कनें जावा रो हुकम दीधो । मारवण दासी ने भेज, ढाढ़ी ने ड्योढी पै बुलाय, ढोलाजी कनें कैवा ने सनेसो समझाण लागी,

“थूं जाय ढोलाजी ने कीजे ,थांरी मारवण वळर कोयला व्हेगी है, जायर वीं री भसमी तो भेळी करो । वीं रा पींजर में प्राण कोयनीं । थांरा साम्हा वीं री लौ बळ री है । वीं भला आदमी ने जायनै थूं कीजै, आतमा थारे कने है सरीर ने भला ही दूरो राख । ढाढ़ी, थनें ढोलो मिलै तो थूं जरूर कीजै मारवणी री आंख्यां थांरी वाट देखतां, सीपां री नाईं खुब री है, थां स्वाती री वूंद ज्यूं आय वरसो । योवन चंपा रे मोड़ आवा लाग गिया है, आय कळियां तो चूंटो । थांरी याद कर कर मारणी कणोर री कांवड़ी ज्यूं सूखगी है ।

पंथी ! ढोलाजी ने थूं कैवणों मत भूल जाजे के विरह री लाय लाग री है, आय ईं दावानळ ने बुझावो । थांरी घण कंवळ ज्यूं कुम्हलायगी है थां सूरज वण उगो । योवन क्षीर समंदर व्हेय रियो है, थां आय रतन क्यूं नी काढ़ रिया हो ?”

मारवण री आंख्यां में आंसू भर रिया, सांस नीं माय रियो, पग लींगरी काढ़ती, हंघ्यां गळा सूं ढाढ़ी ने समभावा लागी, “ढोलाजी <sup>अंगूठा सूं</sup> <sup>परा नाम</sup> सूं हाथ जोड़ कीजे, आप म्हाने भूलग्या, कोई सनेसो तक नीं भे जीवूं तो कीं रा आघार पैं जीवूं । जो थां फागण में नीं आया तो <sup>वतावो</sup> <sup>भाळ</sup> में कूद पड़ूंला ।”

मारू राग में दूहा वणाय ढाढ़ी ने दीघा, “ये ढोलाजी रे मूंडागै गाय रु, ढाढ़ी मुजरो कर सीख लीघी, “जीवतो रियो तो ढोलाजी ने लेर आंवूंल <sup>पो</sup> तो वीं देस में रैय जावूं ।”

वादल छांय रिया, अंधारी रात में वीजळ्यां ओळां खैंचती, आंटा खा कानी चमक री, जांणै इन्दराणी रा काळा घाघरा में सुनैरी जरी रो रियो व्हे । माळिया में ढोलो सूतो वीजळ्यां खिदतो देखै, माळिया रे नं सूं गाणै री तान ऊंची ऊठी । सीळी रात में मलार राग, भींणीं भींण मेंह री दूंदं रे सागै, मघरा मघरा चालता पवन में भरगी । ढोलो, प कीघां नाग ज्यूं राग पै भूमवा लाग्यो । गवा वाळा मीठा गळा सूं स सबदां में कह्यो,

“ढोलो नरवर सेरियां, घण पूंगळ गळियांह ।”

ढोलो चमक्यो, वीं रो अर वीं री वाळपणां में परणी मारुणी रो नाम ? <sup>गा ने</sup> ध्यान एक जगां कर सुणवा लाग्यो । वाळपणा रो व्याव ! ढोला रूं ? ” जावणो !! मारुणी रा रूप रो दखार !!! जांणै पोथी खोल आगै राख दं ओछा पाणी री माछळी ज्यूं ढोलो तड़फै ।

वरखा वरसती री, ढाढ़ी गातो रियो, ढोलो सुरां ।

आंखड़ियां डंवर हुई, नयण गमाया रोय ।  
के साजरा परदेस में, रह्या विड़ाणां होय ॥

आंख्यां लाल व्हेगी, रोय रोय नैण गंवाय दीघा । साजन तो परदेस में पराया रिया है ।

वहु घंघाळ आव घर, कांसूं करै विदेस ।  
संपत सगळी संपजै, आ दिन कदी लहेस ॥

सारी रात ढाढ़ी गातो रियो, ढोलो सुराणतो रियो । आंगणों, पोळ, ओवरा सा

घर जाणै माण्णी रा संदेस सूं भरग्यो । ढोलो सुणतो रियो, ढोल्या पै सूतो पण  
जाणै ताती हूं पै लोट रियो व्हे । दिन ऊगतां ही गावा वाळा ने बुलायो ।

“थां कठा सूं आय रिया हो?”

“पूंगळ सू, मारवण रो सनेसो लेर । ढोलाजी री बाट देखतां देखतां, मारूणी  
कुंभ रा वच्चा री नाईं लांबी गरदन री व्हेगी है । वीं कंचन-वरणी कामणी सूं  
भट जाय मिलो ।”

दुज्जण वयण न सांभरी, मनां न वीसारेह ।  
कूंभां लाल बचांह ज्यूं, खिण खिण चींतारेह ॥

खोटा मिनखां री वातां मे आय वीने मन सूं मत उतारो । कूंजा रा लाल बच्चां  
ज्यूं पल पल थांने याद करती रैवै वा मारूणी ।

आसू सूं आला व्हीयोडा चीर ने निचोवतां निचोवतां वींरी हथेळघां में छाला  
पडग्या है ।

जै थूं साहिव ना आवियो, सावण पहली तीज ।  
बीज तणै भवूकडै, मूंध मरेसी खीज ॥

जो थां सावण री तीज पे'लां कोनी गिया तो बीजळी खीवती देख वा मुगधा  
खीजनै मर जावैला । थांरी मारूणी रा रूप नै गुण रो बखाण नीं व्हे । घणां  
पूरव रा पुन्न करचांडा व्हे जीने असी अस्तरी मिलै ।

नमणी, खमणी, बहुगुणी, सुकोमळ सुकच्छ ।  
गोरी गंगा नीर ज्यूं, मन गरवी तन अच्छ ॥

घणां गुण वाळी, खमणी, नमणी नै कोमल है । गंगा रा पाणी सरीखी गोरी,  
आछा तन अर मन री ।

गति गयंद, जंध केळ अरभ, केहर जिमी करि लक ।  
हीर डसण विप्रभ अघर, मारण भूकुटि मयंक ॥

हाथी जसी चाल, हीरा जस्या दांत, मूंगा सरीखा होठ है । थांरी मारवण के सिंध  
सरीखी कमर, चन्द्रमा जस्या भूंवारा है ।

आदीता हूं ऊजळो, मारूणी मुख व्रण ।  
भींणां कपडा पैरणां, जाणै भांकेई सोव्रण ॥

मारवणी रो मूंडो सूरज सूं ही ऊजळो है । भींणां कपड़ा में सूं सरीर चमकै जांरौ सोनो भांक रियो है ।

ढोला रो कालजो उछाला खावा लाग्यो । मन पंछी व्हे अर प्राणां रे पांखां व्हे तो ईं वन ने उलांघ वठै जाय पूगै । मन, मारवणी कनें जाय पूगो जांरौ वाज पंछी ने मूठ में भरनें उड़ाय दीवो व्हे ।

आंख्यां में हंसती, छाती पै मोत्यां रो हार हलावती माळवण, मुळकती ढोला कनें आई । ढोला रा डोल देख, उठयोड़ा पग थमग्या । “यूं क्यू ? काल हा जो आज नीं । ललाट माथै त्रिसूळ, नाक में सळ घाल राख्या है । काई बात है ? कठै ही मारवण री बात तो याद नीं आयगी ।”

कनें बैठ पूछण लागी “आज हंसो नीं, बोलो नीं, काई म्हारा सूं रुसाया हो ? चिन्ता कीं री ? बतावो तो ।”

“यूं स्याणी है । सब समझै । हिरणाक्षी, राजी व्हे सीख दे तो दिसावर जावूं । देस देसान्तर देखूं ।” ढोले भोळावो दीवो ।

तंती नाद तंवोळ रस, सुरही सुगंध ज्यांह ।

आसण तुरी घर गोरड़ी, तिको दिसावर क्यांह ॥

“जींरा घर में मीठा सुर रा वाजा वाजता व्हे, तांवूळ रस नै सुगंधी व्हे, । चढवा ने आछा घोड़ा, घर में रूपाळी स्त्री व्हे बीने दिसावर जांरौ री जरूरत काई ?” माळवण उत्तर दीवो ।

“ईंडर जावूं तो थारे गैणां घड़ाय लावूं । ”

“घर बैठ्यां ही गैणां मंगाय लेवांला ।”

“मुलतान सूं घोड़ा खरीद लागण है ।”

“सौदागर अपणै आप अठै लेय आवैगा । थां छंट छंट नै वांका मूंडा रा घोड़ा खरीदजो ।”

ढोला घणां आळखा लीघा, कच्छ में यो काम, गुजरात में वो काम । गैणां लावूं, चीर लावूं, मोती लेर आवूंगा ।

“ढोलाजी, थां अणमणां व्हे रिया हो, नखां सूं भींत खुरच रिह्या हो । सांच सांच बतावो मन में काई है ?” माळवण रो वैम वढ़तोग्यो ।

“मारूणी सूं मिणै री इच्छा-व्हेय री है” धीरै सूं ढोलो बोल्यो ।

माळवण तो सुरतां ही घड़ाक आंगरुँ जाय पड़ी जाणै सांप खायग्यो व्हे । वीभरणी कर, पारणी रो छांटो दे चेतो करायो । ढोलो जाणै री त्यारी कीधी । जद माळवण बोली,

“अवार चोमासा में कदे ही कोई घर सूं बारै नीसरै ? ईं रित में तो बुगला ही घरती माथं पग कोनी देवै । पपीया बोल रिया है, कोयलां सुरंगा सबद कर री है, डूंगर हरचा व्हे रिया है । इसी रित में बारै कुण जावै ? कै मांगवा वाळा, कै चोर अर कै चाकर घर छोड़र नीसरै । नदिया चढ़ री है, वादळा भर गिया है, यां सुवांवरणां दिनां मे म्हूं थां विना किस्या रैवूंगी । घरती तो लीली लीली दीखैला अर थांरी माळवण थारे गया सूं पीळी पड़ जावेला । म्हंने यां वादळ्यां री नाईं रोवती छोड़ कठं जावो । चोमासै चोमासै ठैर जावो ।”

“दसरावा ताईं और रुक जावूला” ढोलो निसासो न्हांकतो बोल्यो ।

आज धरा दस ऊनम्यो, काळी धड़ सखरांह ।  
वा धण दे सी ओळंबा, कर कर लांबी बांह ॥

इन्दर घरती साम्हो उलळ रियो है, मंगरा रा दूंचकां ने वादळ्यां छाती सूं लगाय राखी है । वठै बैठी वा मारूणी बांहा आधी कर कर म्हंने ओळंबा देय री व्हेली ।

दिन जातां कांई देर लागे ? चोमासो निकळयो, दसरावो ही निकळयो । अबै ढोले पूंगळ जाणै री त्यारी कीधी,

“अबै पूंगळ जावा दो, थारे कैवा सूं चोमासो रुकग्यो, सियाळो आयग्यो अबै जावू हंसर विदा करदो ।”

ये सियाळै रा दिन ही कोई जाणै रा व्हे ? पाळो पड़ै, घोड़ा ने ही टापर ओढारणी पड़ै । जीं रित में सीपां में मोती नीपजै, हिरण्यां ग्यामणी व्हे, उत्तराध रो तीखो पवन चालै अस्या दिनां में ही कोई घर छोड़र जावै ? यां दिनां में तो सांप ही विल नीं छोड़ै ।

उत्तर आज स उत्तर ही, वाजै लहर असाधि ।  
संजोगणी सोहावणो, विजोगण अंग दाधि ॥

उत्तर रो पवन वाज रियो है, पाळा री लैरां चाल री है । संजोगणियां ने तो सुख देवै परण विजोगणियां ने वाळनै राख कर देवै ।

माळवण कैती री । ढोलो सवार व्हेग्यो । माळवण डव डव आंख्यां करती, भव भव करती पागडा रे भूवगी ।

ढोलो बोल्यो, म्हूं जावूंला जरूर । थाने नींद आय जावैला, सूता ने छोड़ विदा व्हेय जावूंला ।

अवें माळवण सोवें हीज नीं, एक पल ढोला ने एकलो नीं छोड़ें । ढोलें आच्छा तेज चालण्यां ऊंट ने जो एक दिन में सो कोस रो गैलो काटें, पलाण त्यार कर राख्यो ।

माळवण ने जक नीं । यूं करतां करतां पनरा दिन वीतग्या । माळवण री आंख्यां सुजगी, एक दिन नींद री हारी री पलकां जपगी । ढोलें तो ऊंट ने पागडें लगाएँ रो हेलो मारयो । चट ऊंट पँ सवार व्हे एड़ मारी । ऊंट 'वळवळ' बोलतो उठ्यो । ऊंट री बोली सुणतां ही तो माळवण चमकी, देखें तो कनें ढोलो नीं । गोखडा में जाय नीचं भाकें तो ऊंट पँ सवार ढोलो जावतो दीख्यो । ढोलें गोखडा में ऊभी माळवण ने देखी जांएँ वीजळी तडकी व्हे । ऊंट री मोरी खैची जो एक पल में गाम रे वारें जातां ऊंट रो पळको माळवण ने पड्यो ।

माळवण हाका करती रैयगी, “कोई ढोलाजी ने रोको कोई ढोलाजी ने रोको ।”

ढोलो ऊंट ने दोड़ायो जांएँ उड़ रियो व्हे । माळवण, कळपवा लागी । कदे ही विलाप करै, कदे ही ओळवा देवै, ऊंट ने सराप देवै, कदे ही याद कर भूरै । वीरी चूंदडी रा चारुं पल्ला आंसूडां सूं भीजग्या, आंख्यां रो सारो काजळ वैयग्यो । कांचळी निचोवै जसी आली व्हेयगी । ढोला रा जाती वेळा आंगणां में पग मळ्या वीं धूळा री मुख्यां भर भर छाती रे लगावै ।

ढोलो उमंग भरयो, पूंगळ रो मारग पकड्यो । घणां घणां कोड करतो मोटा मोटा मनसूवा वांवतो काळा ऊंट रे कामडी मारतो “सांतरो चाल, सांतरो चाल” करतो, घाटी, वन डू गर पार करतो वढ्यो । गैला में टीवां रे मार्यै एक गुवाळिये देख्यो, ऊंट रा गळा में भींगां भींगां धूधरा वाज रिया है दोई आड़ी ने जीण रे लाम्बा लाम्बा फूंदा लटक रिया है, ऊंट अस्यो चाल रियो है जांणै पाणी रो रेलो वैवतो आय रियो व्हे । सवार रो मूंडो कोड सूं चमक रियो है ।

गुवाळियो बोल्यो, “घर कोई गोरी वाट नाळ री है जीरे खातर अस्या सी पाळा में भाग्यो जाय रियो है ?”

“चांद जसी मारणी सूं मिलवा जाय रियो हूं ।”

“वा तो म्हारी सायण है म्हूं मारवण रो मितर हूं ।” गुवाळियो मन में हंसतो बोल्यो ।

ढोला रा हाव सूं ऊंट री मोरी छटगी । कनें ही ऊमरा रो चारण आय रियो ।

ढोला ने पूंगल जातां देख वीरे लाय लागगी । भट साम्हो भांक निसासो भरतो बोल्यो, “ढोलाजी, जीं मारवण रे खातर उमग्या जाय रिया ही वा तो बूढी व्हेगी, सारो माथो घोळो व्हेग्यो । अचै जाय कांई करोला ? घरा मोडा चेत्यो ।”

ढोला रो मन पीपळी रा पत्ता री नांईं कांपग्यो । आगै पग पडै न पाछै । वठै हीज ऊंट री मोरी थाम ऊभो व्हेग्यो । कांई करूं कांईं नीं ? अचै घरै जाय गाम रा मिनखां ने कस्यो मूंडो बताऊं ।

साम्हो एक आदमी आतो दीख्यो । उदास व्हीया ढोलै पूछ्यो “पूंगल री मारवणी कांई बूढी व्हेगी है ? जाणातां व्हो तो सांच सांच बताओ ।”

“थांरी अकल कठै गी ? थांरो व्याव हुयो जद थां तीन बरस रा हा मारवणी डोढ बरस री ही, थां तो जोध जवान हो अर वा बूढी कियां व्हेगी ?” बटाऊ सवाल कीघो ।

एक पल हकनै कह्यो, “मारू जिसी अस्त्री आज तांईं नीं देखी अर नी सुणी । मेलां में जद वा बोलती व्हे जद यूं जाण पडै कठै ही वीणा वाज री है । गळा में चांदी रो गैणों पैर ले तो मारूणी रा बदन री छाया पड्यो सूं वो ही सोना रो सो दीखवा लाग जावै ।”

ढोलै भट मृट्टी भर मोहरां वीं ने देय ऊंट हकाळ्यो । पागड़ी ने कसर बांध लीधी, मोरी ढीली मेली ।

ऊंट तो वायरा सूं वातां करवा लाग्यो । सांभ पड़तां पड़ता पूंगल जाय पूग्यो । ढोलो मारवणी सूं मिल्यो मारवणी ढोला सूं मिली । जाणै उनाळा मे जेठ री लू सूं वळी वेलड़ी पै सावण री भड़ी लागी ।

ढोलो चार दिन रै, सीख मांग मारूणी ने लारै ले घरै विदा व्हीयो । ऊंट ने संगारयो । आगै ढोलाजी अर पाछै मारूणी ऊंट पै चढ्या । घर रो आसूधो ऊंट, उमहाया ढोलाजी, वे ही आगता नै ऊंट ही आगतो । ऊमरै सूमरै सुणी ढोलो एकलो मारूणी ने लीधां जाय रियो है । वी देख्यो मारूणी ने लेवा रो घरणो आछो मोको । गैला रे बीचै जाजम ढाळनै बैठग्यो । ज्यूं ही ढोला रो ऊंट आयो रोकनै मनवार कीधी,

“आओ ! आओ ! मनवार लो । घरां मूंधा पांवणा पधारचा ।”

ढोलो, मारूणी ने ऊंट पै वैठी छोड़, आप जाजम पै बैठ मनवार लेवा लाग्यो । ऊमरा सूमरा रा मन में तो पाप, मोको देखनै ढोला ने मारवा री घात घाल राखी ।

## मांभल रात

मारुणी ने कांई बैम नीं । ढाढ़ी दूहा देय रिया, ढोलाजी अमल री मनवार लेय रिया ।

ढाढ़ी री लुगाई पूंगळ री । वा ऊमरा सूमरा रा मन रो पाप जांणै । छानैं सूं मारुणी रा कान में जाय कह्यो, “घांने लेवा री घात है । ढोला ने ले भागो नीं तो मारघो जावैला ।”

मारुणी तो भट ऊंट रे कामड़ी री दीधी । ऊंट तो कामड़ी री लागतां ही उठ वैख्यो, चालवा लाग्यो । ढोलै देख्यो ऊंट भाग रियो । भट ऊंट लारै भाग्यो पकड़वा ने ।

मारुणी बोली, “घोखो, भट ऊंट पै चढो ।”

ढोलो तो देतां ही पागड़ा पै'पग नै ऊंट पै चढनै मारी कामड़ी री, ऊंट भाग्यो । ऊमरो “अरे अरे” करतो रैयग्यो । भट घोड़ा पै चढनै लारै व्हीयो पण वो काळो टोरड़ो ! घोड़ा ने पूगवा कद देतो । घोड़ा पाछै रैग्या । ढोला मारुणी घरै आया ।

ढोलाजी मारुणी रे अर माळवणी रे साथै घणा आणंद सूं रैवा लाग्या ।



## लालां मेवाड़ी

गागरुण रे गढ़ रे में दरवार लाग रियो है । रावजी अचलदासजी खीची, गादी मसनद लगायां बैठ्या है । चाकर ऊभा चंवर ढुळाय रिया है । भाई बेटा दोई ओळां में बैठ्या धीरै धीरै वातां कर रिया है । अमलां गळ री है । कविता सुणायै रा, सोखीन अठीने वठीने आगा पछा ऊभा है, बैठ्या है । ऊपर भरोखा री जाळी में, लालां मेवाड़ी, मेवाड़ रा घणी मोकळजी री बेटी बैठ्या, नीचै दरीखाना मे भांक रिया है । आपरे वाप दादां रा विड़द रा गीत सुण सुण हंस रिया अर बगसीसां नीचै भेज रिया है ।

बीठू चारण, आपरी बेन भीमां ने लारै ले जांगळू सूं मांगणी पै आयोडो है । आज वीरो रावजी कनें मुजरो है । खीचीयां ने पे'लां बिड़दाया, अचलदासजी रा आपरा गीत बोल्या, रावजी राजी व्हीया, सिरोपाव दीघा, इज्जत दीघी ।

अवै भीमां, आपरा रच्योड़ा गीत बोलण लागी । दूहा अर सोरठां री वा भड़ लगाई के सारी सभा चतराम री व्हीयोड़ी बैठी रैगी । वीरो दमकतो मूंडो ! बोलणै रो ढग !! कोयल ने लजावा वालो कंठ !!! वा'वा' करता रैग्या सारा जणां । रावजी मन में कैण लाग्या, "धन है मारवाड़ रो देस जठै भीमां जस्या नारी रतन नीपजै ।"

"भीमां वाई, धन हो थां अर थारी कविता । थारी कविता सुणायै रो मन में चाव है । थां कालै फेर आवजो, थारी कविता सुणाला अर वातां करांला ।"

"जसी थारी कविता वसी ही थारी वात करणै री चतराई । भीमां वाई, थारे देस में म्हाने परणावो । कोई असी ही रूप, गुण अर चतराई वाली कन्या म्हाने वतावो । मारवाड़ रे समंद में मोती नीपज्या करै है ।"

"म्हारे जांगळू में खीवसी सांखला रे बाई उमा सूं वत्ती और कुण व्हेला" भीमां भट बोली ।

कस्याक है थारे वाईजी ?”

चंदवदनि मृगलोचनी, सिंघ कटी गज गत्त ।  
एहवी उमा सांखली, मनहरणी ज्यूं कवित्त ।”

चट दूहो, रच भीमां सुणायो ।

“भीमाजी, वारो वखाण करो, गुण सुणावो म्हाने ।”

भीमां वखाण करण लागी,

“आसमान री उत्तरी इन्दर री अपसरा ! सरोवर रो हंस ! सरद रो कंवळ ! वसंत री मींजर ! भादवं रो वादळ ! असाढ री बीज ! हंस री वच्ची ! लिछमी रो अवतार ! परभात रो सूरज ! पूनम रो चांद ! गुण रो प्रवाह ! रूप रो मंडार ।”

“वस वस, रैण दो घरणों ।”

“रावजी पूरी वात तो सुणों,”

“वांह जाणौ चढयो धनुस, पातळा हाथ ! नान्हां नख ! दांत जाणौ अनार रा बीज अघर जाणौ त्रवाळी ! हंस री गत चालै । चांवळ रो चोथो हिस्सो खावै । फूंक री मारी आकास उड जावै ।”

“रावजी, जिण आदमी पूरवला जनम में आछा पुन्न करघा व्हेला जिण ने उमा सांखली मिलैला । आछा भाग विना राज अर पदमणी मिलै कोयनी ।”

“वाई ! चाहे जो व्हे म्हूं थारा वाईजी रे लारै परगूला, थाने करारो ही पडैला यो सगपण ।”

“आप रा कामदार सरदार म्हारे लारै भेजो जो सावो थरपा ।”

लाखपसाव ले वीठू अर भीमां जांगळू आया । खींवसी ने कह्यो ।

खींवसी राणी सूं जाय सल्ला करी ।

“गागरूण रो घणी वाई उमा ने मांगै ।”

“सोनोर सुगंध देखणों काई । सोना रूपां रा नारेळ ले पिरोत ने भेजो, सावो थापो ।”

“लालांजी, एक वात कैवू, मानोला ? मानो तो कैवू एक अरज ।”

“हुकम री चाकर ने अरज क्यूं आज ? फरमावो ।”

अचळदासजी सूं कैवणी नीं आवै । लालां मेवाडी आंख्यां में आंख्यां घाल पूछ्यो,  
“असी वात काई है ? कैवो तो ।”

“जांगळू सूं म्हारे नारेळ.....”

“हैं !” जांगै आसमान पड़यो व्हे । लालां मेवाड़ी रो बोल नीं नीसरयो ।

“मेवाड़ीजी, म्हंने माफ करो । व्हेणो जो व्हेण्यो, राज थारो, पाट थारो, हुकम थारो, म्हूं थारो उमा थारी । राजी व्हे थां कै दो, परणवा ने जावूं ।”

डसूका भरती लालांजी बोली, “थारो मरजी, पण म्हंने एक वचन दो ।”

“एक नी दस, लालां !” खीची हाथ आघो बीघो ।

“आप परणो, सासरे रैवो, गैला मे चालो जतरा दिन आप उमा रा । गागरूण में आवो जी दिन सूं थां म्हारा । उमा सूं पछें बोलो नीं । ये वचन दो ।”

रावजी हाथ पै हाथ दे विदा व्हीया । त्यारथां करै । लालांजी ने रात जक पड़ै नी दिन में जक पड़ै, सारी रात सीटथां देता फिरै ।

जांगळू में गाजा बाजा व्हे रिया । नंगार खाना बाज रिया । मेलां में रावजी अर उमा वैठथा । मान मनवारां, राग रंग व्हे रिया । रावजी तो उमां ने देख मोहित व्हेग्या । रात री खबर पड़ै नीं कोई दिन री । वानें खबर नीं कदी तो दिन उगैर कदी आंथै । एक पल उमा ने दूरा करै नीं ।

उमा अचळो मोहियो, ज्यूं चन्दण भूयांग ।  
रात दिवस भीनो रहै, भमरो सुमनां राग ॥

अचळदासजी ने तो उमा अस्या मोह्या के ज्यूं कालो नाग चन्दण सूं लिपटयो रै अर ज्यूं भवरो फूलां री वासना पै भ्रमतो रै ज्यूं रावजी उमा कनें बैठ्या रै ।

यूं करतां सात दिन व्हेग्या । उमराव परधान, जान में आयोड़ा, रावजी सूं मुजरो करण ने हाजर व्हेवा री अरज करावै पण वारी सुणाई नीं व्हे । वां घणी अरज कराई तो वारै आय मुजरो भेल सारा सिरदारां ने बवड़ाय परधाने ने कह्यो ।  
“म्हूं घणो दुखी हूं ।”

“उमा जसी अस्त्री मिली फेर आप दुखी हीज हो ?”

“हां जद हीज तो दुखी हूं । म्हें लालांजी ने वचन दीघो के वारे हुकम वगैर उमा सूं गढ़ गागरूण में गियां पछें बोलूं नीं । बताओ, म्हारो सरीखो दुखी और कुण संसार में व्हेला ? सांखली तो असी है के एक पलक दूरी नी करीज ।”

ना दीठी ना सांभळी, रूपै इघकी रेख ।  
एहवी उमा सांखली, जांगै सह विवेक ॥

परधानां ने गागरुण जांरुँ री सीख दीघी । शारी जान ने विदा कीघी । रावजी वठै ही सात आठ मीनां रैरुँ रो विचार कीघो । परधानां सोची या तो गजव व्ही । एक कासीद भेज्यो लालांजी कर्ने “राणीजी, रावजी तो सांखली सूं रीभूरिया है श्रावै कोयनी । म्हाने, वाने कागद लिख भट बुलावो । म्हारो कह्यो सुणै कोयनी ।”

कासीद जाय कागद लालांजी रे हाथ में दीघो । कागद वांचतां ही पगां री भाळ माथा तक गी । आख्यां में तरवरा आयग्या परण जोर काई ? कागद लिख कासीद ने दोड़ायो । लिख्यो “कागद वांचतां पाण उमा ने ले वेगा पघार जो, देर लागी तो म्हने मरी जाणजो ।”

कासीद कागद लाय परधान ने दीघो । परधान डोढी पै जाय डावड़ी रे साथै रावळा में नजर करायो । उमा कागद देखतां ही वीने पढ फाड़'र सो टुकड़' कर फँक दीघो । आख्यां कांड बोली “जा परधानां ने कँदे, रावजी तो आख्यां ही कागज नीं देखै, फाड़'र फँक दीघो ।”

कामदार, परधान सारा ही सोच में पड़्या । अरुँ काई व्हे । आपां री पूंच भीतर तक नीं । रावजी दरसण दे नीं । कागद पूंच नीं । अठै कतराक मीनां वैठ्या रैवालां । फेर कासीद दोड़ाय लालां मेवाड़ी ने सारा समाचार कैवाया ।

लालां तो लाल पीळी पड़गी । आख्यां सूं आसू री धारा वैवे । मूहता ने बुलाय कह्यो, “मूहताजी, अरुँ तीजी होवेला । कै तो रावजी ने घरँ लावो कै म्हं अमल खायनँ मरुँ ।”

“खमा करो, अन्दाता । अमल खावै आपरा दुसमण, अस्या क्यूं बोलो ।”

लालांजी रुदन करता मे'लां सूं वारै निकळवा लाग्या । लालांजी ने मूहतो हाथ पकड़ पाछो लापो'र आप जांगळू चाल्यो । लालांजी वैठ्या विलाप करै । सारो गैणो फँक दीघो । चूंदड़ी रा चारुं पल्ला आंसुवां सूं भीजग्या ।

खिरण वाहर खिरण महल में, खिरण खिरण करै विलाप ।

आख्यां ना'वै नींदड़ी, सोकरा तरणै संताप ॥

सोक रा दुख सूं आख्यां में नींद आवै नीं । रोय रोय नैण सुजाया ।

“मूहता क्यूं आयो ?” एक दिन मूहता री अरज रावजी तक पूंचगी ।

जिण राजवीं रे आपरो राज नीं व्हे वो परायँ घरँ आयनँ वैठै । जवाँई चार दिन रा

पांवणा । आप रे मन व्हे तो गैलां में वीस दिन वत्ता ठैरांला परण सासरै रैणो फूटरो नीं लागै ।”

रावजी रे जचगी, “बात सांची, चालो सीख मांगो ।”

रावजी विदा व्हीया । द्रव दायजो, हाथी घोड़ा, दास दासी सब दीघो । दो दो कोस पै डेरा करता आगै बढ़े । हंसी खुसी राग रंग करता घीरै घीरै मुसाफिरी करै । उमा वीणा बजावै रावजी ने रिभावै । भीमां कविता सुणावै, रावजी रीभां दे । मारग मे सिकारां खेलता चालै । भीमां रो घणों मान राखै, घणी खातर करै । उमा बैठे जीं पालकी में भीमां ने बैठवै । छोरचां उमा री चाकरी करै जीं सूं सिवाय भीमां री करै ।

उमा कदे ही कदे ही पूछै, “भीमां, ये सुख कतराक दिनां रा ?”

“उमा घबरा मत, माथा पै आवैला जीने भेलणो ही पड़ला ।”

यूं करतां करतां मारग में छै मास लागग्या । ज्यूं ज्यूं गागरूण रो गढ़ नजीक आवै ज्यूं ज्यूं रावजी रो मन उदास व्हेतो जावै । उमा मनावै ये घड़ियां लांबी क्यूं नीं व्हे जावै ।

भीमां समभावै, “म्हारी चतराई पै भरोसो राख । रावजी ने लालांजी रा मे'लां सूं काढ थारा मे'लां में बिलमाय दू'ला । म्हारी वीणा पै सांप तक कुंडाळो मार बैठ जावै, रावजी तो मिनख है ।”

चालतां चालतां एक दिन गागरूण गढ़ आयो हीज । मे'लां में बघावणां कर लीघा । आगै लालांजी तो नो ना'र वारा चीतरा व्हीया वैख्या हीज । सारी रीस ने आख्यां सूं अर मूंडा सूं काढता बोल्या, ‘रावजी, जसी थां म्हारा सूं कीघी कोई कींसू' ही नीं करै ।”

ठंडो छांटो न्हांकता रावजी कह्यो, “म्हूं थां सूं बदल्यो नीं । म्हें वचन दीघो जो पूरो करूंला । आओ, नाराज मत व्हो ।”

रावजी नै मेवाड़ीजी तो एक व्हेग्या । उमा ने न्यारा मे'ल दे दीघा जांमें रैवे । नीं तो रावजी आवै नीं बोलै । अचळदासजी ने आख्यां देख्यां उमां ने वरस व्हेग्या । दिन रात वरस बराबर बीतै । रात दिन उमा, भीमां रे आगै विलाप करै । विरह रा दूहा वणाय वणाय वीण पै गावै । जूनी वातां याद कर कर रोवै । उमा रोय रोय भीमां ने सुणायो,

सुपना में अचळा कर्ने, सूती थी गळ लाग ।  
जागी नै विलखी भई, जांणै इसी भुयांग ॥

उमा कैती री,

प्रीतम छेहनां दीजिये, मुभकूँ वाली जांण ।  
जोवन फूल सुवास रित, भमर भले परमाण ॥

“भीमा, बीने धीरज बंधावै” थारा ही दिन आवैला, ठैर, धवरा मत ।”

“भीमां, जीं वीरणा पै थूं घमंड खावै के सुणार दोड़ता हिरण एक जावै, वीं वींणा रे कांई व्हीयो थारे ? बजाय एक दांण खीची ने तो म्हारे कर्ने बुलाय दे, एक दांण तो ।”

“म्हूं रावजी ने देखूं तो सब करलूं परण वे तो म्हारी छाया कर्ने ही नीं आवै । एक दांण म्हारा कर्ने आय जावै तो सारा काम सारलूं ।”

उमां भीमां दोई वैठी उपाय सोचै, यूं करतां करतां बरस बीतग्या । एक दिन भीमां चतराई चाली । लालांजी रे गैणा रो सोख घणो । उमा रा हार री तारीफ करण लागी । लालांजी री छोरचां सुण वाने कह्यो । लालांजी ने वीं हारने देखवा री हूस आई । हार मंगायो । भीमां जाय भट लालांजी रे गळा में हार न्हांक दीघो । हार ने देख लालांजी रे मूंडा में पाणी आयग्यो, “म्हारे ही अस्यो को अस्यो गढ़ावूं । एक रात म्हारे कर्ने छोड़ दो । काले पाछो भेज दूंला ।”

“एक रात रावजी ने म्हारा मेंलां भेज दो तो यो हार थारो ।”

भीमां निसांणो मारयो । लालांजी मानगी एक रात में कांई है ।

रात ने रावजी आया तो मेवाड़ी सोळा सिणगार कर गळा में हार पैर मुजरो कीघो । रावजी री नजर हार पै अटकगी ।

“लालां यो नोलखो हार ?”

“म्हारा पीहर सूं आयो”

“राणाजी रो घर है । सैस मेवाड़ रा धणी । क्यूं नीं अस्यो गहणा दे ।” “आप काले उमा रे मेंलां जाय पोढ़जो परण कमर बन्धो खोलजो मत, बोलजो मत ।”

रावजी अचरज सूं लालां रो मूंडो देखवा लाग्या । आज ईं मूंडा सूं ये बोल, कह्यो तो कांई नीं परण मन में घणा राजी ।

“भीमां, आज थारो चतराई, समभदारी करणो व्हे जो कर लीजे” घड़कती छाती उमा कह्यो ।

उमा रा मे'लां में आज उजाळो व्हीयो । ताक ताक में घी रा दीवा संजोया । चंद्रण काठ रा ढोल्या ने आज कसाय भीमां त्यार करायो । भीतां पै गुलाब जळ छिड़क्यो । छोरचां सवेरा सूं त्यारचां करवा लागी । भीमां आपरी वीण रा तारां ने कस'र बांध्या । इत्तर री सुमंघ री घोरां उड़ री । उमा री छाती घड़क री । एक पल मूंडा पै नूर चढ़ै दूजे पल आख्यां में उदासी । हाथ जोड़ देवता मनाय री । सांभ पड़ी । उमा सनान कीघो । पोसाक सात बरसां सूं काढ'र पैरी । नैणां में काजळ सारचो । ललाट पै कस्तूरी रो तिलक लगायो । बाळ बाळ मोती सारचा जतरा सात बरसां में आख्यां सूं मोती टपकाया जतरा ही ।

रात पड़ी रावजी आया । खमा, खमा कर भीमां बघाय लाई । लाखां मनोरथ हिवड़ा में दवायां सात सात बरसां रा वियोग पछै मिलवा री घड़ी आई । खांत भरचोड़ी उमा साम्ही गी । है ! पण वीरा पग बठै रा बठै थम गया । हालणी नी आयो बोलणी नी आयो । रावजी उमा साम्हां भाक्या तक नी । तरवार सिराणै राख, बंध्योड़े कमर बंदै ढोल्या पै मूंडो फेर सोयग्या । उमा घीरै घीरै आय ढोल्या कने पगांत्यां ऊभी रैगी । रावजी उमा साम्हा भाक्या तक नी । रावजी बतलाया नी । भीमां ये हाल देख वीण ले माळिया वारै बजावा ने वैठी । वीण रा तार हाल्या, लारै लारै आसावरी राग में गावा लागी ।

घिन उमादे सांखली, थें पिव लियो मोलाय ।  
सात बरस रा बीछड़चा, तो किम रैग विहाय ॥

घन है, उमा थनें । थें आज थारा पीव ने मोल ले लीघो । सात सात बरसां रा थं विछड़चोड़ा हो, अर या रात ईया किया विताय रिया हो ?

किरती माथै ढळ गई, हिरणी लू'वा खाय ।  
हार सटै पिव आणियो, हंसै न सामो थाय ॥

“किरत्यां रा तारा ढळ गया । हिरणां रो तारो नीचै उतर गियो । आधी रात वीत गी । हार रे साटै पिव ने लाया पण थो तो नीं तो हसै अर नी माम्हो ही भाकै ।”

उमा रे आख्यां में सूं तो आंसू री वू'दां टपकै । ढोल्यां कने ऊभी ऊभी रावजी रा पग दवावै । रावजी सूता सूता भीमां रा दूहा सुरणै । उमा रे आंसू पड़ता देख्या तो भीमां ने अबकाई आई । दूहो गायो,

चनण काठ रो ढोलियो, किस्तूर्यां आवास ।  
घण जागै पिव पोढ़ियो, वाळूं यो घरवास ॥

चंदण रो ढोल्यो व्हे तो काई ? किस्तूरी री सुगंध आय री है तो काई ? काई पड़चो यां में ? जीं घर में लुगाई तो जागै आंसूडा टपकावै अर पिवजी सूतो नींद लेवै, अस्या घर में वासदी मेलो । काई काम रो अस्या घर ?

लालां लाल मेवाड़ियां, उमा तीज बळ भार ।  
अचळ एराक्यां ना चढै, रोड़्यां रो असवार ॥

लालां तो खैर लालां है, उमा री होड़ काई करै । अचळदासजी तो रोड़्यां रा, टट्टां रा सवार है, एराकी घोड़ा पै थोड़ा ही चढ़ जाणै ।

अवै भीमां जीभ रा तीर छोड़वा लागी । मन रा दुख ने वीण रा तारां पै चढ़ायो ।

काले अचळ मोलावियो, गज घोड़ां रे मोल ।  
देखत ही पीतळ हुयो, सोकड़ल्यां रे वोल ॥

काले हीज तो ईं अचळदासजी ने म्हां हाथी घोड़ां रे भाव मोल लीघो, ओ तो देखतां देखतां सोकड़ल्या रे सिखावा सूं पीतळ व्हेग्यो ।

धन दिहाड़ो धन घड़ी, में जाण्यो थो आज ।  
हार गयो पिव सो रह्यो, कोई न सरयो काज ॥

म्हें तो जाण्यो आज रो दिन धन है आज मिलांला पण म्हांरो तो हार ही गियो अर पिव ही सूतो पड़चो है । म्हांरो तो एक हीं काज सरयो नीं ।

निस दिन गई पुकारतां, कोई न पूगो दाव ।  
सदा विलखती घण रही, तोई न चेत्यो राव ॥

रावजी सूता सूता सुणै । काळजा में खटका तो पड़ै पण बोलै नीं । उमा रो काजळ वैय वैय टप टप पड़ै । पग दवातां दवातां बीरा हाथ दूखवा लाग्या । भीमां देख्यो, अस्या अस्या बोल सुणाया यां ने रीस देवावा ने पण वोल्या नीं, अबै यां ने रस री वातां कैवूं तो यां रो सूतो लगे नेह जागै ।

तिलक न भागो तरुण को, मुखै न वोल्या वैण ।  
माणक लड़ छूटी नहीं, अजेस काजळ नैण ।

मूंडा सूं थें कोई वोल्या नीं । तरुणी रा माथा रो तिलक ही कोनी विगड़चो । मोतियां री लड़ां ही नीं विखरी । आख्यां रो काजळ ही ओजूं यूं रो यूं है ।

हार दियो छेदो कियो, मूक्यो मांण मरम्म ।  
उमां पीव न चक्खियो, आडो लेख करम्म ॥

गांठ रो हार दीवो, छच्छन्द कीघा, आपणो मान गमायो । अतरो करता ही उमा रो तो पिव सू संयोग ही नीं व्हीयो । करम में आडो लेख है ।

ओढण भीणां अंवरां, सूत्यो खूंटो ताण ।  
ना तो जायो वालमो, ना वण मूक्यो माण ॥

भीणी चादरा ओढ़, खूंटो ताणचां सोय रिया है । नीं तो पिव ही जागै नीं वण ही मान ने छोड़ै । रात यूं ही बीत री है ।

अस्या अस्या कामोत्तेजक दूहा सुणाया पण खीची तो हात्या नीं । वचन निभावता रिया । भीमां ने रीस आई तो वीं जोर चूं कह्यो,

खीची वेचां हे सखी, जे कोई खीची लेह ।  
काल पचासां म्हां लियो, आज पचीसां देह ॥

खीची ने वेचां हां, कोई खीची ने मोल लो, कोई मोल लो । वणों सूंधो । काले पचास में म्हां मोल लीवो आज पचीस में ही देवां । कोई लेणो व्हे तो लो ।

यूं गावतां रोवतां सारी रात बीतनी । पी फाटवा लागी लालांजी री छोरी रावजी ने लेण ने आय ऊमी री । आसा छोड़ उमा, भीमां ने कह्यो,

मांग्यां लाभै जव चणां, मांगी लभै जुवार ।  
मांग्यां साजन किम मिलै, गहली मूढ गंवार ॥

मांग्योड़ी चीज कदे ही आपणी व्ही है के ? मांग्यां तो जाँ, चणां मिलै । गहली, कदे ही मांग्या ही साजन मिल्या है ? यांरा यांने ले जाए दे ।

लालांजी री छोरी बोली,

पोह फाटी पगडो भयो, व्हाला वीच्छडियाह ।  
मेल सखी म्हारो वालमो, थांका कज सरियाह ॥

जद भीमां वीण ने फँक कह्यो,

पोह फाटी पगडो भयो, विच्छडण री है वार ।  
ले सखि थारो वालमो, उर दे म्हारो हार ॥

सेजा थारा वालमां ने म्हांने म्हारो हार सूं ।

रावजी जाए लाग्या तो भीमां ने पूछ्यो.

“थो थां राते काई कह्यो, हार साटै पिव आणियो ।

“रावसाब, म्हां तो आपने हार रे साटै मोल लीघा हां एक रात सारुं । म्हारो तो हार ही गयो’र थां ही चाल्या, काम सरघो नीं एक ।”

“मेवाड़ी री या हिम्मत के मनै वेचै” रावजी रे ललाट में तीन सळ पड़ग्या, आंख्यां राती व्हेगी ।

भीमां भट बळती में पूळो मेल्यो,

लालां मेवाड़ी करै, बीजो करै न कोय ।

गायो भीमां चारणी, उमा लियो मोलाय ॥

अौर लालां सिवाय कुण वेचैला ? उमा थाने मोल लीघा है अर भीमां गाय गायने या बात दुनियां में केय री है ।

“उमां अचळ मोलाविया ज्यूं सावण री लूंम”

रावजी रे काळजा में भीमां री वातां चुभगी । बोल्या, “लालांजी ने म्हारा सूं ही हार आछो लागै ।”

उमा दांतण करो, कैवो तो लालां रे मे’लां में पग देवा री सोगन ले लूं ।” उमा बोली “अवारुं तो आप पघारो म्हूं बुलावो भेजूं जद बैठ्या व्हो ज्यूं रा ज्यूं म्हारे पघार आजो ।”

लालां मेवाड़ी रे मे’लां में बैठ्या रावजी चोपड़ खेल रिया । उमा री छोरी आई ।

“वाईसा बुलावै ।”

हाथ रा पासा फैंक रावजी उठ्या । लालांजी पल्लो पकड़ खैचता बोल्या “जावो कठै ? रमत पूरी करो ।”

“थां तो, म्हांने सांखली ने वेच दीघा, फेर काई ?” पल्लो छुड़ाता रावजी चाल्या । “थां सूं घरवास कहूं तो राणाजी री सोगन” लालांजी रीस में आय सोगन खाय बैठ्या ।

उमा रा चीत्या व्हीया । रावजी उमा रे मे’लां रैवा लाग्या ।

## सोरठ

खळळ खळळ करती नदी ब्रैय री, ऊगता सूरज री किरणां सुं चमक चमक करती लै'रां एक दूजी रे पाछै भागी भागी जाय री । जांणै होड़ लगाय री, व्हे के कुण आगै निकळें ।

नदी रा किनारा ऊपरली सिलाड़ी पै कपड़ा पछांटता घोवी री नजर नदी रा पाणी में बैवती, कोई चीज पै पड़ी जो सूरज री किरणां में चमकती धीरै धीरै बैवती आय री ।

कनें ही चांपो कुम्हार माटी खोद रियो, घोवी हेलो मारघो, “डेख तो काई बैवतो आवै ?”

दोई जणां 'ऊभा व्हे देखण लाग्या, “है काई ? पींजराघटी कोई चीज बैवती आय री है, ईंने काढां ।”

घोवी बोत्यो, “पींजरो म्हारो, मांयने जो चीज व्हे वा थारी ।”

चांपो अर घोवी लंगोट बांध दोई पाणी में कूदचा, रस्सो घाल, खैचने किनारा पै लाया, सोना रो काम व्हीयोड़ो पींजरो । पींजरो खोलै तो मांयने रुई रा पैल में दवायोड़ी टावरी, दो च्यार घड़ी री जनम्योड़ी, जांणै गुलाब रो, फूल व्हे । “हाय, हाय, कुण हत्यारो है ? है तो मोटा घर री पण वैवाई क्यूं ?”

चांपो कुम्हार टावरी ने उठाय छाती रे लगाई, “भगवान री इच्छा है, म्हारी नपूतिया री भगवान ने गोद भरणी ही ।”

“पींजरियो घोवी लियो, सोरठ लई कुम्हार ।”

कुम्हार लेजाय कुम्हारी री गोद में दीधी ।

“ले भगवान भेजी है, पाळने मोटी कर ।”

कुम्हारी छाती रे लगाय लीधी, छाती में मोह सूं दूध उतर आयो । आस्यां री

पलकां ज्यूं ईंने राखै ।

सांचोर रा राजा रायचन्द देवड़ा रे घरै मूळ नखतर रा पैला पाया में वेटी जनमी, ज्योतसियां कह्यो, “वाप रे अनिष्ट कारक है ।”

राव अहैड़ै नीसरिया, साम्ही भिली छै धाय ।  
मूळां जाई डीकरी, नदियां देवो वैवाय ॥

राव तो मूळां जाई डीकरी ने नदी में वैवाई पण चांपा कुम्हार रे आंगणां में आगांद उतरग्यो । दोई मोटघार लुगाई पल पल मुंहगी करै, वारी बरसां री आसा, कदे ही वारा ही आंगणां में, “भूख लागी, भूख लागी” करतो टाबर पगां ने पटकतो घूघरिया वजावतो रोवैला, पूरी व्ही । “मां” सवद सुणवा री भूख बुम्हारी रा काळजा ने चूटती रैती, टाबरी ने पल्ला नीचै ढांकनै मूंडा में दोवो घालती वा निहाल व्हेगी ।

चांपो पालणां में हुलरावतो बोल्यो, “आखा.सोरठ देस में फिरजा जो थने असी रूपाळी कोई लाव जावै तो । सारा सोरठ रो रूप भेलो व्हे ईं में आयग्यो है ।”

नाम राख्यो सोरठ । सोरठ तो मोटी व्हे सुकल पक्ष रा चांद री नाईं, घड़ी वघतां पल वघै । कुम्हार री भूंपड़ी में जांगै चांद पवास्यो ।

चांपो ज्यूं सोरठ मोटी व्हे ज्यूं वीरी घणी सम्हाळ राखै । बारणै मांयनै नीं आवा जावा दे । कुम्हारी ने समभावतो रै,

“देख कठैई कोई मोटा राजवी री नजर सोरठ पै नीं पड़ जावै । नीं तो आंपणो अभाग व्हे जावैला, सोरठ ने मांग लेगा, खोस लेगा । थूं ईं ने घर वारै मत निकळवा दे ।”

हूध अर पूत ही कदे ही छिपायां छिप के ?

पोळ री धेली कनें दूजी कुम्हारां री छोरचां साथै सोरठ ऊभी । अतराक में गिरनार रो राव खंगार वींभा ने लारै लीघां, सिकार खेलतो खेलतो वीं गैले व्हेने निकळघो वींभा री नजर सोरठ मार्यै पड़ी, दृष्टि डियायां डिगै नीं ।

सोरठ थाने देखिया, जाभा भूलर मांहि ।  
जांगै चमकी वीजळी, गुदळै वादळ मांहि ॥

वींभो तो वठै रोवठै लट्ठू व्हेग्यो । राव खंगार रो घोड़ो बीस कदम आगै निकळघो, पाछै फिरनै भाकै तो वींभो अटक्यो ऊभो । घोड़ी पाछो मोड़घो ।

राव खंगार ने आता देख वींभो सोरठ साम्ही आंगळी करतो वोल्यो,

कुम्हारां री डीकरी, ऊभी मांड तळांह ।  
वींभो पूछै राव ने, कहो तो मोह करांह ॥

अतराक में कुम्हारी आई, सोरठ ने पोळ में ऊभी देखी, वारै घोड़ा सवारां देल्या,  
भट सोरठ रो बांवटचो पकड़ नै खैच लेगी ।

आव परी कै जाव परी, अघबिच ऊभी कांह ।  
कोयक गरास्यो देख सी, कळंक लगावै मांह ॥

जाती जाती सोरठ रो पळाको राव खंगार ने पड़्यो । माथो धूण लीघो । वींभो  
कह्यो “ईं ने मूंडै मांग्यो घन दे मोल लेलां ।”

खंगार हूंकारो भरयो । बीभै जाय नै चांपा ने कह्यो । चांपै जवाव दीघो, “परथी  
रो राज दे दो तो ही म्हंने वेटी वेचणी नीं ।”

राव खंगार वोल्यो, “वेच मत । म्हूं गिरनार रो राजा हूं म्हंने परणाय दे ।”

चांपै कुम्हार हाथ जोड़्या, “सगपण आपरा वरोवरिया सूं चोखो लागै आप राजा  
म्हू कुम्हार, आपने परणाय हूं तो काले म्हारी वेटी ने वीरीं सोक्यां मोसा वोलै  
“दूरी रै कुम्हार री छोरी ।” ईं वास्ते परथीनाथ म्हूं तो म्हारी छोरी ने म्हारा  
जसी जात वाळा ने ही परणावूंला ।”

वींभै घर्यो ऊंचो नीचो लीघो पण चांपो मान्यो नीं । दोई मामा भाणेज गिरनार  
आडी ने चाल्या पण बीभा रे काळजा में तो सोरठ री तसबीर कोरणी आयगी ।  
असी ऊंडी उतरगी के काढ्यां कढै नीं । रात दिन सोचतो रैवै किस तरै सोरठं ने  
लावूं ।

चांपा कुम्हार ने सोच लाग्यो, अवे सोरठ ने परणाय देखी । चोखो घर वर देखतो  
फिरै । भाग री वात वराजारा रो राव रूड़, सांचोर आय निकळ्यो । लखपती  
वराजारो, मोकळो घन आगै दीघां पाछै पड़ै । “भाड़ भंजण” जीरो विड़द लाख  
पोठी लारै लदै ।

चांपै मन में विचारयो ईं ने-सोरठ ने परणाय द्यां, वंठी राजस करैला । रूड़ ने  
परणवारो कह्यो । सोरठ जसी नार ने कुण नटतो । राव रूड़ रे लारै व्याव कर  
दीघो । रूड़ जीं री जीं वगत काठ रो जाळीदार पींजड़ा-घट्टो मे'ल वणायो, जीरे  
पैड़ा लगाया । वीं मे'ल में सोरठ ने वंठाई । जठै आप जावै जठै लारै रो लारै, पींजड़ा  
जस्या मे'ल रे वंल्या जोताय साथै लीघो फिरै ।

वींभा ने खबर लागी सोरठ रे व्याव री । मन में राजी व्हीयो खैर बणजारा तो फिरता ही रैवै, कदी न कदी तो गिरनार आवैला हीज ।

छै मीना व्हेग्या, सोरठ रूड़ रे लारै गांव गांव पैड़ा वाळा मे'ल में वैठी फिरै । गिरनार रो तरभंगर जंगळ, भाड़ी सूं भाड़ी अड़ री । खळखळ करता भरणां भर रिया । पहाड़ में वव्वर ना'र डक्कर रिया । गिरनार रा पहाड़ पै टम टम करती साधुवां री सैकड़ा घूरियां वळ री । ऊंचा रूखड़ा पै हजारं दम दम करता आग्या (जुगनू) ईं डाळ सूं वीं डाळ पै उड़ उड़नै वैठ रिया । आधी रात रो वगत, बणजारा रूड़ री बाळद आय री । वैल्यां रा गळा में बंधी लगी घंटियां भरण भरण करती जाय री । रमभम रमभम छांटा पड़ रिया, वींभो ऊंचो माळिया में सूतो पण आंख्यां में नींद नीं, सोरठ री तसवीर रै रै नै आंख्यां आगै आय जावै । वैल्या री घंटियां रो भणकारो सुण वींभो आदमी भेज्यो खबर लावा ने, आधी रात कुण आयो ।

आदमी खबर लायो, बणजारा रूड़ री बाळद आई । वींभो सूतो ज्यूं रो ज्यूं ऊभो व्हेग्यो, खंगार रे मे'लां चाल्यो । खंगार पोढ रियो, परधान सींहो पीळ पै वैठयो ।

वींभो तो जाय राव खंगार ने भंभेड़्या, “वघाई बगसो, राव रूड़ आयो ।”

राव खंगार कोटवाळ ने बुलाय हुकम दीघो “बाळद ने आछी जगां डेरा देवावो, तंवू ताण दो, आछी सरभरा करो ।”

वठी ने तो बणजारा रा डेरा लाग रिया, सरभरा व्हेय री, अठी ने वींभा ने सारी रात नींद नीं आई । कदी दिन ऊगै अर कदी जावू ।

पोह फाटतां सोरठ री नींद जागी, उठ'र जाळीदार काठ रा मे'लां में वैठगी ।

वींज वगत वींभो बणजारा रे डेरे पूग्यो । वींभा री नजर सोरठ सूं मिली, चो नजर व्हीया । वींभो तो पे'लां ही घायल व्हीयोड़ो ही, सोरठ ही आपो भूलगी । एक दूजा ने देख्यो अर एक दूजा रो व्हेग्यो, ऊमर भर सारू । एक दूजा आंख्यां में मन री सारी पोथी बांच लीधी पण तीसरा ने खबर पड़ी नीं ।

वींभो, आछी तरह सूं रूड़ बणजारा री खातरी कर मे'लां आयो । आय अरज करी ।

“सोरठ ने लेवणी व्हे तो बणजारा रे लारै चौपड़ खेलां ।”

राव खंगार बात मानी, रूड़ रे लारै घणी वातां चीतां व्ही, चौपड़ री वाजी जमी ।

राव खंगार चोपड़ खेलै अर वींभों पासा फैंक ।

खेलतां खेलतां वरणजारा रो सारो माल सोरठ रा पींजड़ा सूधी जीतग्यो ।

वींभो जीत्योड़ा माल ने लेवा वरणजारा रे डेरे चाल्यो ।

माल तो सारो राव खंगार रे मै'लां पूगतो करायो अर सोरठ रो पींजड़ो आपरे मै'लां रवाना कीघो ।

मे'लां री चानणी पै ऊभो ऊभो राव खंगार देख रियो, सोरठ रा पींजड़ा ने वींभा रा मे'लां साम्हा जावता देख ने हुकम दीघो, "यो पींजड़ो म्हारां मे'लां में लावो ।" वींभो मूंडो देखतो रैग्यो, सोरठ रो मूंडो उतरग्यो । राव खंगार देखै तो पींजड़ा में सोरठ वैठी जांरै इन्दर लोक सूं अपसरा उतरनै आई व्हे । खंगार री खुसी रो हिसाव नीं ।

वींभा ने कह्यो, "वरणजारा सूं जीत्योड़ो सारो घन थारो, यो पींजड़ो म्हारो ।" वींभो तड़फग्यो ।

"सारो जीत्योड़ो घन आप राखो, म्हंने तो पींजड़ो दे दो, म्हारे तो ईं पींजड़ा मांयलो घन चावै और कांई नीं चावै ।"

राव खंगार मान्यो नीं, सोरठ ने आपरे रावळा में भेज दीघी ।

वींभो मन मार दरवार में जाय वैठ्यो ।

ऊंचो गढ गिरनार, आबू पै छाया पड़ै ।

सोरठ रो सिणगार, वादळ सूं वातां करै ॥

ऊंचा गिरनार रा, ऊंचा गढ में वैठी जद सोरठ सिणगार करवा लागती तो वायरा रे लारै उड़चा जावता वादळा ही गैला में दो पल सोरठ ने देखवा ने रुक जाता ।

सुपारी रा रंग जसी सांवळी सोरठ रा लूंगां जसी चरपरी देह गन्ध तर व्हीयोड़ो वायरो, गिरनार री सारी वणराय ने मैहकातो वैवा लागतो । सोरठ रा रूप री महक सूं सारो गिरनार पहाड़ सुगंधित व्हेग्यो ।

सोरठ रंग री सांवळी, सुपारी रे रंग ।

लूंगां जेड़ी चरपरी, उड़ उड़ लागै अंग ॥

सोरठ रा भांभर री भणकार सूं गढ घूजवा लागतो, गिरनार पहाड़ गाज उठतो ।

भांभर रा घूघरा रा भणकारां सूं मे'लां री भीतां गूजवा लागती ।

सोरठ गढ़ सूं ऊतरी, भांभर रे भण्णकार ।  
धूज्या गढ़ रा कांगरा, गाज्यो गढ़ गिरनार ॥

सोरठ रा रूप ने देख ने कुण थिर रै सकतो ?

सोरठ सिरणगार करनै गोखड़ा में चढ़ती तो गिरनार रा गढ़ रा कांगरा एक टक देखता रै जाता, गिरनार पहाड़ आपरी चोटी ने ऊंची कर भांकवा लाग जातो । विरछ भोला खाय खाय आपणां पानड़ा ने सरावणां रा सनेसा दे दे गोखड़ा में उड़ाय देता ।

विरछां रा कांधा पै लटक्योड़ी वेलड्यां डाळां ने गाढी पकड़ लटूंबण लागती । आंवा रा मोड़ां रा रस पीवता भंवरा ही मींजरां छोड़ बठीने भण्णगाटा लेवा लाग जाता । सोरठ रे रूप में अस्यो आकरसण हो जो देखवा वाळो एक दाँण चेतो खोय देतो । बाणिया बंपार करणो भूल जाता, करसां रा हाथ सूं बळद छूट जाता ।

सोरठ गढ़ सूं ऊतरी, कर सोळा सिरणगार ।  
वरणज गमाया बाणियां, वळद गमाया गंवार ॥

सोरठ वैठी राजस करै राव खंगार हुकम हुकम करै, पल पल पाणी उतारै । सोरठ रा मन में तो वींभो वैठयो लगे । राव खंगार सोरठ ने लारै ले घणा रंग राग करावै, गोठां माठां करावै, रात दिन आणंद करै । राज काज रे काम ने भूल राख्यो । यूं करतां करतां छै मीना व्हेग्या । राव खंगार ने वारै मूंम पै जावणो, अतरा दिन तो टाळ्या पण जावणो ही पड़यो । जाती वगत सोरठ ने पूछ्यो,

“धारो जीव किस तरह लागैला ।”

सोरठ उदिया ढोली ने मांग लीघो के ईं ने हुकम दे जावो जो म्हारी ड्योढी पै गालो करवो करै ।

राव तो मूंम विदा व्हीया नै वींभा ने पाछलो काम सूंप्यो, कूंचियां जनाना री सूंपी । राव चाल्या । वींभा रो जीव उथल पुथल व्हे रियो, दिन में सी सी निसासा न्हांके । सोरठ सूं दो वात करवा ने उमगायो रैवै पण ओसर लावै नीं ।

सोरठ डाळी अं व री, ऊगी विखमी ठाय ।  
वींभो वंदर हो रियो, कद टूटे कद खाय ॥

वींभा रा भाग सूं एक दिन डाळी टूटी । सोरठ वैठी माथो गुंथाय री । उदियो ढोली ड्योढी पै माढ रा दूहा देय रियो । सोरठ री नजर दरवाजा पै वैठ्या, जीवन

में छक्या वींभा पै पडी । एक बुलावो भेज्यो, दूजो बुलावो भेज्यो । वींभो आयो ।  
सोरठ बोली,

वींभा म्हाके आंगणां, नित आवो नित जाय ।  
घट की वेदन वालमा, तो सूं कही न जाय ॥

वींभै आपरा मन री दसा बताई,

वेदन कहां तो मारिजां, कहतां लाज मरांह ।  
म्हे करहा थे बेलड़ी, नीरो तोही चरांह ॥

सोरठ बोली, “राव खंगार म्हुने चोपड़ में जीती तो कांई ? जीत्यो तो म्हारो सरीर  
ही । परा म्हारा मन ने जीतवा बाळा थां हो । सरीर रो धणी मन रो मालक नीं  
बण सकै, मन रो मालक सबरो मालक व्हे ।”

वींभा ने लाग्यो जांणै आकास सूं अमरत री बरखा व्हेय री । निहाल व्हीयोड़ो  
वींभो सोरठ रा हाथ ने हाथां में भाल लीधो ।

सोरठ खुलासा कीधो, “आखी ऊमर निभावो तो हाथ पकड़जो ।”

वींभै सूरज ने साक्षी कीधा, “जीवतो तो थारा सूं बीछड़ूं नीं मर जावूं तो दोस  
मत दीजे ।”

दोई जणां सूरज ने अर भगवान ने साक्षी कर, मन रो गठजोड़ो बांध आतमदान  
दीधो । परतंग्या लीधी, “एक दूजा सूं अळगा कदे नी व्हां ।”

वा ! वींभो तो अस्यो रमियो के फिरै नै सोरठ रे मे'लां में जावै । सोरठ उमगी  
वैठी बाट जोवै । वींभा रो तो सोरठ रा मे'लां में आवणो व्हीयो नै उदियै ढोली  
दूहो दीधो,

वींभो बाळक डावडो, हिलयो वागां जाय ।  
डाळ मरोड़े रस पिवै, फळ लाखीणा खाय ॥

वींभै सुण्यो, सोरठ सुण्यो, दोई जणा दूहा रो मरम समझ्या एक दूजा साम्हा  
भांक्या । सोरठ गळा रो हार उतार नै उदिया ढोली ने नीचै फैंक्यो ।

अवै तो रात दिन वींभो सोरठ रा मे'ल में रैवै । उदियो गावै अर वे रीभां करै ।  
दिन तो घड़ी ज्यूं जावै अर घड़ी पल ज्यूं बीत जावै ।

सोरठ अर वींभो तो दूध अर पाणी ज्यूं मिलग्या । फूल अर गन्ध ज्यूं एक जीव  
एक मन दो सरीर ।

वे जाणता हा कस्या खतरा सून वे खेल रिया है, कदे ही बींभो गळगळो व्हे सोरठ ने पूछतो, “थून सांची बता कठै ही राव रे आयां वारां भै सून कमजोर तो नी निकळ जावैला ? म्हारा सोना, कठै ही थून पीतळ मत निकळ जाजे ।”

सोरठ सोना रो टको, पर हत्य लो परखाय ।  
खोटा कळजुग वापरचां, (राणी) मत पीतळ व्हेय जाय ॥

सोरठ कदे ही पूछती, “म्हंने भूल तो नीं जावोगा ? देखो म्हारा सून दूरा तो नीं व्हे जावोला ?”

“सोरठ थून असी ऊंडी गडगी है काळजा में । जीवतो तो कांई म्हूं मर जावूं नै थून आय मसाणां में हेलो मारै तो म्हारी भसमी बोल उठैला ।”

अस्या समै में उदियो गावतो,

सोरठ थां में गुण घणां, कदियन ओगण होय ।  
गूंदगरी रा पेड़ ज्यूं, रतियन खारो होय ॥

सोरठ री तारीफ सुण बींभो वाग वाग व्हे जातो । तपता तावडा रो तातो वायरो ही सीतळ लागवा लाग जातो । अंधारी रात ही उजाळी उजाळी दीखवा लागती । सारो जगत एक घेर घुमेर आंबा रा पेड़ जस्यो दीखतो, जो पाका आंबा सून लडालूव व्हेय रियो व्हे । डाळ डाळ पै तिरपत कोयलां बोल री व्हे । रस सून छाक्या भंवरा मांजरा रै ओळूं दोळूं घुमर घाल रिया व्हे । जाणै ईं जगत रो पत्तो पत्तो कैवतो व्हे,

“आंबी रस पीवजो पिलावजो”

पण यो सुख रो संसार कतराक दिनां रो ?

अठीने वठीने चरचा चालवा लागी, कानां में वातां व्हेवा लागी । सोरठ रे ही भणकारो पड्चो, चमकी । बींभा ने आयनै कह्यो ।

बींभो बोल्यो, “डरपगी ? बावळी ! प्रेम ही कदे छिपायां छिप्यो है ? फूलां री सुगन्ध कदे ही छिपी री है ? फूल रे खुलतां ही सुगन्ध ने पवन ले भागै अर च्यारूं आडीने विखेर देवै तो फेर प्रेम रो पवित्तर फूल खुलै जीरी खसवोई तो दस ही दिसा में फूट्यां विनां किरण तरै रै सकै ?”

सोरठ वारां पवित्तर अर गाढा नेह पै सोचती लगी कैवती, “बींभा ! पूरवला जनम में आपां रा हाथ सून कोई मोटो पाप व्हीयो जो ईं जनम में आपां अतरा दूरा पड्चा । कोई सराप रे कारण विछोडो व्हीयो ।”

जीवण रा अतरा बरस जो एक दूजा बिना अवार तेक गमाया, वां वीत्योड़ा बरसां पै नजर न्हाकता, पछताता लगा मोटो नीसासो न्हांक देता । संजोग रो एक एक पल अमोलक लागतो, अभिलाखा करता या सारी जिन्दगानी यां दिनां री एक घंडी बण जावै, परण यूं व्हे कठै ? संजोग री घंडी तो पल ज्यूं वीतै अर विजोग रा पल बरसां ज्यूं लांवा बघ जावै ।

अंधारी राते तारा टम टम कर रिया, गिरनार पहाड़ रा खाळचा में फूल्या केवड़ा री सुगध सूं घीमो घीमो वाजतो वायरो गरणाय रियो । उत्तराघ सूं वादळा गढ़ रा धूमटां रे अड़ता लगा निकळग्या । घूंसाळा में पंछी, घरां में मिनख सूता पड़चा । मंभ रात रो बगत, हिरणी रो तारो गढ़ रा कांगरा री सूघ पै चमक रियो । मे'लां मांयने हिंगळू पागां रा हिंगळाट माथै सोरठ अर बीभो निसंक सोय रिया । कूणां में अतर रो दीवो बळ रियो । मंघरो मंघरो उजास व्हे रियो । चांदी री सांकळां में घल्यो हिंगळाट घीमो घीमो हाल रियो । धीरै धीरै हींडा लाग रिया जीसूं सुख री नींद अोर ही गाढी नैणा में घुळ री । टूटचोड़ी मोगरा रा फूलां री चोसरां अठीने वठीने बिखरी पड़ी । सेज में बिछायोड़ी गुलाब रा फूलां री पांखड़्यां सूं भीनो भीनो सारो मे'ल महक रियो । सोरठ अर बीभो सुध खोय गाढा सोय रिया । राव खंगार तो खड़ खड़ करता, विना खबर कीधां मे'लां में चढ़ आया । खंगार ने देखता ही पोळ बाळा पोळ दीधी, डचोड़ी बाळा डचोड़ी रो ताळो खोल दीधो । राव तो सूधा सोरठ रा मे'लां में आया । देखै तो हिंगळाट पै बीभो दीख्यो । रीस रा मारचां सारो डील घूंजवा लाग्यो । होठ थर थर कापवा लाग्या । हाथ सूधो कमर मे कटारा पै पड़्यो । कटार खैच नै दोवां री छाती में मारवा नै हाथ छाती तक पूगनै रुक्यो । राव ने विचार आयो, मारचां सूं काई ? ईं में तो म्हारो ही नाम कुनाम व्हेला ।”

बीभो मारूं तो भाणजो, सोरठ घर री नार ।

जांघ उघाड़्यां आपणी, भूंडो कह संसार ॥

हाथ पाछो खैच लीघो, रीस में भरचा थका खंगार वारे सिराणै थांभो हो जीं में जोर सूं कटार री मारी तो मूठ तक कटारो थंभा में घंसग्यो । भाळां निकळती आंख्यां सूं भांक खंगार पग पटकतां ज्यूं आया ज्यूं वारै निकळग्या ।

सोरठ अर बीभो तो नसा में मस्त व्हीया सूता । वां ने खबर नी के कुण आयो अर कुण गियो ।

दिन ऊग्यो, उठ्या अर नजर पड़ी तो थांभा में कटारो गड़ रियो राव खंगार रो । “भूंडो धोळो पड़ग्यो, बीभो तो भट पाग रा अटपटा पेचां ने सूधो करतो माथै मेल

वारै किल्लयो । अबै मे'लां में वंठी तो सोरठ भूरै अर वारै फिरतो वींभो तलफं । रात ने जक पडै न दिन में । मिलै तो मरै, नीं मिलै तो रियो जावै नीं ।

सोरठ रे हिया में तो होळी ऊठै, मूंडा पै दिवाळी बतावणी पडै । राव खंगार पूरी नीगै राखै । दोई जणां आप आपरा मन ने संभवावा री करै पण मन समझ नीं । फळ कांई मिलैला जो जाणै, छानो कोयनी, पण मनायो मन मानै नीं । आपस में कीधा कौल याद आवै ।

आखैर रैवणी आयो नीं, औसर देख वींभो सोरठ कनें आयो । ऊनाळा रा तावडा में तपी, भ्राळां निकळती घरती ने सावण री उमडती घटा घपावा ने उलळती आवै ज्यूं वींभो आयो । सोरठ वरसता वादळा-ने देख मोरडीं ज्यूं साम्ही भागी । दो पल सारूं भूलग्या के वे कठै है ? कुण है ? वाने औसाण नीं रियो के वारा माथा पै तो नागी तरवार लटक री है ।

सोरठ ने चेतो आयो, “वींभा परो जा । ऊभो मत रै अबै अठै ।”

वींभो तो पूंगीं पै रीझ्या फण हलावता नाग री नाई माथो हलायो,

“भरणो एक दांण है सोरठ, कोई ईं वगत आय म्हारो गळो ही काट दे तो म्हंने अफसोस नीं । थारी गळवाथ मे कोई मार दे तो म्हारी मुगती व्हे जावै । ईं वेळा री तो मोत आयोड़ी ही मीठी ।”

सोरठ साकर री डळी, मुख मेल्यां घुळ जाय ।

सिवडै आय विलूवतां, हेमाळो दुळ जाय ॥

खैर, राव खंगार ने खबर लागणी ज ही । सोरठ ने डराई घमकाई ।

वीं खंगार रे आगै साफ साफ कैय दीघो, “म्हारो सात सात भव रो पति वींभो । मारो चावै जीवावो, आप धणी हो, मन व्हे ज्यूं करो ।”

अबै सोरठ रो खंगार करै तो कांई करै । सिवाई मारवा रे और कांई कर सकै ? वींभा ने तुरंत देस निकालो देय दीघो । सोरठ री ब्योडी पै करडा पैरा लगाय दीघा वींभो देस में घुसै नीं जस्यो परवन्व कर दीघो । जीं दिन सूं सोरठ तो राव खंगार सूं रूसणो कर लीघो । राव खंगार आवै, सोरठ री गरजां करै, मनावै । सोरठ तो विजळी ज्यूं कडक नै राव खंगार पै आवै । मूंडा पै तो सावण री घटा ज्यूं उदामी छाई रैवे अर आख्यां में सूं भादवारी ऋड़ी आंसुवां री लागती रैवे । उदियो सोरठ री वेदना समझै । वींभा कनें जाय उदियै सोरठ री दसा रो वरणन कीघो, जाणै

सोरठ री आतमा वींभा ने हेला दे दे कैयरी व्हे ।

सोरठ नागण हो रही, ज्यूं छेड़ै ज्यूं खाय ।

आजा वींभा गारूड़ी, लेजा कंठ लिपटाय ॥

यो दूहो सुणतां हो वींभो तड़ाछ खायग्यो । सोरठ ने लावा ने उतावळो व्हेग्यो, उन्मत्त व्हेग्यो । वीं ने कांई नीं सूभी । एक नबाव हो जी ने लाळच व्रताय गिरनार पै चढाई कराय दीधी ।

नबाव री फोजां गिरनार ने जाय बेरचो, जुद्ध व्हीयो, वींभो सोरठ ने लेवा री आसा में दीड़्यो परा ननाव सोरठ ने आपरा कब्जा में कर लीधी । वींभो कांई करै । वीं नबाव ने जतरो कैवणो हो जतरो कह्यो । जो कुछ वींरी सामरथ में ही सब कीधो पर वींभां रो कोई उपाय नीं चाल्यो । वींभो, निरास व्हे उन्मत्त व्हेग्यो, जठीने भांकै जठीने सोरठ दीखै, सोरठ रो नाम ले ले भींता सूं माथो फौड़ै, नबाव रा मेलां रे नीचै माथो फोड़ फोड़ तड़फ वींभो मरग्यो । उदियो वींभा रा मसाण में जाय बैठयो । मसाण में बैठयो वींभा सोरठ रा प्रेम गीत गावै ।

वठी ने नबाव सोरठ ने लाळच, ढरावणों, धमकाणो कर सब तरै सूं हारग्यो । सोरठ रो प्रेम वींभा सारू अतरो अटल देख नबाव ही माथो भुकाय दीधो । नबाव सोरठ ने पूछी,

“बोल, थूं कैवै जठै थनें भेज दूं । राव खंगार कनें, थारा वाप चांपा कुम्हार कनें, कै थूं कैवै तो विणजारा रूड़ कनें ? जठे जावणो चावै वता ।”

सोरठ रोवती थकी बोली, “कठेही नीं जावणो चावूं । वींभा रा मसाण में म्हंने भेज दे तो थारी मोटी मरवानी ।”

नबाव पालकी में बैठाय सोरठ ने वींभा रा मसाण में पाँचाय दीधी । आगै उदियो मसाण में बैठयो गाय रियो । सोरठ ने देखी तो उदियो पुलकित व्हेग्यो, भट गायनै वघाई,

भलां पधारी पदमणी, जहं वसिया विजचद ।

“थें थारो सत निभायो, नेह निभायो अर वचन निभायो । खम्माघणी ! म्हारी वणियाणी, आज थाने वींभा रा मसाणां में देख म्हूं निहाल व्हेग्यो ।”

सोरठ रोवा लागगी । उदिया ने याद देवाई, “थारो घणी तो कैवतो के म्हूं मरजावूं

नै थूं मसाराया में आय हेलो मारैला तो म्हारी भसमी बोल उठेला । ऊदिया ! बींभा ने रोय रोय हेलो मार री हूं वो आय नीं रियो है, थारो वणीं कठै गियो ? वोलायां बोलै नीं ।”

सोरठ सूरज रे साम्हे ऊमी व्हेगी । प्रार्थना कीधी, “हे सूरज भगवान ! थूं सब देखवा वालो है, थारां सूं कोई छानै नीं । जो म्हे बींभा ने मन वचन करम सूं नेह कीघो व्हे, जो म्हूं सुद्ध व्हूं अर सती व्हूं तो थूं अगनी प्रकट कर म्हंने बींभा कर्ने पुगाय दे ।”

सूरज री किरणां सूं अगनी प्रकट व्ही । बींभा री भसमी भेळै सोरठ री भसमी मिलगी ।

ऊदियो तंबूरो ले जीवतो रियो जतरै फिर फिर सोरठ बींभा रा जस गीत गांव गांव में चुणावतो रियो ।



## जलो

“बूबना री जोड़ रो वर कठै हेरू ?”

सिंध समंदर रा नवाब भवर ने घणो सोच छोटी बेटी बूबना - रे वर हेरवा रो । बूबना रूप रो भंडार ! गुणां रो दरियाव !! बूबना चालं जठीने अंधारा में उजाळो व्हेतो जावै । हंसै तो यूं लागै जाणै फेफ रा फूल खिर रिया है, फिरै जदी लागै जाणै कंकू रा पगल्या मंडता जाय रिया असी एडियां री राती राती भाई पड़ै । बूबना बोलती जद छाळ मारता हिरण वीणां रे भरीसै पाछा फिर न्हाळवा लाग जाता । वीरा डील में सूं भीणी भीणी सुगन्ध आवो करै ।

स्यांणा समभरणां बादसा ने कह्यो, “बूबना पूरी पदमणी है, अस्त्री में जतरा लक्षण व्हेणां चावै सगळा ईं में है, पूरा ही बत्तीस लक्षण ।”

नवाब रो बेटी पै लाड घणो, “चावै जो व्हो देस हेरू परदेस हेरू पण बूबना री जोड़ रो वर लावू ।”

ठावा आदमियां ने बुलाय बूबना री तसवीर दे, वांने हुकम दीवो, “देस जावो परदेस जावो । एक एक रजवाड़ी देखलो । बूबना री जोड़ रो वर हेरो । बूबना पूरी पदमणी है, वर ही पूरो छैल व्हेणो चावै । मन माफक वर नी मिलै जतरै थां पाछा अठै मत आवजो ।”

खरचो खातो देय विदा कीधा । देस देसान्तर फिरता फिरता थटाभखर जाय पूगा । बठा रा बादसा मृगतमायची री बेन रा बेटा जलाल ने देखनै राजी व्हेग्या । आखी दुनियां में फिर आया पण अस्यो जवान सुलखणो कठै ही नजर नी आयो । बूबना री जोड़ में जंचै तो यो ।

जलाल ने खानगी में लेजाय बूबना री तसवीर बताई । जलाल तो तसवीर देखतां ही लट्टू व्हेग्यो । मन में बैठगी । जलाल ने लाग्यो जाणै भगवान बूबना ने धीरे सारू हीज घड़ी है । तसवीर लेय लीधी ।

भला मिनख ही राजी राजी नबाब कनें गया, “हुकम मुजब आपरे मन रे माफक वर तै कर आयां हां । जलाल ने भगवान जाणै बूवना वास्ते हीज सिरज्यो व्हे । आखी पिरथी पै म्हां फिर आया परण अस्यो जोधो जुवान म्हारी नजर में नीं आयो । गोडां गोडां तक तो हाथ पूगै, एक बिलांत लांबी गावड़, पूरो पांच हाथ डीगो, चालै तो धरती घूजै । मूँछां भूंवारा सूं अइं । देख्यां भूख भागै । ससतर विद्या में परवीण । राजवी में जो सातू वसतुवां री परीक्षा व्हेणी चावै वां सगळां रो जांणकार । तरवारा रो पारखी, एक एक रा लोह री किसम न्यारी न्यारी बताय दे । संगीत विद्या रो पूरो जांणकार, छत्तीसूं राग रागणी रो समझण्यो, आपरे कनें टाळचोड़ा कळावत राखै । घोड़ां री जात रो पूरो ग्यान । रतनां रो पारखी, नवरतनां रो न्यारो न्यारो भेद अर मोल बताय दे । कविता रा मरम ने समझण्यो, कवियां ने लाख लाख री रीभां करै । चित्तर कळा रो प्रेमी । इत्तर रो घणो पारखी, आप खुद इत्तर री भाटी कढावै वीं इत्तर री खसबोई छानी हीज नीं रै । पांचसौ पांवडा दूरां सूं खबर पड़ जावै के जलाल आय रियो है । बैठणै रा माळिया ने भीमसेनी कपूर मिलाय केसर सूं पोताय राख्यो है । म्हांने तो जलाल जस्यो वर कठै ही ओर दीख्यो नीं ।

काछ ब्रढा कर वरसणां, मन चंगा मुंह मिट्ट ।  
रण सूरा जग वल्लभा, सो हम विरला दिट्ट ॥

“ये सगळा गुण जलाल में म्हांने दीख्या ।”

नबाब रो मन राजी व्हेग्यो । भला मिनखां जलाल री तसबीर काढ नबाब रे नजर कीधी । घणो राजी व्हीयो । बूवना कनें जलाल री तसबीर भेजी । बूवना तो मगन व्हेगी । वा मानगी वीने विधाता जलाल सारू हीज वणगई है । तसबीर ने पेटी में काठी कर मेल दीधी ।

नबाब हरख्यो लगो । काजी ने वीज बगत बुलाय थटाभखर रवाना कीधो, “बूवना रा सगपण रा नारेळ जलाल ने जाय भेलावो । बड़ी बेटी मूमना री सगाई लारै री लारै आछी जगा देख कर आवो ।”

काजी थटाभखर आयो । वादसा मृगतमायची ने जलाल रा सगपण री अरज कराई । मृगतमायची बूवना री तसबीर देखी तो वीरो मन हाथ वारै निकळग्यो ।

“काजीजी, बूवना रो नारेळ तो हमकू भेलावो ।”

काजी सोच में पड़यो, या आछी व्ही । यो बूढो खांपो मूँडा में दांत एक नीं, कवर में पग लटकाय राख्या, बूवना सूं परणणो चावै । काजी सलाम कर अरज कीधी,

“आलीजापनां रा हुकम सूं इनकारी नीं पण वूवना पूरी पदमणी है, जलाल सांव पूरा छैल है। यां री दोवां री जोड़ी वरावर री है। स्यांणां लोणां री राय सूं सारा लक्षण मिलाय यां रे नारेळ भेज्यो है।”

“हम कोण से छैल नहीं है ?”

“हजूर तो घणा आछा है पण उमर कुछ ज्यादा व्हेवा सूं.....”

“नहीं, वूवना रे साथ हम सादी करेगे।”

काजी हैरान व्हे कह्यो, “वड़ी बेन मूमना रे साथ आपरो ब्याव करदां, वूवनां रे लारै जलाल सांव रो।”

वादसा नीं मान्यो। काजी ने वठारा वजीरां घणो ऊंचो नीचो समभायो मोटो वादसा है आड़ी वगत फोज फांटा, हर तरै सूं थारे फायदो है। काजी ने लाळच दे देवाय राजी कर लीघो।

वूवना रो नारेळ वादसा ने भेलायो, मूमना रो जलाल ने भेलायो। सावा थिरप काजी चाल्यो।

जलाल ने घणो दुख व्हीयो पण मामा ने कांई कैवै। दूजां लारै कैवायो पण मान्यो नीं।

जान चढ़ी, जलाल वींद वण्यो। वादसा तो आपरा खांडा ने भेज्यो। एक हाथी पै वींद जलाल, दूजा हाथी पै वादसा रो खांडो। जान पूगी, हरख वधावणां व्हेवा लाग्य। काजी जाण्यो अवे तो कैवणां ही पड़ेला। छिपायां काम नीं चालै। नवाव ने कह्यो, “मूमना ने जलाल परणोला वूवना रो ब्याव वादसा लारै करणो तै व्हीयो है।”

नवाव ने घणी रीस आई, “नालायक गजव कर दीघी।” काजी ने जूता सूं ठोकायो। घर खोस लीघो, काळो मूंडो कर गधा पै चढ़ाय गाम वारै कढायो।

काजी कजिया चुकावतो, पड़ियो कजिया मांहि।

वूवना ने खबर लागी जाणै माथै वजर पड़्यो। माथो फोड़ लीघो। मन में निस्चं कीघो परणवा रो दसतूर यां रो मन व्हे जीं रे लारै करो म्हें तो जलाल ने पति धार लीघो, वो म्हारे सात सात भव रो भरतार, म्हूं वींरी स्त्री। दासी नेत्रवांधी ने कह्यो, “थूं जा जलाल साव ने कैव वूवना थारी है अर थारी हीज रैवैला। वारो खांडो मांग लाजो पैलां वारा खांडा रे साथ फेरा खाय लूं।”

वूवना तो जलाल रा खांडा ने मंगाय फेरा खाय लीघा ।

अवै जलाल चंवरी में आयो । नवाव घणां दुख सूं वादसा रा खांडा कने वूवना ने ऊभी कीघी । जलाल कने मूमना ने लाया । जलाल, वूवना ने चंवरी में आवती देखी जाणै पावासर री हंसणी आय री व्हे । धीरै धीरै पगल्या भरती वूवना यूं आयरी जाणै सिंगळ दीप री हथणी आय री । केळ री कांव री नाई वा भोला खाती आय री । वीं चींतालंकी वूवना ने देख जलाल माथो ठोक्यो “अहियो भाग अल्लाह” ।

परण घरै आया । वूवना घणी दुखी, मोटा वादसा री वेगम व्हेगी परण मांयलो जीव सोरो नीं । वूवना रे न्यारा मे'ल न्यारी ब्योदी, सब ठाठ वाठ परण सत कुछ व्हेतां थकां ही जाणै काई नीं । मन अमूझ्यां वूवना वैठी रै । वादसा रे आगै ही घणी वेगमां, रावळो भरयो । वूवना री वारी, वारा मीनां में एक दांण आई । वादसा आयो, वूवना चतराई सूं टाळ दीघो । वूवना रा मन में जलाल वस रियो । मिलवा रो ओसर नीं । मन मारयां, काळजो दवायां दिन काटै ।

जलो ही मन में घणो उदास रैवै, मूमना सूं वात करै, वतळावै परण जीव उब्बो उब्बो रैवे । मन में वो ही घणो दुखी, भाग ने दोस दे । वूवना रा भरोखा नीचै ही सिणगार चौकी, मोटा मोटा उमराव वठै चौकी पँ वैठा रैवे, वातां करै चौपड़ां खेले, सांभ पड़्यां आपरे घरां जावै । जलाल ही परभाते उदास वहीया वीं चौकी पँ आय वैठै, मोको देख ऊपर री जाळी साम्हो भांके कठै ही वूवना रो भांको ही पड़ जावै । सांभ पड़्यां सगळा ही परा जावै जदी वो ही निसासा न्हांकतो, दूहा बोलतो, परो जावै, वूवना रा दीदार ही किसमत में नीं लिख्या ।

लोचन प्यासे दीद के, निरखें नित्त की नित्त ।

दरसण ही पावै नहीं, मिलवै कहीं न मित्त ॥

वूवना रा एक भांका सारुं जलाल तरसतो रै । एक दिन वूवना, नेत्रवांधी ने पूछयो “जलाल सा'व ने देख्या ही नीं, वै कदे ही अठीने आवै ही नीं है काई ?”

नेत्रवांधी बोली, “वे तो आखो दिन नीचै सिणगार चौकी पँ रैवै, आपणां भरोखा साम्हा मूंडो कीवा वैठा रै, आवतां जावतां निसासा भरता दूहा कैवो करै । सगळा उमरावां सूं पै'लां आवै, सगळा सूं पाछै जावै ।”

वूवना रा काळजा पँ जाणै करोत चालगी । नैणां में आंसू आयन्या । क्यूं नीं म्हूं जलाल नूं मिलूं । म्हारो पति है, मन अर वचन सूं अंगीकार करचोड़ी, करम सूं ही है, पै'लां ब्याव म्हें वींरा खांडा सूं कीवो । मृगतमायची सूं म्हारो लेखो देणो

ही काँई । यूँ पकड़ लाय घर में वैठाय देवा सूँ कोई पति पत्नी थोड़ा ही व्हे जावै । जलो म्हारो, म्हूँ जला री । म्हाने मिलवा सुँ रोकण्यो कुण ? नेत्रवांधी ने कह्यो, “थूँ जा जलाल सूँ मिल वाने अठै ला ।”

नेत्रवांधी नीचै उतरी, मोको देख जला ने पूछ्यो, “जलाल साँव, आप उदास उदास रैवो निसासा म्हंको । अठै आवो जदी तो आगँ देखो, जावा लागो जदी पाछै भांकता जावो । आपरा मन मे दुख काँई है ? चावो काँई हो ?”

जलाल बोल्यो, “काँई चावां अर काँई नीं चावां जो कुण सुराँ म्हारी । म्हंको मन तो रात दिन सैरां में लाग्यो रै ।”

कीं चवां कीं न चवां, कवण सुरांदा कत्थ ।

मनड़ो चावै रातदिन, सैरां हंदो सत्थ ॥

नेत्रवांधी धीरेक कह्यो, “आज रात रा थे वाग में आवजो, लेवा ने म्हें आवांला ।”

जलो भट आपरे मेलां जाय सनान सपाड़ो कर पोसाक कीधी । इत्तर में तो यूँ गरक रैवतो ही हो और ही इत्तर लगायां । कद धड़ी रात पड़ै, एक एक पल वरस ज्यूँ लाग री । अंधारो पढ़तां ही अकेलो चाल्यो, यूँ लाग रियो जांणै पग धरती पे नीं पड़ रिया, पाँखड़ा आय गिया व्हे । तनामनां नाम रो जलाल रो मित्तर जो हमेसा साथै रो साथै रै, वीं अर फूलमद खवास देख्यो, यूँ तो जलाल कदे ही अकेला कठै ही नीं जावै, आज राजी व्हेता, मुळकता अकेला कठै जाय रिया है, यांरा पग ठिकाणै नीं पड़ रिया है । वूवना रो वैम आयो जदी तनामनां जावता जलाल ने कह्यो, “जावो जो चोखा पण सोच समझ पग दीजो । घर में हांण, जग में हांसी व्हे जसी जगां मत जावजो ।”

जलाल ने अँवखी लागी, पाछो बोल्यो नी । वाग में जाय, चमेली री, जूही री गैरी भाड़्यां में छिप वैठ्यो ।

नेत्रवांधी चार दूसरी लुगायां ने ले फूल लावा रे मिस वाग में चाली । डचोही रो डोढ्यो वूवना रे डायजै आयोड़ो । आख्यां रो आंधो पण हिया री आख्यां खुली लगी । सूभतां सूँ चोगणी नीगै राखै । पग वाजतां ही डोढ्यो पूछ्यो, “कुण, नेत्रवांधी ?”

नेत्रवांधी हूँकारो भरयो ।

“अवार ईं वेळा कठै जाय री है ?”

‘वादसा मेलां पधारे जो सेज विछावा ने फूल लेवा जाय री हूँ ।”

“ला, म्हारा हाथ पै हाथ मेलती जावो ।”

कोई मरद रावळा में परो नीं जावै ज्यू हाथ लगाय डोढयो पारख कर लेतो । पांचू ही चुगायां, डोढया रा हाथ पै हाथ मेलती बाग में आई ।

ऋतपट मोटा छावड़ा में जलाल ने बँठाय, ऊपरे फूल न्हांक, माथे छावड़ो मेल ले चाली ।

पांचू ही जप्यां डोढया रा हाथ पै हाथ मेल्या । डोढयो बोल्यो “ठैरो, ईं छावड़ा में कोरा फूलां रो बँभो नीं । फूलां रा बोभू सूं पग अस्त्या धम धम नीं वाजै । छावड़ो उतार, नांयने कनि बँठाय राख्यो है ?”

नेत्रवांघी बोली, “आंख्यां तो फूटी है पण हियो ही फूट्यो है काई ?”

डोढया ने आई रीस, “रांड, मारी जावेला । म्हने ही भूगो कर री है । उतार छावड़ो बत्ता म्हने ।”

जलाल जांप्यो कान विगड्यो । आखिर वूवना रा पीयर रो है । लिहाज तो राखैला हीत्र । ऋट छावड़ा वारै निकळ बोल्यो, “सावास, पैरादार व्हे तो अस्त्यो । घारी हुस्पारी पै मन राजी व्हेग्यो । आज आज माफ करदो ।”

आंघो पैरावाळो बोल्यो, “जलाल सांब ये गैला अणूँता है । ये रस्ता छोड़ दो ।”

जलाल नायो हिलाय धीरेक बोल्यो, “सिर दीघो वूवन सट्टे”

“ये मरोला अर म्हने मरावोला । अदखी तो घर्णी ही लाग री है पण वूवना रे लारे आयोडो हूं । वूवना रो मुलायजो नीं टूटै । आज आज तो जावो पण आज पडै पण दीघो तो खैर नीं ।”

जलाल वूवना ने देखी, वुवना जला ने देख्यो । लुब मूलग्या, आपा में नीं रिया । सपना में देखता जो सागैसाग कनें ऊभा । वूवना ने लाग्यो जांणै तीन लोक री संपदा वीं रा कनें आयगी । जलाल जांप्यो मिनद जमारो सारयक व्हेग्यो, अब मरदां रो ही घोवो नीं ?

वूवना तो जला रे मेंदी ज्यूं रचगी, काजळ ज्यूं घुळगी । वूव में पाखी ज्यूं मिलगी । वांने खबर ही नीं कठीने ऊगै कठीने आये । तीन दिन व्हेग्या । नेत्रवांघी पूरी निगै राखै के कनि पतो नीं लाग जावै पण कदे ही छिपायां छिपी है ये बातों ?

इश्क मुश्क खांसी, खुश्क, खैर खून मदपान ।

लाख जतन करो तो ही अली बातों नीं छिपै । वूनी वेगमां ने वैन पड्यो । जला

री, गळती रात में खांसी सुण वां जाय वादसा ने कह्यो,

“जलो तो बूवना रा मे'लां में है।”

वादसा नीं मान्यो। सोक्यां कह्यो, “आप अचाणचक रा पघार देखलो है के नीं।”

वादसा ने रीस अणाय. सिखाय नै वेगमां भेज्यो। बूवना रा मे'लां में आय तो रियो परण मन में मृगतमायची रे पसतावो, “सांचै ही बूवना है जला रे लायक, म्हें परण खोटो काम कीघो।”

वादसा ने आता देख नेत्रवांधी भागी। कूणा में फूलां रो ढेर हो जीं में भट जला ने छिपाय दोघो। ऊपरें घणां सारा फूल न्हांक दीघा।

बूवना उठ वादसा सूं मुजरो कीघो।

अवै वादसा वोलै तो कांई नीं। चारूंकानी चमक्योड़ा हिरण ज्यूं देखै। वठै तो कांई नीं, बूवना रो ढोल्यो अर कूणां में फूलां रो ढिगलो। जलाल फूलां रा ढिगला में दव्योड़ो घबरावै, सांस आगती आयरी जो सांस रे लारै फूल हाल रिया। या देख नेत्रवांधी जांणी जलो डरप रियो है जो हीमत देवावा ने बोली, “भंवरो कंवळ कळी में फंस तो गियो परण कायर कांप रियो है। अरे डरप मत, जीवतो रियो तो कंवळ वन रो आणंद लीजे, मर गियो तो ही कांई फिकर! व्हाली जगां ही तो मरेला।”

भमरा कळी लपेटियो, कायर कंपै कांह।

जो जीत्यो तो जुग समो, मुवो तो मोटी ठांह।।

दूहो सुणतां ही मृगतमायची पूछ्यो, “यो दूहो थें कीं ने सुणायो?”

बूवना भट वात संभाळी, “हजरत, म्हारा कंवळ रा वीड़ में भंवरो आय वंठ्यो, रात ने कळी में वंद व्हेग्यो, जीं ने केय री है।”

“जा, वीं ने छुड़ाय आ।”

वादसा री संका मिटगी, कांई नीं देख्यो जो पाछो आपरे मे'लां चाल्यो, “म्हारो वेटो जलालियो अस्यो नीं. ये वेगमां, साळियां वीं ने मरावणो चावै।”

जलाल बूवना रा मे'लां में हीज। घणां दिन व्हेग्या। तनांमनां मित्तर, फूलमद खवास, गखडो ढाढी जांणै के जलो कठै है। घणां दिन व्हेग्या तो यां रा मन में संका, कठै हीं जलो मारियो गियो है। मूमना पुछावै जलाल सा'व कठै? ये वीने अठीली वठीली भूठी सांची कैय समभाय दे परण मन में घणां उदास। एक दिन

मांभल रात

वादसा तनांमनां ने पूछ्यो, “जलाल कठै है ? अतरा दिन व्हेग्या देह

वात जमाय पाछी अरज कीधी, “आप जस्या मामा है, जला ने कांई सोचें । नादान ओस्था है मे'लां में खावै पीवै आणंद करै ।”

वादसा राजी व्हीयो, “म्हारो बेटो जलालियो घरणो सोकीन है, वादसा रा सच्चा फरजन है ।”

घरां ही इत्तर, चोवो, कपूर, केसर, कस्तूरी जला सारूं वगसी ।

यूं करतां वारा मीना व्हेग्या ।

“सज्जण संग रहंतड़ा, वरस भयो इक मास”

खवर नीं पड़ी यां दिनां ने निकळतां, जलै दूबना सूं सीख मांगी । रेसम री डोर सूं भरोखा नीचै जलो उतरयो । जलो ज्यूं आवै ज्यूं सुगंध री घोर बंधती आय री । तनांमनां कह्यो, जलो जीवै, वीरा लगायोड़ा इत्तर री सुगंध है ।” सुगंध रे घोरे घोरे वे चाल्या । जलो आवतो दीख्यो, आंख्यां लाल व्हेय री है, लपेटा रा पेच अट-पटा बंध्या है, अमल में छक्यो लगो है । पग पाधरा नीं पड़ रिया है ।

ये हाल देख तनांमनां वोल्यो, “आक रो दांतण नीं करणो, सांप रो मांस नीं खावणो । जला, जठै जीव रो विणास व्हेतो व्हे बठी नै पग नीं देवणो ।”

अककां न दांतण कीजिये, सांपां न खाइये मांस ।

जला जेथ न जाइये, जेथ जीवड़ा विणास ॥

जला ने वीरी वात सुवाई नीं, सीख आछी नीं लागी । जलै जुवाव नीं दीघो, वोल्यो नीं ।

गखड़ै ढाढ़ी देख्यो, सीख ईं वगत में आछी थोड़ी लागै । अवार तो चुवना रो मोह रूम रूम में रम रियो है । जला ने सुवावतो दूहो वोल्यो,

“आकास में बेलड़ी है जीरे लाखीणां फळ लाग रिया है । जलाल, थारा सिवाय यां फळां ने चाखण्यो ही कुण ?”

अंवर लगगी बेलड़ी, तिण फळ लगगा लाल ।

तो विण किरा ही न चक्खिया, हो गहाणी जलाल ॥

जलाल वोल्यो, “वाह, वाह, कांई वात कही है ।”

पूंगी पै काळो नाग भूमै ज्यूं जलाल ई दूहा पै भूम गियो ।

जखड़ो दूजो दूहो बोल्यो,

सो मण तो केसर उडी, सो दस उडी गुलाल ।

बूवन हंदा महल में, रात्यूं रम्यो जलाल ॥

जलाल आपरे गळा रो कांठलो खोल ढाढ़ी रे गळा में न्हांक दीघो ।

तनांमनां देख्यो, यो मामलो तो हाथां बारें जाय रियो है । समभावणो तो आपणो फरज है । चिड़तो थको बोल्यो, “जलालिया, गैलै गैलै चाल । आकास मे फूलड़ा लग रिया है जो थारे हाथै किस तरै लागै ?”

चलियो जा जलालिया, सैणां हंदे सत्थ ।

अंबर लग्गे फूलड़ा, तो किम आवे हत्थ ॥

जलाल गाबड़ मरोड़तै कह्यो, “भगवान देवै जदी ऊंचा ही नीचा व्हे जावै । अण-व्हेणी, व्हेती व्हे जावै । वायरा सूं उड्या सेमर रा फूल री नाई अपणै आप घर में आय पड़ै ।”

तनांमनां जाल्यो, मानेगा नीं तो ईंरा जीव ने खतरो है कदे ही मारघो जावैला । वी जोर देनै कह्यो, “कान खोलनै म्हारी वात सुणले । ग्रह दसा पूछनै रातड़िया रमवा पधार जो ।”

जला कन्नां देय कर, सुण अम्ह वत्तड़ियांह ।

डक्कण वातां बूभ के, रमजो रत्तड़ियांह ॥

फिस्तो ही जलो जुवाव दीघो “माथा पै कफन वांधनै फिरं ज्यां सूं देवता ही डरपै । अटैतो जीव हथेळी पै लीधां फिरा हां मोच कीरो है ?”

तनांमनां जाणग्यो, “यो मानवा ने नीं । लाख कैवो चीकरणा हांडा पै छांटो लागवा ने नीं ।”

जलो रोजीना रात ने बूवन। सूं मिलै । सट्ट करै पट्ट करै पण जावै । रंगभीनी बूवना ने नीं देखै जतरै जला ने जक नी, जोड़ी रा जलाल ने नी देखै जतरै बूवना ने जक नीं । सात सात पैरा लागै, डचोढी रे सात सात ताळा लागै, सोकड़ल्यां ताका भांका करै के जलाल ने पकड़ां । मोत साम्ही ऊभी हंसै पण जो धार ले वीं ने मोत रो कांईं डर ? कुण रोक सक्यो है अस्या प्रेमी ने आज तांईं ? जलो जावतो रुकै नीं, जावै अर जरूर जावै ।

मृगतमायची ने लोगां कह्यो के एक रात ये दो ही जणां दूरा नीं रै ।

मृगतमायची बोल्यो, “दूरा नीं किस तरै रै, आज म्हारे साथै जला ने सिकार में ले जावूँला । देखां रात ने किस तरै आवै ?”

जला ने ले सिकार चाल्यो, रात पड़गी, आछो आंवा रो पेड़ देख, वीरे नींचै विछायत कर बादसा सूतो, आपरे कनें जलाल ने सुवायो । आंवा री डाळ रे घोड़ा बांघ दीघा ।

चांदणी रात छिटक री, आंवा रा मोड़ री भीनी भीनी सुगंध आय री, मधरो मधरो पवन चाल रियो, चांदणी रात में तळाव रो ऊजळो पाणी अस्यो लाग रियो जाणै दूव रो कटोरो भरयो व्हे । मंभरात, भींगर बोल रिया, सियाळयां री, “हूकी हूकी” व्हेय री । कोचरी रैय रैय नै बोलती लगी माथा पै उडती निकळ जावै । भांय भांय रात कर ने ।

मृगतमायची ने नींद आयगी, सब साथ वाळा सोयग्या, जला री आंख्यां में नींद नीं, वीरो मन वूवना में “वा गुनलंजा म्हारी वाट देख री व्हेला । मिलवा रो वगत टळग्यो, वीं मानेतरा रूसणां कर राख्यो व्हेला । डावरनैणी वूवना रा नैणां में आंसू भर रिया व्हेला, कर सोच री व्हेला । वा तनक मिजाजण नाराज व्हे री व्हेला, मन में ओळंवा देय री व्हेला । नाजकड़ी घवराय री व्हेला, विछाणां पै पड़ी तड़फ री व्हेला काजळ रेखी वूवना रोय री व्हेला । वीं मीठा बोली ने भरोसो है म्हारा प्रेम पै जरूर वाट देख री व्हेला, नेत्रवांधी रे हाथ में रेतम डोर दे गोखड़ा में ऊभी कर राखी व्हेला ।”

भिलती जोड़ रा जला री आंख्यां आगे तसवीर सी मंडगी जाणै वा भाला देणी भाला दे दे वीं ने बुलाय री है।

जला ने दूहो याद आयग्यो, पैदल तो पांच कोस दूरो व्हे नै आपणी सायघरा सूं जाय नीं मिलै । घोड़ा रो असवार दसकोस री दूरी पै न्यारी रात काढले तो बस जाण नात्रो कै तो लुगाई कुभारजा है कै मिनख नाजोगो है ।

पंच कोसां प्यादो रहे, दस कोसां असवार ।

कै तो नार कुभारजा, कै रांडुल्यो भरतार ॥

यो दूहो याद आवतां ही जलाल तो सूतो लगे उछळ नै ऊभो व्हेग्यो । चित्राम री फूतळी वूवना जसी तो मारणी ! म्हूं वीं पै पिराण निछरावळ करण्यो !! अतरा नजदीक रैतां थका रात न्यारी कटै ?

आंवा री डाळ रे वादसा रो अरवी घोड़ो बंध्यो हीज हो । घण हेताळू जलो तो भट चढ्यो, राना नीचै घोड़ो व्हे पछे घर कस्यो दूरो ? घोड़ा री रास ने थोड़ी ऊंची लेतां ही परबत पार ।

यूं क्यूं मन में जांणजै, घोड़ां थी घर दूर ।

टुक ऊंचै रासां लिये, तो आवै परबत चूर ॥

अरवी घोड़ा री रास खैची, घोड़ो उड़्यो । जलाल रा इत्तर री लपट दूरां सूं आई, बूवना बोली, “नेत्रवांधी, छीको नीचै उतार, जलालो बिलालो आयग्यो ।”

छींका में बैठाय जला ने ऊपरै लीघो । बूवना ने लाग्यो अंधारा घर में उजाळो व्हेग्यो । जलो घड़ी दोय बातचीत कर पाछो घोड़ो दपटायो ।

घोड़ा रे मूंडे भाग आयग्या, फुरणा बोलवा लागग्या, पसीना सूं भगाबोळ व्हेग्यो । पाछो आय घोड़ा ने डाळी रे बांध दीघो, आप सागी जणां बादसा रे कनें सोयग्या । मृगतमायची जाग्यो आपरा घोड़ा ने संभाळै तो पसीना सूं तर, काछा में पसीनो टपक रियो, धूळा सूं भरियो लगे । मृगतमायची ने वैंम पड़्यो । पूछ्यो, “म्हारो घोड़ो अस्यो लागै जांणै चाल नै आयो व्हे ।”

जलो भट बोल्यो, “बादसा सलामत, म्हारा घोड़ा ने ही देखावो, यूं ही लाग रियो है । खुरीं कीधां विनां परभाते घोड़ा यूं ही लागै । काले कस्या आपां घोड़ा ने थोड़ा दोड़ाया ? अरवी घोड़ो, अमीर जीव, घणां दिनां पछे ठांण सूं खुत्यो ।”

मृगतमायची ने वैंम तो पूरो व्हीयो पण मन ने समझाय लीघो । जलो कैंवै जो ठीक है ।

खलक री हलक कुण पकडे ? जला बूवना री चरचा चालवा लागी । मृगतमायची ने कापरी गलती पे पछतावो ही घणां नै यांरा पे रीस ही घणी । जला ने अठा सूं दूरो करदू, या सोच जला ने बुलाय, गिरवरगढ़ री चढ़ाई रो बीड़ो भेलायो । हुकम दीघो,

“जोइयां रे साथै भगड़ो चाल रियो जो थां जांणै ही हो, मोटा मोटा उमराव भेज्या पण जोइया तावे नीं व्हीया, अठा सूं जावा वाळा कै तो मारचा गया कै भागनै पाछा आया । थां जावो गिरवरगढ़ ने तावे करो ।”

जलाल बीड़ो भेल्यो, फोज री तयारी कीघी । हथियार संभाळ्या । नाळां, घुड़नाळां, गजनाळां, रामचंगियां जुजवा, तोपां लारै लीघी । घोड़ा रे पाखर घाली । जिरह

वस्तर पैर, टोप लगाय, जलो सिलहपोस व्हे बादसा सूं मुजरो कर कूंच कीधो । मोरत सजाय दो रूस दूरा दीधा ।

बूबना नेत्रवांधी ने कह्यो, “जलाल सा‘ब भारी मूंम पै जाय रिया है । पाछा कुण जांणी कदी आवै । आपां चालां वारे डेरै, एक नजर तो देख आवां । जलाल कदे ही दूरा नीं रैता, दस कोस व्हेता तो आय मिलता । आज घणां ही दो कोस दूरा है पण जंग रा मैदान कूंच करचोड़ा पाछा किस तरै फिरै । नेत्रवांधी, हमेसा वे आय आपां सूं मिलता, आज आपां चालां लसकरिया सूं मिल आवां ।”

छींका सूं नीची उतर बूबना नेत्रवांधी ने साथ ले चाली । नेत्रवांधी आगै जाय जला ने खबर दीधी ।

“जला रे म्हें तो राज रा डैरा निरखण आई रे जलाल”

जलो तो आरांंद सूं उछळग्यो । बधाई में गळा री माळा उतार नेत्रवांधी ने देय दीधी । बूबना रो अस्यो नेह देख जला री छाती भरगी, हीमत देख आंजस सूं आख्यां चमकगी ।

दो घड़ी बातचीत कर बूबना सीख मांगी । पग आगै देतां पाछा पडै । अमरत पीत्रतां ही कदे तृप्ति व्हे ? नीठ नीठ डेरा बारै नीकळी । गळगळी व्हे बोली,

सज्जन फळजो फूलजो, बड़ जिम विसनरजोह ।

मासे बरसे जो मिलो, तो इण ही रंग रहजोह ॥

जलाल भारी फोज ले गिरवरगढ़ पूग्यो, खबर लगाई गढ़ में सामान घणां, अन्न भरघो, पाणी रो टोटो नीं, जोहिया चाळीस हजार भेळा व्हीयोड़ा । बारा बरस घेरो लाग्यो रै तो वाने सोच नीं । जलाल फोज रो हमलो करै तो जोहियां रो गढ़ बांको, मोरचा अस्या जम्योड़ा के हमलो करवा वाळा पग एक आगो नीं दे सकै । जलाल तरकीब सूं काम लीधो । आपरा ठावा मिनख ने जोहियां कनें भेज्यो । वीं जाय जोहियां ने कह्यो, “जलाल सा‘ब थां सूं भगड़ो करणो चावै नी । वादसा भेज्यो है, कांई करै आवणो पड़्यो । वठै नीं अठै बैठ्या हां । थां म्हारी कानी रो कांई सोच करो मती ।”

जोहियां रा आदमी आयनं देख्यो तो जला रा डेरा में हमला री कोई त्यारी नीं दीखी । जोहियां ने ही भरोसो आयग्यो । बूबना री वात वां पे लां ही सुण राखी ही और ही निस्चै व्हेग्यो कि जलाल ने वठा सूं टाळवा ने अठै भेज राख्यो है ।

जलाल तो जोहियां रे अठे आवणो जावणो वड़ायो । कैवतो रवे, “हुकम है जो पड़चा हं अठे।”

यूं करता करतां जेठ मीनो आयग्यो । असाढ़ आयो, घमकनै वरस्यो । जोहियां सोची, बाजरी वाणी चावै । यूं गढ़ मे छाना मानां वैठचा काईं फायदो । हमलो तो व्हे नी रियो है । चार हजार घोड़ा आदमी तो गढ़ में रिया, बाकी रा खेतां में बाजरी वावा ने परा गया । जलाल जोहियां री पूरी खबर राखै ।

वीं एक दिन अचाणक आपरी सारी फोज ने थटाभखर पाछा जावा रो हुकम दीधो, “बादसा रो हुकम आयग्यो है पाछा बुलाया है।”

कूच रो नगारो वजाय पांच कोस दूरा जाय डेरो दीधो । गढ़ रा जोहिया जाण्यां, घणां राजी व्हीया, गढ़ रा दरवाजा खोल दीघा, आप आप रे हल्ले लाग्या । जोहियां ने विखरवा देय, जलो आपरी पूरी फोज ने सजाय एकदम रात ने गढ़ पै हमलो बोल दीधो, खटण जोहिया ने मार लीधो, गढ़ पै कब्जो कर लीधो । जलाल री आण फिरगी । थटाभखर कासीद दोड़ायो । मृगतमायची घणों राजी व्हीयो, जला ने वठा रो पूरो जावतो कर फोज पाछी लावा रो हुकम भेज्यो ।

दूसरी बेगमां मृगतमायची रा कान भरवा लागी, “जलो आंवतां ही पेलां वूबना कनें जावेला, आप सूं मुजरो करवाने पछे हाजर व्हेला, बीरे घरै पछे जावेला, वूबना सूं मिलवा ने पेलां जावेला।”

मृगतमायची ने ही पूरी संका, जलाल वूबना सूं मिलनीं सकै ईं वास्ते तळाव में मे'ल हो जी मे वूबना ने भेज दीघी । मे'ल रे पूरा पैरा रो इन्तजाम कर दीधो ।

वूबना मन में कह्यो, “कोई परवन्ध म्हने जलाल सूं मिलवा ने नीं रोक सके । यो तळाव रो पाणी अर ये पैरावाळा काई है जो लोह रा पीजरा में म्हने घाल दो, छुरचां री वाड़ करदो, म्हारो माथो काटलो पण जला बिना म्हूं नी रैवूं ।

कर लोह हंदा पीजरा, कर छुरियां दी वाड़ ।  
जला विन हूं ना रहूं, भावे गरदन मार ॥

तळाव री पाळ पै पैरावाळा वैठाय दीघा । वूबना पाणी रे वीचें मे'ल में रै ।  
जलो उमग्यो लगो मंजल चल्थो आवै ।

“चाल घोड़ा उतावळो” कैवतो, गला घाटा चीरतो, नदी दाळा पार करतो, परवतां ने उलांघतो, जलो वूबना सूं मिलवा ने आगतो, घोड़ो दपटायां आवै । वूबना पलकां रा पगमंडा विछायां वाट देख री । जला ने लागै घोड़ा सूं गैलो क्यूं नीं कट रियो है, यो अतररो धीरै काई चाल रियो है । वूबना ने दीखै ये दिन अतरा लांवा क्यूं

व्हेय रिया है, सांभ क्यूं नीं पड़ै ।

जला ने गैला में खबर लागगी वूवना ने पाणी बीचै मे'लां में भेज दीधी है । पैरा रो पुरो परवन्ध कर राख्यो है । जलो कह्यो, म्हने पैरा चौकी वूवना सूं मिलवा ने रोक देला ? ये पैरा कांई है, सांपां री वाड करदे सिघां ने आडा वैठाय दे, और तो और जमराज ने पैरा पै ऊभा करदे तो वूवना सूं मिल्यां विना नीं रूवूं ।”

जलो घोड़ो दपटातो, दो घड़ी रात रा तळाव पै आयो देखै तो पैरा लाग रिया । जलो घोड़ा सूं उतर पैरावाळा कनें सूधो गियो ।

“हवलदारजी, दो घड़ी वूवना सूं मिल आवा री इजाजत दो ।”

“जलाल सा'व, माफ करो हुकम नीं ।”

जलो बोल्यो, “वूवना सूं मिल्या विना म्हूं नीं रूवूं । चाहे जो व्हीजो । म्हें म्हारो जीव पिराण वीं सारूं अरपण कर दीधो । जावा दो तो दो घड़ी हंस वात कर लूं नीं तो उठो, तरवार उठावो । मरग्यो तो ही अमर व्हे जावूंला । करो फंसलो एक वात रो ।”

पैरावाळा देख्यो, जलाल रो हेत तो घरणो गाढो । वादसा वूवना ने जबर दस्ती परणी, परण्यां पछै एक रात ही नी दीधी । वूवना जलाल पै जीव दे, जलो वूवना पै पिराण दे । जलाल कै तो जायने मिलेला कै पिराण दे देला । आपां अस्या गाढा हेत वाळां रे बीचै पड़ पराछत क्यूं लां । जलो आखर वादसा रो भाणेज है, ईं री मां वैठी है । जलाल ने मारां तो साम्ही आपां पै आफत आय जावै तो कीने खबर । पैरा वाळा जलाल ने रोक्यो नीं जलो तो हो ज्यूं रो ज्यूं पाणी में कूद पड़्यो । मगर मच्छ पाणी में सरडाटा ले ज्यूं वूवना रा मे'लां साम्ही तिरयो ।

वूवना तो नैण विछायां वैठी हीज ही, जला रा इत्तर री लपट वायरा रे लारे आई वूवना फड़फड़ाई, फोजां रो मांभी जलो आयो, वूवना जाणती जला ने, जलो अवेला अर जरूर आवेला । यो पाणी कांई है, वासदी रो तळाव भरयो व्हे तो वो नीं रुकै । नाव त्यार कराय राखी, जला ने लावा लेजावा सारूं । नेत्रवाधी ने कह्यो, “भट नाव खोल ” । नाव ले जला रे साम्ही चाली ।

तळाव मोटो, आधै आवतां आवतां जलो थाकग्यो, सांस भरग्यो, जांणी डूव्या । अतराक में तो नाव ले वूवना आयगी । हाथ पकड़ नाव में चढाय ले चाली ।

जला अर वूवना रो हेत दिन दिन ओर ही गाढो व्हेतो जावै । ज्यूं मिले ज्यूं वत्तो वडै । एक दूजा में अतरा रंग गिया के एक रंग व्हेग्या, एक जीव व्हेग्या । कोई तागत नीं जो वां ने मिलवा सूं रोक सकै ।

सोव्यां ने खटे नीं. वादसा आगे चुगली करती रै । अठीने वठीने चरचा ही चालै ।

मृगतमायची घरां विचार में “जलो मरजावै तो पापो कटै ।”

एक दो तरकीवां कीधी परा भगवान ने राखणो जो जलो मरचो नीं । एक जरौं एकांत में वादसा ने सल्ला दीधी, “जलाल ने मारचा रो उपाय म्हुं बतावूं । घरां सोरो । कीरे ही माथै दोस नीं आवै अपरां आप मर जावै । यां रे दोवां रे ही हेत घरां, एक विदा दूजो नीं रै । म्हुं बतावूं ज्युं करो ।”

दूजै ही दिन मृगतमायची जला ने ले सूर री सिकार चाल्यो । वादसा तोत रच एक आदमी ने भेज्यो, वीं रोवतै लगै सहर में जाय खबर दीधी, सूर री सिकार करतां जलाल सा'ब मारचा गया । घायल सूर दांतळी सूं चीर दीघा ।

सारा दरवार में रोवा कूटो मचग्यो । कफन री तयारी करवा लाग्या । वूवना सुण्यो, जलो मरग्यो । अणर्चींत्यो आकास सूं बजर पड़्यो । जलो मरग्यो नै वूवना जीवती रैवै ? जला विना वूवना कठे ? “हाय जला” कैवतां वूवना रो पिराण उडग्यो । हरम में हाहाकार व्हेग्यो ।

आदमी दोड़्या, सिकार मे जाय वादसा ने कह्यो “वठे जलाल सा'ब रे फोट व्हेवा री खबर आई । खबर सुणतां ही वेगम सा'ब खतम व्हेग्या ।” जलो कनें ऊभो, सुणी वूवना मरगी, “म्हारे मरवा री खबर सुणतां ही वूवना मरगी । यो प्रेम !”

जलो तडाळ्खाय नीचै पड़्यो, “वूवना, थूं परी गी म्हु अठे काई करूं ?” ये अवखर निकळता निकळतां जला रो सांस निकळग्यो ।

दुनियां कह्यो प्रेमी व्हे तो अस्या व्हे । सांचा प्रेमी हा । दरसण करवा ने सहर भेल्लो व्हेग्यो । वाने भूंडा कैवा वाळा वारा भगत व्हेग्या ।

मृगतमायची अवै समझ्यो वारा प्रेम ने अर आंपणी गलती ने । वादसा हुकम दीघो, “ये सांचा प्रेमी हा, यां ने एक साथै दफणावो ।”

वूवना अर जला ने एक कवर में दफणाया । वादसा फूल चढ़ाय वारी कवर पै गोडा टेक खुदा सूं माफी मांगी, “परवर दिगार, म्हे जलाल अर वूवना रे वीचै आय गुनाह कीघो, माफ कर ।”

## शब्दार्थ

- अक्कां—आक  
 अगवाणी—स्वागत करवा ने साम्हा  
 जावणो ।  
 अड़वी तासा—एक तरै रो वाजो  
 अम्ह—म्हारी  
 अलिवंघ—एक डोरो जीने डाढी नीचे  
 सूं ले पागड़ी मायँ बांघ दे जीसूं  
 पाग पड्यो रो डर नीं रै ।  
 अहेड़े—सिकार  
 आड़े माळ—लम्बी चीड़ी जगां री  
 सीयाळू खेती जीं ने कूवा सूं सींच  
 नै पावा रो झंझट नीं व्हे । चोमासा  
 रा पाणी सूं ही घान नीपजै ।  
 ईसको—ईष्यां  
 एवड़ छेवड़—आसपास  
 ओड—एक जात जो माटी खोदवा रो  
 काम करे ।  
 अंवरों—कपड़ा  
 कडिंग धींग—नगरा रा डंका रो  
 बोल ।  
 कत्थ—वात  
 कसूं वो—गळी लगी अमल  
 कर वरसणां—दातार  
 कवण—कुण  
 कळळाया—विलाप  
 कळहळ—कोळाहळ  
 काळेर—काळो हिरण  
 कांकण डोरड़ा—ब्याव रो मंगळ सूत्र ।  
 किम—किस तरै  
 केसवाळी—घोड़ां रा गावड़ परला  
 केस ।  
 केसूड़ा—टेसू रा फूल  
 कोरणी आयणी—खुदगी  
 खड़ो—चालो  
 खमणी—क्षमासील  
 गदगद पोठ्यां—मोरां पै लाद नै  
 गळडव्वे—कांधा पै पड़घोड़ो कमर पै  
 लटकतो चामड़ा रो पट्टा में तरवारां  
 घाल्योड़ी  
 गनीम—सत्रु  
 गुललजां—फूलां जसी फूटरी  
 गैदन्तो—हाथी सा दांत वाळो सूर  
 घूमटा—गुम्बज  
 घोड़ा ने हरिया बांघ दीघा—घोड़ा  
 ने फागुण मीनि घापमा हरिया जौ  
 चरावै, ठाणां सूं वारे नीं काढै,  
 खुराक वढावै आराम दे ।  
 घोड़ां रा पोड़—घोड़ां रे दोड़वारी  
 आवाज ।  
 घोड़यो—बखेड़ो !

चीतालंकी—चीता सी कमर वाली  
 छेवरिया—सूर रा वच्चा  
 जमीत—फोज  
 जीण रो सिंघाड़ो—घोड़ा रा जीण रे  
 टूंचको निकळयो व्हे जो ।  
 जोतदान—चित्तरां रो संग्रह  
 भौंक लागी भटकेह—भटकां री भड्डी  
 लाग री ।  
 टापर—सीयाळा, में, घोड़ा. ने रात ने  
 ओढावा रो कपड़ो ।  
 डागळै—छात पै  
 डांण—कर  
 ढल्यां—गुडियां  
 थोह—सूर रे रैवण री जगां  
 दरीखाना—सभा  
 धूंस्म—नंगारो जो घोड़ा पै कस्यो  
 जाव ।  
 धोरियो—रेत रो टीवो.  
 निसाण—भंडा-  
 नो दा'र वारा चीतरा—वीफरयोड़ा  
 घणां नाराज व्हीयोड़ा  
 नौकर्या—सिकार में हाको देवण री  
 नौकरी वाळा ।  
 परवानो—आज्ञा पत्र  
 पाखर मडी—घोड़ा पै जीण कस्या ।  
 पाखर घोड़ा रे पैरवा रा लोह रा  
 कवच ने कवे ।  
 पाखरिया—घोड़ा जां पै पाखर घली  
 थकी व्हे ।  
 पाळा—पंदल

पाळो—ठंड  
 पोह फाट्यां—दिन उग्यां  
 ववड़ाय—अळगाकर  
 वत्तड़ियांह—वातां  
 वांवटयो—वांह  
 विड़द—जस गीत  
 भालो—तरकस  
 भूंई—भूमि  
 भूयांय—भुजंग  
 भोटपड़ी—जबरदस्त वार व्हेयरिया  
 मनचंगा—सुद्ध मन  
 मांगणी—जांचवा ने  
 मूंम—रणयात्रा  
 मूंहताजी—कामदार की एक पदवी  
 मंगरी—पहाडी  
 रत्तडियांह—रातां  
 रावळा—जनाना  
 रासवा—गधा  
 रीठ—भौंक  
 रुकां—तरवारां  
 रोड्यां—टट्टड़ा  
 लाख पसाव—एक मोटी इज्जत वाळो  
 पुरस्कार जी में लाख रुपया रो  
 माल व्हे ।  
 वागी—वाजी  
 सरगायां—सहनाई  
 सरभरा—खातरदारी  
 सिणगार चौकी—गढ़ में बण्योडी  
 मोटी चोकी जीं पै सभा जुड़े, उच्छव  
 वगैरा व्हे ।

सुरांदा—सुरौ

सुभराज—भाट, नगारची वगैरा मृजरो  
करे जीं ने सुभराज कैवे । सुभराज  
में रोजा रा बाप दादां रो नाम  
लेता लगा वंस रो बखांण करे ।

सोव्रण—सोनो

संपाड़ो—स्नान

हमैं—अबै

हूंकार री कलंगी—हूंकार नाम रो एक  
पंछी व्हे । जीं री पाखां री कलंगी ।  
वे पांख घणा कीमती व्हेता अर  
मुसकिल सूं मिलता । राज रा  
हुकम विना कोई या कलंगी पैर  
नीं सकतो ।

